

মিহি ও মোটা কাহিনি

টিকটিকি

দোতলা বাড়ি। শহরের যে অঞ্চল বেজায় শহুরে বলে খ্যাত সেইখানে। তিনদিকে গাদাকরা বাড়ির চাপ, একদিকে রাজপথের চটুল ফাজলামি, আবেষ্টনীকে লক্ষ করলে সন্দেহ হয়, সমস্তটাই বুঝি হাই মায়োপিয়ার লীলা। তাছাড়া, এমন চেহারা বাড়িটার যে দাঁড়িয়ে থাকার ভঙ্গিটা অসবর্ণ রহস্যের মতো কুৎসিত। সস্তা মেয়েমানুষ যেন পথিকের দিকে পিছন ফিরে দাঁড়িয়ে বিজ্ঞাপন দিচ্ছে, আমি ভীষু ও সরলা খাঁটি গাঁয়ের মেয়ে, তবে অসতী। বেআবরু সমতল পিঠে পুরানো বাদামি রঙের আবরণটা চোখেই পড়তে চায় না, প্রাচীনতার ছাপ এত বেশি।

দোতলা বাড়ি বটে, একতলা-দোতলায় কিন্তু সিঁড়ি ব যোগাযোগ নেই। তিনটি সদর দরজার ডাইনেরটি দিয়ে ঢুকলেই খাঁচাবন্দী দোতলার সিঁড়ি। অকারণ নড়াচড়ার একটু স্থান অবশ্য আছে, কিন্তু সিঁড়ি বেয়ে দোতলায় ওঠা অথবা পথে ফিরে-যাওয়া ছাড়া যাওয়ার উপায় নেই কোনো দিকেই। দোতলায় থাকেন ইতিহাসের প্রফেসর, সদর দরজাটির পাশে ছোটো পিতলের ফলকে যিনি এম এ। একতলায় থাকেন জ্যোতিষার্ণব, বাকি দুটি সদর দরজার উপরে কাঠের ফ্রেমলাগানো রঙিন টিনের মস্ত স্ট্রনবোর্ডে যিনি প্রথিতযশা। দুটি দরজাই একটি ঘরের, যার বেশিব ভাগ জ্যোতিষার্ণবের গণনালায়, বাকিটুকু অন্দরের প্যাসেজ। তিনটি সদর দরজার মাঝেরটি দিয়ে ঢুকলেই ডাইনে দোতলার সিঁড়ি-আড়াল-কবা দেয়াল আর বাঁয়ে দুটি বই-ভরা আলমারির বেআবরু পিঠ। এগিয়ে এগিয়ে যখন অন্দরের দবজা ডিঙিয়ে জ্যোতিষার্ণবের আবছা অঙ্ককাব সীতসেঁতে অন্দরে পদার্পণ না করে প্রায় আর উপায় থাকে না, তখন দেখা যায়, আলমারিব দেয়াল একেবারে অন্দরের দেয়ালে গিয়ে ঠেকেনি, ফাঁক আছে হাতখানেক। এই ফাঁকটুকু দিয়ে জ্যোতিষার্ণব নিজে আর তার নিজের লোক অন্দর থেকে গণনালায়ে যাতায়াত করে।

বাইরের লোক আসে তিন নম্বর সদর দরজা দিয়ে। এসে ডবল চৌকির ময়লা ফরাশেই হোক আর অয়েলক্রথ-মোড়া টেবিলেব সামনে কাঠেব চেয়াবেই হোক, বসে। বসে চারিদিকে তাকায়, বিশ্বাস-অবিশ্বাস শ্রদ্ধা-অশ্রদ্ধা আশা-নিবাসাব ভারে বিব্রত চোরের মতো। যা চোখে পড়ে তাই মনকে নাড়া দেয়, দেয়ালেব টিকটিকি পর্যন্ত। সস্তা মেয়েমানুষ যেন সমস্ত পরপুরুষের দৃষ্টি নিয়ে নিজের সমালোচনা কবছে, আমার কী উপায় হবে ?

আসলে, এ ছাড়া প্রশ্নও নেই জগতে। সব কিছুতে এই সমস্যা ছাপ মারা। ভবিষ্যৎ কি সব কিছুকে গ্রাস করে নেই ?

জ্যোতিষার্ণবের কপালে চন্দনের ফোঁটা দেবার সময় তার ছেলেমেয়ের মা মাথা কাত করে, চোখ উলটে দেয়, মোটা আলগা ঠোঁট দুটিকে টান করে হাসে। জ্যোতিষার্ণবের অপরাধ, সাতবছর আগে এই ভঙ্গি তাকে ভুলিয়েছিল। তবে, কেবল ভঙ্গি নয়। সেই সঙ্গে জিজ্ঞাসাও করে, আমি মরলে তোমার কী উপায় হবে ?

জিজ্ঞাসা করে সকালবেলা আর মবে যায় সেই সন্ধ্যার কাছাকাছি সময়ে, তবু মনে হয় প্রশ্নটা জিজ্ঞাসা করেই যেন সে মরে গেল।

অতীত বর্তমান ভবিষ্যৎ যার নখদর্পণে, সেও বুঝতে পারে না ব্যাপারখানা কী। তার ছেলেমেয়ের মা মবণের কথা বলবে মনে করার আগেই মাথার উপর কড়িকাঠে যে টিকটিকিটার

লেজ নড়তে আরম্ভ করেছিল, তার ছেলেমেয়ের মা মরণের কথা বলার পরে সেই টিকটিকিটাই যে আরেকটা টিকটিকিকে তার ছেলেমেয়ের মা হতে ডেকেছে, এইটুকু কেবল জ্যোতিষার্ণব জানে না। কিন্তু তাতে কী এসে যায় ? আর সব তো তার জানা আছে, যা কিছু মানুষের জানা দরকার। ওই জ্ঞানটুকু লাভ করলেই কী তার মনের এ ধাঁধা মিটে যেত যে, তার ছেলেমেয়ের মা মরবে বলে টিকটিকিটা ডেকেছিল, অথবা টিকটিকিটা ডেকেছিল বলেই তার ছেলেমেয়ের মা মরে গেছে ?

ছেলেমেয়েরা ছোটো। বড়ো ছেলেটি প্রথম ভাগের বানান শেখে, ছোটো ছেলেটি শেখে কথা বলতে। এদের মাঝখানেরটি মেয়ে, বোবা বলে সে কথা বলতে শেখেনি। মার সম্বন্ধে তাই প্রশ্ন করে শুধু বড়ো ছেলেটি।

মা কোথায় গেছে বাবা ?

স্বর্গে।

বলে প্রমাণের জন্য জ্যোতিষার্ণব কান পেতে থাকে। টিকটিকি বাড়িতে আট-দশটার কম নয়, কিন্তু একটাও জ্যোতিষার্ণবের কথায় সায় দেয় না। নিজের ভুল বুঝতে পেরে নিজেকে বোকা মনে করার লজ্জায় কবুণভাবে একটু হেসে জ্যোতিষার্ণব নিজে নিজেই কয়েকবার মাথা নাড়ে। স্বর্গে যদি গিয়েও থাকে তার ছেলেমেয়ের মা, এতদিনে সেখানে পৌঁছে গেছে। অতীত ঘটনার সঙ্গে কী সম্পর্ক টিকটিকির যে তার ছেলেমেয়ের মা স্বর্গে গেছে সে এ কথা বললে সঙ্গে সঙ্গে সায় না দিয়ে টিকটিকি থাকতে পারবে না ? তা ছাড়া, স্বর্গে যাওয়া-না-যাওয়া তো জীবনের ঘটনা নয় মানুষের। মরে মানুষ যে স্বর্গে যায় ইহলোকে কি সে স্বর্গ আছে ? স্বর্গই নেই ইহলোকে !

মনে মনে এত গভীর ও জটিল যুক্তিতর্ক নাড়াচাড়া করেও কিছু সন্দেহ যায় না। তাব ছেলেমেয়ের মা স্বর্গে যায়নি বলেও তো চূপ করে থাকতে পারে ত্রিকালদর্শী টিকটিকিগুলি ? স্বর্গে গিয়ে থাকলে অন্যগুলি না হোক, যে টিকটিকিটা তার ছেলেমেয়ের মার মৃত্যুর কথা ঘোষণা কবেছিল, সেটা অন্তত একবার ডেকে উঠত। হোক না অতটুকু জীব, একবার যে অতখানি জ্ঞানের পরিচয় দিয়েছে তার কি এতটুকু কাণ্ডজ্ঞান নেই ? জ্যোতিষার্ণবের বিপদ এই সে জানে তার ছেলেমেয়ের মার স্বর্গে যাওয়া নিষেধ। অবিবাহিত বউদের জন্য স্বর্গ নয়। কিন্তু কুমারী জীবন থেকে একজন পুরুষের সঙ্গে যারা জীবন কাটিয়ে দেয় তাদের জন্যও কি স্বর্গে যাওয়ার কড়া ব্যবস্থা একটু শিথিল হয় না ? তার ছেলেমেয়ের মার পারলৌকিক জীবন সম্বন্ধে এইটুকুই আশা-ভরসা জ্যোতিষার্ণবের।

মার জন্য ছোটো ছেলেটা ককায়। মেয়েটা বোবাকামা কাঁদে। বড়ো ছেলেটা কাঁদে আর জিজ্ঞাসা করে, মা কোথায় গেছে বাবা ?

জিজ্ঞাসা করে গণনালয়ে, তিনজন ক্লায়েন্টের সামনে। জ্যোতিষার্ণব দেয়ালে টাঙানো যোগিনীচক্রের পাশে নিষ্পন্দ টিকটিকিটার দিকে একবার তাকিয়েই উঠে দাঁড়ায়। ক্লায়েন্টদের সবিনয়ে বলে, একটু বসুন, আসছি।

বলে ছেলেকে নিয়ে অন্দরে শোবার ঘরে ঢুকে দেয়ালে আর সিলিং-এ ব্যাকুল দৃষ্টিতে খুঁজে বেড়ায় তার টিকটিকিকে। সে দিন ঘরে যা কিছু ছিল আজও তার সবই আছে, কেবল নেই শৃঙ্খলা আর সেই টিকটিকিটা। শৃঙ্খলা সতাই নেই, শৃঙ্খলা লুকিয়ে থাকে না, কিন্তু টিকটিকি তো ফাঁকে-ফাঁকরে জিনিসপত্রের আড়ালে অনায়াসে লুকিয়ে থাকতে পারে, অতটুকু জীব টিকটিকি ? একটু আশঙ্ক হয় জ্যোতিষার্ণব। ছেলেকে বলে, কী বলছিলি তুই খোকা ?

বাপের কোলে উঠে ছেলের মন এতক্ষণে শান্ত হয়েছে।

কখন বাবা ?

আপিসে ঢুকে কী বললি না আমাকে ?

কিছু বলিনি তো।

ছোটোবোন আর ভাইটি বাপের যে লোমশ বুকখানায় আজকাল রাজত্ব করে, সেখানে উঠে স্মৃতিভ্রংশ হবার বয়স খোকার পার হয়ে যায়নি। তবে বয়সের তুলনায় ওজনটা তার হয়েছে অস্বাভাবিক। ছেলেকে জ্যোতিষার্ণব মেঝোতে নামিয়ে দেয়। মদুস্বরে সস্তপর্ণে বলে, তোর মার কথা কী জিজ্ঞেস করলি না ?

মা কোথায় গেছে বাবা ?

বোমা নিয়ে খেলা করবার মতো অসহায় সাহসের সঙ্গে জ্যোতিষার্ণব বলে, নরকে। বলে কান পেতে থাকে। কানে আসে ছোটো ছেলেটার কান্না, দোতলায় ইতিহাসের প্রফেসরের স্ত্রীর হঠাৎ গাওয়া দু লাইন গান, রাজপথের চটুল ফাজলামি।

বড়ো ছেলেটা বাপের মুখ দেখেই বোধ হয় কেঁদে উঠবার উপক্রম করেছিল।

জ্যোতিষার্ণব চোখ রাঙিয়ে বলে, কাঁদিস না।

খোকা কাঁদে না।

শোন, আমি ভুল বলেছি। তোর মা এখনও নরকে যায়নি, যাবে। বুঝলি? যাবে, ভবিষ্যতে যাবে।

আবার জ্যোতিষার্ণব কান পেতে থাকে। বড়ো ছেলেটা কেঁদে-ওঠা মাত্র হাত চাপা দেয় তার মুখে। কানে আসে ছোটো ছেলেটার থেমে-আসা ছাড়া-ছাড়া কান্না, দোতলায় ইতিহাসের প্রফেসরের থেমে-আসা দুলাইন গানের দুর্বোধ্য গুনগুনানো সুর, রাজপথের চটুল ফাজলামি আর টিকটিকির ডাক।

সেই টিকটিকিটার নয়। সে যাকে সেদিন তার ছেলেমেয়ের মা হতে ডেকেছিল, সেটার। দুটি টিকটিকির আকারে, চামড়ার রঙে, চালচলনে পার্থক্য অবশ্য আছে অনেক, কিন্তু সব টিকটিকিরই এক রা।

মনে যার ব্যথা থাকে তার শখ চাপে মনের কথা বলবার। মনের ব্যথা যে মনকে কামড়ায় এটা তার একটা লক্ষণ। ছেলেমেয়ের মা যার নরকে যাবে, মনে তার ব্যথা থাকা স্বাভাবিক। জ্যোতিষার্ণব তাই হাত দেখাতে, ঠিকুজি মেলাতে, ভাগ্য গণাতে, মাদুলি-কবচ বিধান-ব্যবস্থা নিতে, পূজা-পার্বণ, শান্তি-স্বস্ত্যয়ন নির্বাহের আহ্বান জানাতে যারা আসে, তাদেরও যেমন মনের কথা বলে, শুধু দেখা করতে যে বন্ধুরা আসে তাদেরও তেমনই মনের কথা বলে। জ্যোতিষ-বচনের মতো মনের কথা বলার কথা তার প্রায় মুখস্থ হয়ে গেছে। এ যুগের মানুষের অ বিশ্বাসপ্রবণতা দিয়ে আরম্ভ করে চোখে আঙুল দিয়ে দেখিয়ে দিলেও যে কেউ কিছু বিশ্বাস করতে চায় না, এ পর্যন্ত আসতে আসতে জ্যোতিষার্ণবের মুখ বড়ো বিমর্ষ হয়ে যায়। গভীর আর্ত বিষাদের ছাপ। তা ছাড়া গলাও কাঁপে। ফরাশে বা চেয়ারে যেখানেই তার শ্রোতা বসে থাক, কথার চেয়ে কথার সুর আর জ্যোতিষার্ণবের চেয়ে তার মুখের ভাব শ্রোতাকে বিচলিত করে বেশি। জ্যোতিষার্ণবের ভঙ্গামিতে আর যেন বিশ্বাস থাকে না, অন্তত তখনকার মতো।

প্রমাণ ? বিশ্বাসের জন্য প্রমাণ চাই? আমার নিজের জীবনেই কত বড়ো বড়ো প্রমাণ ঘটেছে। এই তো সেদিন আমার স্ত্রী মারা গেলেন, আমি কি জানতাম না ঠিনি ওই দিন ওই সময় মারা যাবেন ?

জানতেন ?

গণনালয়ের টিকটিকিটা সব সময় নিজেকে প্রকাশ করে রাখে। হস্তরেখার প্রকাশ ম্যাপ, রাশিচক্র, বর্ষচক্র, পতাকীচক্র, যোগিনীচক্রের ছবি সুকেশিনীর ছবিযুক্ত কেশতৈলের দেয়ালপঞ্জি-বিজ্ঞাপন, দেয়ালে-বসানো তাক, জানালার চতুষ্কোণ গহ্বর, ফাঁকা দেয়াল, ছাদ, কড়িবর্গার আড়াল, সমস্ত জায়গা পাঁতিপাঁতি করে খুঁজে তাকে আবিষ্কার করতে হয় না, এদিক ওদিক একটু তাকালেই

নজরে পড়ে। জ্যোতিষার্ণব খানিকক্ষণ আনমনে তাকিয়ে থাকে টিকটিকিটার দিকে, তার পর মাথা হেলিয়ে বলে, প্রথমে জানতাম না। নিজের লোকের মৃত্যুর দিন গণনা করতে নেই, মানুষের মন তো, মন বিচলিত হয়ে পড়ে। সেদিন সকালবেলা হল কী, তামাশা করে আমায় বললেন, আমি মরে গেলে তোমার কী উপায় হবে? মানে, সংসার তো এক রকম চালাতেন তিনি, তাই হঠাৎ পরিহাস করে বললেন আর কী যে, তিনি যদি মরে যান এ সব কাজকর্মই বা কে করবে, ছেলেমেয়ে মানুষই বা কে করবে। যেই বললেন কথাটা, সঙ্গে সঙ্গে একটা টিকটিকি ডেকে উঠল।

টিকটিকি ?

হ্যাঁ, টিকটিকি। মনে কেমন খটকা বাধল। হস্তরেখা বিচার করে ওর বয়স জিজ্ঞেস করলাম। বয়স অবশ্য আমি জানতাম, বিয়ের সময় থেকেই জানতাম, তবু জিজ্ঞেস করলাম। তারপর বললাম, তোমার কুষ্টিটা বার করো তো, কালো তোরঙ্গের তলায় আছে। উনি হাসতে হাসতে কুষ্টি বার করে দিলেন। তখনও আমার মন বলছে, থাকগে কাজ নেই, মরণ যদি ওর ঘনিয়ে এসে থাকে, কী হবে আগে থেকে জেনে? লাভ তো কিছুই হবে না, মাঝখান থেকে কিছুদিন অতিরিক্ত মনঃকষ্ট ভোগ করব। কিন্তু শেষ পর্যন্ত গণনা না করে পারলাম না। গণনাব ফল দেখে মাথা ঘুরে গেল। সেদিন গোমূলি বেলা পর্যন্ত ওর আয়ু। ওঁর দিকে তাকিয়ে মনে হল যেন একটা শবের দিকে তাকিয়ে আছি, ঠিক পিছনে আবছা মতন—

শ্রোতা স্তব্ধ। গলা শুকিয়ে গেছে। ভয়ে নয়, প্রকৃত তৃষ্ণায়। কিন্তু এখন জল চাওয়া যায় না।

জানতাম কোনো লাভ নেই, ওঁর বাবা ছিলেন পরম নিষ্ঠাবান সত্যবাদী পাণ্ডিত, তবু একবার জিজ্ঞাসা করলাম, বিয়েব সময় তোমার বয়স তো দু-একবছর কম করে বলা হয়নি? কুষ্টি ঠিক আছে তো? বিয়ের সময় যদি—থাকগে ও সব কথা। আপনাকে যা বলছিলাম, পার্শ্বমুখ নক্ষত্র—

নয়টি পার্শ্বমুখ নক্ষত্রের একটির নাম রেবতী। ছমাস পরে জ্যোতিষার্ণব ছেলেমেয়েদের মানুষ করার জন্য রেবতীকে বিয়ে করে আনে। মরে গেলে স্বর্গে যাবার অধিকার নিয়েই বেবতী এ বাড়িতে আসে বটে, বাড়িতে কিন্তু একটিও টিকটিকির দেখা সে পায় না।

তবু, সাবধানের মার নেই ভেবে জ্যোতিষার্ণব বউকে সতর্ক কবে দেয়, দ্যাখো, কোনোদিন মরার কথা মুখে এনো না।

রেবতী তখনও পার্শ্বমুখী, সোজা জ্যোতিষার্ণবের মুখের দিকে তাকাতে পারে না। জ্যোতিষার্ণব হরদম তাকায়। নিজে যোটক বিচার করে সে রেবতীকে বিয়ে করেছে। বিপদ দুজনের নক্ষত্র নিয়ে। তার নিজের শতভিষা নক্ষত্র আর রেবতীর উত্তরভাদ্রপদ নক্ষত্র তাদের মিলনকে করেছে রাফস ও নরের মিলনের মতো।

এখন এই যে জ্যোতিষার্ণব, আমি এর জীবনে উদিত হয়েছিলাম, কী এই আমার জীবনে উদিত হয়েছিল, আজও আমি এ সমস্যার মীমাংসা করতে পারিনি।

কত আর বয়স তখন আমার হবে, রেবতীর চেয়ে অনেক ছোটো। কিছুদিনের জন্য থাকতে গিয়েছি ইতিহাসের প্রফেসরের বাড়ি, কী ভীষণ ভাবটাই যে হয়ে গেল রেবতীর সঙ্গে। বয়সের তুলনায় কী প্রকাশ তখন আমার দেহ, কত পরিণত মন,—কারও স্ত্রীর সঙ্গে ভাব হওয়াটাই তখন আমার পক্ষে পরমাশ্চর্য। অথচ রেবতীর সঙ্গে সারাদিন এত বেশি কড়ি আর তাস খেলতাম যে ইতিহাসের প্রফেসরের স্ত্রী অভিমানে আমার সঙ্গে ভালো করে কথাই বলত না।

তাতে আমার সুবিধাই ছিল। আমায় যে ভালোবাসে তার সঙ্গে কথা বলতে আমার বড়ো কষ্ট হয়। মনে হয়, শব্দ দিয়ে অনেক দামি কী যেন আদায় করে নিচ্ছি।

আমি রেবতী'ব সঙ্গে কড়ি খেলি, জ্যোতিষাৰ্ণ'ব দু'বার ঘুরে গিয়ে তৃতীয়'বার কাছে এসে উ'বু হয়ে বসে।

দেখি হে ছোকরা, তোমার হাতটা। আরে বাস রে, এ কী হাত, এত হিজিবিজি রেখা পেলে কোথায় ? ভাল করে দেখতে হবে তো হাতটা তোমার। বাঁচবে অনেকদিন, তবে—

রেবতী আমার হাত কেড়ে নেয়।

খুব হয়েছে, ছেলেমানুষকে ভয় না দেখালেও চলবে।

অন্দর থেকে বেরিয়ে যাবার সময় গণনালায়ে জ্যোতিষাৰ্ণ'ব আমায় পাকড়াও করে, শোনা'য় ভূতে'ব গল্প। প্রথমে কান দিয়ে আরম্ভ করে শেষে লোমকৃ'পগুলিকেও শোনার কাজে লাগিয়ে দিই। ক্ষুধা'তৃষ্ণার তাগিদটা চাপা পড়ে যায়, তাকিয়ে দেখি রেবতী এসে আলমারির পাশের ফাঁকটাতে দাঁড়িয়ে আছে।

জ্যোতিষাৰ্ণ'বে'ব গল্প শেষ হতে বলি, আরেকটা।

রেবতী ম্লান মুখে চূপ করে থাকে।

জ্যোতিষাৰ্ণ'ব হাসির ভান করে বলে, এ বাড়ির টিকটিকি'গুলি যদি মেরে ফ্যালো, তা হলে বলব। একটা টিকটিকির জন্যে একটা গল্প। এ ঘবেই তো তিনটে আছে, লাঠিটা দিয়ে মার না একটা ?

আমি বলি, লাঠি দিয়ে বুঝি টিকটিকি মা'বে ? দাঁড়ান, আমার তির-ধনুক নিয়ে আসি।

রেবতী বলে, মানিক, মে'বো না, টিকটিকি মা'বতে নেই।

আমি একটু দাঁড়াই। হিসাব করে দেখি যে, রেবতী'ব মতো মেয়ে যখন এক'বার আমাকে ভালোবেসেছে, কথা না শুনলেও ভালো না বেসে সে পা'বে না, আমার সঙ্গে কড়ি আর পা'তাবিস্তি খেল'বার জন্যে সে যে ব'কম পাগল হয়ে উঠেছে, সে পাগলামি যা'বাব নয়। গল্প না বলে আমায় কষ্ট দে'বার সুযোগ পেলে জ্যোতিষাৰ্ণ'ব কিন্তু কিছুতেই সে সুযোগ ছাড়বে না। সোজা দো'তলায় গিয়ে আমা'ব বাঁশের ধনুক, আ'ব শ'রে'ব তির নিয়ে আসি। তির আমার সাংঘাতিক মার'ণাস্ত্র, উ'গায় দুটি আলপিন বসানো আছে।

এককোণে একটা টিকটিকি ছিল, ফরাশে উঠে দাঁড়ালে আমার তি'বে'ব আঘাতে আসে এই'বকম স্থানে। নিস্পন্দ শরীর, নিস্পন্দক চোখ, ধূসর জীবটিকে দেখলেই মায়া হয়।

রেবতী আ'বাব বলে, মানিক, মে'রো না, মা'বতে নেই।

রেবতীকে আমি ত্যাগ করিনি, কিন্তু তা'ব কথার কোনো দাম আমার কাছে নেই। আকর্ষণ সন্ধান ক'বে চার ইঞ্চি তফাত থেকে বাণ নিষ্ক্ষেপ ক'বি। এমন আশ্চর্য জীব টিকটিকি যে শিকা'বিকে গায়ে'র ওপ'র হুমড়ি খেয়ে পড়তে দেখলেও নড়ে না।

বাণবিদ্ধ টিকটিকি নীচে পড়ে যায়। বাণটি টেনে খুলে নিয়ে দেখি, দুটি আলপিন বিঁধে টিকটিকিটার চোখের পাশে দুটি রক্তের ফোঁটা জমেছে—যেন নূতন দুটি চোখ। মানুষের রক্তের মতো লাল রক্ত টিকটিকির নয়—

জ্যোতিষাৰ্ণ'ব হাসি চেপে হাসতে আরম্ভ করে।

চারচোখো করে দিলে ! টিকটিকি'কে চ'বচোখো ক'বে দিলে ! তোমাকেও চারচোখো হতে হবে মানিক।

সঙ্গে সঙ্গে দেয়ালে কোথায় যেন একটা টিকটিকি ডেকে ওঠে। কে জানে বাণবিদ্ধ টিকটিকির সঙ্গে তার কী সম্পর্ক ! ছেলেমেয়ের বাপ-মা হ'বাব জন্যে তারা যদি পরস্পরকে কোনোদিন ডাকাডাকি করে থাকে, সে খ'বর কেবল তারা'ই জানে।

রেবতী নশ্ হর মতো জুলজুলে চোখে তাকিয়ে বলে, ফের ? ফের ছেলেমানুষকে ভয় দেখাচ্ছ ? বলে জ্যোতিষাৰ্ণ'বে'ব গম্ভীর মুখের দিকে চেয়ে নিজে'ই ভয়ে মু'ষড়ে যায়।

স্কুলে বোর্ডের লেখা দেখতে না পাওয়ার একমাসের মধ্যে আমাকে চশমা নিতে হয়। চশমা চোখ নয়, কিন্তু বন্ধুরা আমায় চারচোখো বলে কত যে তামাশা করে ঠিক নেই।

তারপর ইতিহাসের প্রফেসরের বাড়িতে আমি কোনোদিন যাইনি। চারচোখে রেবতীকে একবার চোখেও দেখিনি। রেবতীর কথা মনে হলেই সেই বাণবিদ্ধ টিকটিকিটার দুটি ধূসর চোখ, তার চোখ দুটির পাশে দুটি ফ্যাকাশে রক্তবিন্দুর ছবি মনে ভেসে আসে, দাবুন বিতৃষ্ণায় আমার মন ভরে যায়। রেবতীর প্রতি বিতৃষ্ণা,—রেবতীর কোনো দোষ ছিল না, তবু।

হয়তো রেবতী জ্যোতিষার্ণবের ছেলেমেয়ের মা হয়েছে। হয়তো টিকটিকির জন্য জ্যোতিষার্ণবের প্রথম ছেলেমেয়ের মা স্বর্গে যেতে না পারলেও, টিকটিকির জন্যই রেবতীর স্বর্গে যাবার পথ বন্ধ হবার বিপদ কেটে গিয়েছে এবং স্বর্গে যাবার প্রতীক্ষায় সে পৃথিবীতেই স্বর্গসুখ ভোগ করছে।

এদিকে আমার বেড়েছে চশমার পাওয়ার। কখনও দেয়ালের টিকটিকি না দেখবার ইচ্ছা হলে আমার চোখ বুজতে হয় না—চশমাটা খুলে ফেললেই চলে।

বিপত্নীক

কার্তিকের কুয়াশাচ্ছন্ন প্রভাত। ঘুম ভেঙে আমি প্রকাশ একটা হাই তুললাম। কাল রাত্রে গাঢ় ঘুম হয়েছে। চোখ মেলে ঘরের সিলিং-এ কালো কড়িকাঠটার পাশে একটা টিকটিকিকে আবিষ্কার করে খানিকক্ষণ অলস অর্থহীন দৃষ্টিতে সেদিকে চেয়ে রইলাম। আজ রবিবার, উঠবার তাড়া নেই। আর ঘুমানো যাবে না বটে, কিন্তু চূপচাপ আরও ঘণ্টাখানেক বিছানায় পড়ে থাকার কল্পনাতেই প্রচুর তৃপ্তি বোধ করলাম।

বিছানার ডানদিকের অংশটা খালি। সবিতা সকালে কখন বিছানা ছেড়ে উঠে যায়, আমি কোনোদিনই প্রায় তা জানতে পারি না। আমার ঘুম ভাঙতে ভাঙতে সবিতার বাসনমাজা শেষ হয়ে রান্না চেপে যায়। অত ভোরে কী করে যে মানুষ ওঠে ! ভোরবেলা বিছানায় শুয়ে থাকার আরামটুকু থেকে প্রত্যেকদিন নিজকে বঞ্চিত করেও সবিতাকে বেশ খুশিই দেখতে পাই। মুখ ধুয়ে উঠতে না উঠতে চা জলখাবার এনে দিয়ে সে যে কথাটি বলে, তাতে বোঝা যায়, রাত্রির অঙ্ককার কেটে যাওয়ার পর এক মিনিট চিত হয়ে জেগে পড়ে থাকার মতো কষ্টকর ব্যাপার, সবিতার মতে, জগতে আর নেই।

ডান হাতটি আলস্য ভাঙার ভঙ্গিতে বিছানার শূন্য অংশে প্রসারিত করে দিলাম। সবিতার অঙ্গের উত্তাপ উপে গিয়ে বিছানা ঠান্ডা হয়ে আছে।

হঠাৎ আমার মনে পড়ে গেল, কাল রাত্রে সবিতার সঙ্গে ঝগড়া করেছিলাম।

এতক্ষণ এ কথাটা একেবারেই ভুলে গিয়েছিলাম। মনে পড়ামাত্র রৌদ্রহীন শীতল প্রভাতে সমস্ত রাত্রিব্যাপী গাঢ় নিদ্রার জের টেনে চলার আনন্দ এক মুহূর্তে নিঃশেষ হয়ে গেল। আরামে এলানো অঙ্গপ্রত্যঙ্গ নিজের অজ্ঞাতেই গুটিয়ে সংকুচিত করে নিলাম।

কী কটু কলহই কাল আমরা করেছিলাম !

আমরা করেছিলাম ? কথাটা বিবেচনা করে দেখবার সময় না নিয়ে খুব সংক্ষেপেই নিজেকে জবাব দিলাম,—না। ঝগড়া বলি, কলহ বলি, কাল আমি একাই সব করেছিলাম। মাঝে মাঝে ক্ষীর্ণ কবুণ প্রতিবাদ করে কঁাদা ছাড়া সবিতা তাতে আর কোনো অংশগ্রহণ করেনি। কাল আমাদের মধ্যে যে ব্যাপার ঘটেছিল, চাপড়া চাপড়া রং চড়িয়েও তাকে দাম্পত্য কলহ কোনোমতেই বলা যায় না।

সবিতাকে কাল আমি করেছিলাম শাসন।

মনের মধ্যে তীব্র বিদ্বেষ নিয়ে অত্যন্ত হিংস্রভাবেই ওকে কাল আক্রমণ করেছিলাম। যা মুখে এসেছে অবাধে কাল তাই সবিতাকে বলেছিলাম। যে বিশেষণ যত বেশি বৃঢ় যত বেশি কদর্য মনে হয়েছে তাই দিয়ে ওকে অভিহিত করে কাল আমার আনন্দ হয়েছে তত বেশি। মেয়েদের একেবারে মর্মে গিয়ে আঘাত করে মানুষের ভাষায় এমন শব্দ যত আছে তার একটিও কাল বোধ হয় ব্যবহার করতে বাকি রাখিনি। শেষে রাগ সামলাতে না পেরে পায়ের এক পাটি চটিজুতো ওকে ছুড়ে মেরেছিলাম।

সেইখানেই ইতি। দুহাতে চোখে আঁচল চাপা দিয়ে সবিতা তখন কঁাদছিল। চটিটা সজোরে তার কান্নায় ফুলে-ওঠা বুকে গিয়ে লাগল। চোখ থেকে আঁচল সরিয়ে সবিতা তখন একবার জুতোটার দিকে একবার আমার মুখের দিকে তাকিয়েছিল। দুচোখ তার জলে ভরপুর, সবিতা

কী দেখেছিল বলতে পারব না। কিন্তু তার মুখে যে ভাব দেখেছিলাম এখনও আমার স্পষ্ট মনে আছে।

তবু, রাত্রে গাঢ় ঘুম হতে বাধা হয়নি। সবিতাকে শাসন করার জন্য না হোক, জুতা খেয়ে তার অবর্ণনীয় মুখভঙ্গি দেখার জন্যও না হোক, যে কারণে কাল ও রকম খেপে গিয়ে স্ত্রীকে শাসন করেছিলাম সারারাত কষ্টকশয়্যায় তাকে জাগিয়ে রাখার পক্ষে তাই কি যথেষ্ট ছিল না ? এইমাত্র মনের মধ্যে যে নিবিড় শান্তি অনুভব করছিলাম তা স্মরণ করে অবাধ হয়ে গেলাম স্ত্রীর চরিত্রে সন্দেহ করে যে স্বামী রাত্রে স্ত্রীকে চটিজুতো ছুঁড়ে মারে, সারারাত অঘোরে ঘুমিয়ে সকালে চোখ মেলেই কী কবে সে অত আরাম বোধ করে ? পৃথিবীতে শীতের আমেজ এসেছে টের পেয়ে উল্লসিত হয়ে ওঠে ?

ঘুম ভেঙেই আমার অনুতপ্ত হয়ে ওঠা উচিত ছিল। কাল বাড়াবাড়ি করেছিলাম বইকী ! নিছক একটা সন্দেহের উপর অত কাণ্ড করার কোনো সমর্থনই শাস্ত মনে কথাটা ভেবে দেখতে গেলে খুঁজে বার করা যায় না। স্ত্রীকে অবশ্য মাঝে মাঝে শাসন করা ভালো। বড়ো পাজি জাত। কেবল আদব দিলে একেবারে মাথায় উঠে যায়। কিন্তু শাসনের যে একটা মাত্রা থাকা দরকার, এটা অস্বীকার করব কেন ? সবিতাকে তো কম ভালোবাসি না। এই যে দশটা থেকে পাঁচটা অবধি আপিসে কলম পিষে মরি, সে কার জন্য ? সবিতার জন্য নয় কি । ওর ভালোব জন্মই ওকে মাঝে মাঝে শাসন করা প্রয়োজন। কাল কিছু না বলে চুপ করে থাকলে শেষ পর্যন্ত ওবই তো ক্ষতি হত ! নিজেব ভালোমান্দ মানুষ সব সময় বুঝতে পাবে না। বিশেষত মেয়েমানুষ। ভুলত্রুটি দেখিয়ে দিলে, ভুল সংশোধনের জন্য একটু বকলে তাতে ওদের মঞ্জলই হয়।

কিন্তু অতটা না করলেই হত। অস্তুত ঘুমিয়ে পড়ার আগে সহজভাবে ওর কাছে এক গ্লাস জলটল চেয়ে নিয়ে অথবা পা কামড়াচ্ছে বলে দু-চার মিনিট ওকে একটু সেবা করতে দিয়ে ব্যাপাবটা স্বাভাবিকতার স্তরে নামিয়ে আনলে কোনো ক্ষতিই ছিল না।

পাশ ফিরলাম। তাকিয়ে দেখি, সবিতাকে ছুঁড়ে মারা জুতোব পাটিটা কাল বারো যেখানে পড়েছিল, সেইখানেই এখনও পড়ে আছে। মনে হল, এতক্ষণ আমার যেন সত্যসত্যই একটু অনুতাপ হচ্ছে।

কিন্তু সাস্তুনা খুঁজে নিতেও দেরি হল না। যা হবাব হয়ে গিয়েছে। হাত থেকে খসে-যাওয়া টিল আর মুখ থেকে খসে-যাওয়া কথাব মতো আব ফিরবে না। দুঃখ বা অনুতাপ করে লাভ নেই। শূয়ে শূয়ে আরাম কবাটা আজ আব কপালে হল না। উঠে গিয়ে সবিতাকে একটু খুশি করতে হবে।

সবিতাকে একটু খুশি করার জন্য কী পদ্ধতি অবলম্বন করব শূয়ে শূয়ে তাই ভাবতে লাগলাম। ক্ষমাটমা চাইতে পারব না। স্ত্রীর কাছে দুঃখ প্রকাশ, মার্জনা ভিক্ষা,—এ সব আমার ধাতে নেই। ভাবলেও কী রকম সংকোচ বোধ হয়, বাধোবাধো ঠেকে। কাল রাত্রে কথটা উত্থাপনই করব না। কাল যেন সবিতাকে কিছু বহি-নি এমনই একটা অভিনয় করে যাব। প্রতিদিন যেমন চটি ফটবফটর করে নীচে নামি আজও তেমনই শব্দ করে নীচে নামব, কলতলায় গলা খাঁকারে মুখ ধোব। সাড়া পেয়ে উনান থেকে হাঁড়ি নামিয়ে সবিতা চায়ের কেটলি চাপিয়ে দেবে কিন্তু মুখ ধুয়ে আজ আর দোতলায় উঠে যাব না। একেবারে রান্নাঘরে হাজির হয়ে নিজেই একটা আসন টেনে নিয়ে বসব। গস্তীর মুখে নয় মুখখানা বেশ হাসি-হাসি করে। সবিতা বিষন্নতা ও অভিমানে নিজেকে আচ্ছন্ন ও নির্বাক করে সামনে খাবার দিলে খেতে খেতে এ কথা বলব, সে কথা বলব। সবিতা ভালো কবে জবাব না দিলেও কিছুই যেন লক্ষ করিনি এমনইভাবে নিজের কথার স্রোতকে অব্যাহত রেখে যাব।

সবিতা প্রথমটা নিশ্চয় একটু অবাক হয়ে যাবে। ভাববে, ব্যাপারখানা কী ? কাল রাতে আমাকে অমন করে যে গাল দিলে, সে সেধে এসে এত কথা কইছে ! তারপর একসময় সে বুঝতে পারবে তার গভীর অপরাধ স্বামী তার এবারের মতো ক্ষমা কবেছে। কাল রাত্রে ব্যাপার কাল রাত্রেই চুকে গিয়েছে—আজ সকালে তার জেব নেই। এটা বুঝতে পাবে সবিতাও ক্রমে ক্রমে সহজভাবে কথা বলতে আশঙ্কিত কবে। রাগ করে থাকার যার উপায় নেই, রাত্রে শাসন সকালে উঠে নতুন করে আশঙ্কিত করলেও যার বলার কিছু ছিল না, নিজে থেকে তাকে যেচে সহজভাবে কথা বলা সহজভাবে চলাফেরা করার সুযোগ দেওয়ার জন্য স্বামীর প্রতি সবিতার ভক্তি জন্মে যাবে ! ভাববে, স্বামী আমার সদর্শিব। যে অন্যায্য কবছিলাম বা করতে যাচ্ছিলাম, অন্য স্বামী হলে আমাকে একেবারে মেরেই ফেলত। আমার স্বামী একটু শাসন কবেই ক্ষান্ত হয়েছে। শুধু তাই নয়, সকালে উঠে এমনি করে আমার মান রাখল, আমার অভিনয়ের মর্যাদা দিল।

মুখে হয়তো সবিতা কিছুই বলবে না। মেয়ে তো চাপা নয় কম ! কিন্তু কৃতজ্ঞতায় তার চোখ ছলছল কবে। স্বামী প্রেমে স্বামী গর্বে তার মুখ উজ্জ্বল হয়ে উঠবে। স্বস্তি ও আনন্দ তাব গৃহকর্মের সুচারু সম্পাদনায় স্পষ্ট বৃন্দ নিয়ে ফুটে উঠবে।

উঠে বসলাম। অনুভূতি মিলিয়ে গিয়ে মন এখন খুশি হয়ে উঠেছে। কাল ব্যত্রে সবিতাকে তাব প্রাপ্যের যতটুকু অতিবিক্রম শাসন কবেছি, আজ তাব তিনগুণ সোহাগ ফিবিয়ে দেব। যে সোহাগ কবে, গণনাও তো সেই করে ! একটি মাত্র ছাড়িয়ে গেলে অন্যটি বেশি মাত্রায় দিলে ক্ষতিপূরণ হয়েও কিছু লাভ থাকতে কোনো বাধা নেই। সবিতার আজ লাভের কপাল।

এক পাটি চিটি পায়ের দিয়ে ন্যাংচাতে ন্যাংচাতে গিয়ে সবিতাকে ছুঁড়ে-মাঝা চিটিটা অন্য পায়ের লাগলাম। বাঁয়ে সবিতার ড্রেসিং টেবিল। আফনাটা! কুয়াশায় ম্লান হয়ে আছে! সবিতার এই বিলাসিতার ব্যবস্থা কবেছি আমি। সবিতার বাপ যৌতুক দেয়নি। বাপের জন্মে সবিতা ড্রেসিং টেবিল দেখেছে কিনা সন্দেহ। ডাইনেব আলনায় সবিতার রং-বেবঙের কাপড় সাজানো। কুয়াশায় কাপড়গুলির ভালো রং খোলেনি। এ সবও আমি কিনে দিয়েছি সবিতাকে, সবিতাকে ভালোবেসে কিনে দিয়েছি। সামনে বেঞ্চের উপর সবিতার বাক্সো, কাশবাক্সো, সুটকেস, হাবমনিয়াম। কুয়াশায় সবিতার এই সম্পত্তিগুলিকে কেমন যেন মন-মরা দেখাচ্ছে। সবিতার জন্য মাথার ঘাম পায়ের ফেলে উপার্জন কবা টাকায় এগুলি কেনা। চারিদিকে সবিতার প্রতি আমার উদারতার সংখ্যাতীত প্রমাণ দেখে, সবিতাকে যে অনন্যসাধারণ ভালোবাসা দিয়েছি এ বিষয়ে একেবারে নিঃসন্দেহ হয়ে, আমি আরও গভীর ভূক্তি বোধ কবলম। এতক্ষণে বুঝতে পারলাম, কাল রাত্রে পৈর্ষ হারিয়েছিলাম কেন। সবিতাকে ভালোবাসি বলে। সবিতার প্রতি প্রেম আমার এত তীব্র যে ঈর্ষাও সেই অনুপাতেই প্রচণ্ড হয়। একটা মিথ্যা সন্দেহ পর্যন্ত তাই আমাকে একেবারে খেপিয়ে দেয়।

সবিতা ঘরের দরজা ভেজিয়ে দিয়ে গেছে। দরজাটি খোলে, ঘেরা বাবান্দায়! সেও একটি লম্বাটে ঘরেরই মতো। রাত্রে এই বাবান্দায় দরজা বন্ধ করা হয়, কিন্তু ঘরের দরজাটি খোলাই থাকে। বন্ধ করার দরকার হয় না। সকালে বাবান্দায় রাত্রিভোজনেব এঁটো বাসন তুলে ধোয়ামোছার শব্দে আমার ঘুমের ব্যাঘাত হয় বলে সবিতা দরজাটি ভেজিয়ে দিয়ে যায়।

সবিতার ড্রেসিং টেবিলের আয়নায় খানিকক্ষণ নিজের মুখখানা নিরীক্ষণ করে ভেজানো দরজা খুলে বাবান্দায় গেলাম। প্রথমে চোখে পড়ল এঁটো বাসনগুলি তারপর সিঁড়ির বন্ধ দরজাটি—তারপর দৌল্যমানা সবিতাকে।

উঠানের দিকে দুটো বড়ো বড়ো খোলা জানালা দিয়ে আলো আসছিল। এক মুহূর্তে বুঝতে পারলাম সবিতা গলায় দড়ি দিয়েছে।

পাশের বসবার ঘর থেকে হালকা টেবিলটা এনে তার উপরে চেয়ার পেতেও সে বোধ হয় কড়িকাঠের নাগাল পায়নি। তাই টেবিল চেয়ার একপাশে সরিয়ে রেখেছে। ছেলে হলে যে হুক থেকে সবিতার ছেলের দোলনা দুলত, দড়ি ছুঁড়ে ছুঁড়ে সবিতা তাতে দড়ি আটকেছে বোধ হয়। কিন্তু এ কাজে যে পরিমাণ অধ্যবসায় দরকার হয়েছিল, আত্মহত্যা করতে চাওয়ার উন্মত্ততা ছাড়া, ছুঁড়ে-ছুঁড়েই সে যে কড়িকাঠে দড়ি আটকে ছিল, তারও কোনো প্রমাণ নেই। হয়তো অন্য কোনো উপায়ে এই কাজকে সে সম্ভব করেছিল। রাত্রির গাঢ় অন্ধকারে মানুষের ঘুমের আড়ালে যে মরতে যায়, বুদ্ধি হয়তো তার এমন তীক্ষ্ণ হয়ে ওঠে, অসম্ভব কাজকে সম্ভব করার এমন উপায়ই হয়তো সে আবিষ্কার করে ফেলে যে প্রত্যেকটি সকালে যারা ঘুম ভেঙে জীবিত অবস্থায় বিছানায় উঠে বসার আশা পোষণ করে, তারা সেই বুদ্ধির প্রক্রিয়াকে আবিষ্কার করার কল্পনা পর্যন্ত করতে পারে না।

গলায় ফাঁসিটা পরাবার আগে কাল সবিতা কী করেছিল জীবনে কখনও আমি তা জানতে পারব না ভাবতেও পারব না।

এই সমস্যাই যেন আমাকে বিচলিত করে দিল। সবিতা গলায় দড়ি দিয়েছে এটা বুঝতে আমার দেরিও হয়নি, অসুবিধাও হয়নি। কিন্তু কড়িকাঠের অত উঁচু হুকে সে দড়ি আটকাল কী করে, এটা বুঝতে না পেরে কাতর হয়ে পড়লাম। অসহায়ের মতো চারিদিকে তাকাতে লাগলাম। সবিতা গলায় দড়ি দিয়েছে বলে যেন নয়, গলায় দড়ি দেবার ঠিক আগের কাজটিকে সে দুর্বোধ্য ও রহস্যময় করে রেখে গেছে বলেই আমার মাথার মধ্যে বিমবিম করে উঠল। সবিতা কী করে কড়িকাঠে তার মৃত্যুর আয়োজন করল এ কথাটা আমাকে কে বুঝিয়ে দেবে ?

আত্মহত্যা করে সবিতা আমাকে সবই বুঝিয়ে দিয়ে গেল, এই একটা তুচ্ছ গোপনতার মোহ সে কাটাতে পারল না কেন ?

সবিতাকে আমি সবদিক দিয়েই চিনেছিলাম। সে কী খেতে ভালোবাসে, কোন গয়না, কী রঙের শাড়ি তার পছন্দ, কী কথা বললে সে খুশি হয়, কোন বিষয়ে মনের সংকীর্ণতাকে প্রশয় দিয়ে সে সুখ পায়, জীবনের কোন স্তরে সে অনায়াসে উদার হয়ে থাকে, এ সবই আমার জানা ছিল। সংসারে কার প্রতি তার কতটুকু মমতা আমি তার হিসাব রাখতাম। অলস কল্পনার মুহূর্তগুলি ছাড়া ওর স্বামীপ্রেমের গভীরতাও আমি নির্ভুলভাবে পরিমাপ করতে পেরেছি। সবিতা ছিল আমার অতিজানা অতিচেনা বউ।

কাল ওর সম্বন্ধে যে বিষয়ে আমার জ্ঞান ছিল না কিন্তু সন্দেহ ছিল, আজ সবিতা আত্মহত্যা করে সে বিষয়েও আমাকে পরিপূর্ণ জ্ঞান দিয়েছে। সন্দেহ আমার মিথ্যা নয় এই সত্য প্রকাশ করে যেতে গলায় সবিতা দড়ি দিয়েছে বলে আমার দুঃখ নেই। কিন্তু দড়িটা হুকে সে আটকাল কী করে ?

ছায়া

আমার প্রথমা স্ত্রীর মৃত্যুর পর কিছুদিন আমি পাগলের মতো হয়ে গিয়েছিলাম। সময়মতো স্নানাহার করতাম না, ঘরের কোণ ছেড়ে বাইরে আসতাম না, দিনরাত পরলোকতত্ত্বের বই পড়তাম আর চুপচাপ বসে আকাশ-পাতাল ভাবতাম।

স্ট্রীকে আমি এত ভালোবাসতাম যে, শ্মশানে নিজে মুখাণ্ডি করে তাকে পুড়িয়ে এসেও আমি বিশ্বাস করতে পারতাম না, সে সত্যসত্যই বাষ্প আর ভস্মে পবিণত হয়ে গেছে, জগতের কোথাও সে আর নেই। আমার মনে হত, সে ফিরে আসবে ; আবার আমি তার দেখা পাব।

বাড়িতে বেশি লোক থাকলে আসতে সে পাছে কুণ্ঠা বোধ করে এই জন্য আত্মীয়স্বজন সকলকে আমি দেশে পাঠিয়ে দিয়েছিলাম। পার্থিব কোনো সুখ-সুবিধার দিকে আমার নজর ছিল না। একটা ঝি আর একটা ঠাকুর রেখে দিয়েছিলাম, তারা যা ব্যবস্থা করত আমি তাই মেনে নিতাম। কোনো বিষয়ে তারা হুকুম নিতে এলেই বরং আমি এমন বিরক্ত ও ক্রুদ্ধ হয়ে উঠতাম যে তারা সভয়ে আমাকে পরিহার করে চলত। একটা ঘরে আমার স্ত্রীর পাঁচখানা ছোটো-বড়ো ফটো, তার জামা-কাপড়, চুলবাঁধার সরঞ্জাম, পায়ের জরিবসানো চটি, হিসাব-লেখার খাতা, এমনই সব হাজার বকম স্মৃতিচিহ্ন জড়ো করে দিনের বেলাটা আমি সেই ঘরে কাটিয়ে দিতাম। সন্ধ্যার সময় যেতাম আমার স্ত্রী যে-ঘরে মারা গিয়েছিলেন সেই ঘরে। যে-খাটে তিনি শেষ নিশ্বাস ফেলেছিলেন, নিজের হাতে আমি তাতে বিছানা পেতে নিতাম। পাশপাশি বালিশ দিতাম দুটি। শূয়ে, বসে, বই পড়ে আর থেকে থেকে প্রত্যাশাব দৃষ্টিতে চারিদিকে তাকিয়ে রাতগুলি আমি একরকম জেগেই কাটিয়ে দিতাম।

এমনি ভাবে মাসখানেক কাটিয়ে পলকের জন্যও আমার স্ত্রীর দেখা না পেয়ে আমি যখন অল্পঅল্প হতাশ হয়ে উঠেছি, হঠাৎ একদিন সন্ধ্যার পর আমার খেয়াল হল যে, রোজ এ-ঘরে আলো জ্বলে রাখি বলে তিনি হয়তো আসেন না। খেয়াল করা মাত্র তাড়াতাড়ি উঠে গিয়ে আমি আলো নিবিয়ে দিলাম।

আনন্দে আমার শরীর কণ্টকিত হয়ে উঠল।

আলো নেবানো মাত্র আমি দেখতে পেলাম ছায়ার রূপ নিয়ে আমার স্ত্রী দেয়াল ঘেঁষে মেঝেতে বসে আছেন, তাঁর সূক্ষ্ম দেহ থেকে জ্যোতি নির্গত হয়ে তার চারিদিকে ফটোর ফ্রেমের মতো চতুষ্কোণ খানিকটা স্থান উজ্জ্বল হয়ে আছে। তেমনই এলোখোঁপা, কপালের কাছে তেমনই পাটকবা চুলের ঈষৎ উচ্চতা, তেমনই টিকলো নাক ও সুডোল চিবুক। গলদেশ বেস্তন-করা, খসে পড়া ঘোমটাটি পর্যন্ত স্পষ্ট হয়ে আছে।

নিষ্পন্দ হয়ে দাঁড়িয়ে আমি তাকে দেখতে লাগলাম। অনেকক্ষণ পরে তিনি উঠে দাঁড়ালেন, দুহাত উঁচু করে আমার অতি-চেনা ভঙ্গিতে হাই তুললেন। এবার তার সমস্ত অবয়বের ছায়া আরও স্পষ্ট হয়ে উঠল। মিনিট খানেক দাঁড়িয়ে থেকে হাত-দুই পাশের দিকে সরে তিনি ঘরের আবছা অন্ধকারে মিশে গেলেন। কেবল তার চারিদিকে যে চতুষ্কোণ ফ্রেমের মতো যে উজ্জ্বলতা ছিল তা রয়ে গেল অবিকৃত ! টলতে টলতে বিছানায় গিয়ে আছড়ে পড়ে সঙ্গে সঙ্গে আমি পড়লাম ঘুমিয়ে। আমার অসুস্থ দেহমন তাঁর এই অপূর্ব আবির্ভাবের উত্তেজনা সহ্য করতে পারল না।

সেই দিন থেকে রোজই তাকে দেখতাম।

সন্ধ্যা হবার আগেই আমি ঘরে গিয়ে বসে থাকতাম। যখন অন্ধকার গাঢ় হয়ে আসত, হঠাৎ ঠিক সেই সময় দেয়ালের গায়ে সেইখানে উজ্জ্বল চতুষ্কোণ পটভূমিকাটির আবির্ভাব হত। কোনোদিন

তিনি এসে প্রথম দিনের মতো দেয়াল বেঁধে বসতেন, কোনোদিন চঞ্চলভাবে আনাগোনা করতেন, কোনোদিন পিছন ফিরে দাঁড়িয়ে আলগা খোঁপা বেঁধে মুখ ফিরিয়ে তাকিয়ে তার বেঁচে থাকার সময়কার আমার সব চেয়ে প্রিয় লীলাভঙ্গিটির অভিনয় করতেন। কোনোদিন হাত নেড়ে মুখ নেড়ে আমার সঙ্গে কথা বলার অভিনয়ও করতেন, কিন্তু শব্দ হত না।

শব্দ তিনি কোথায় পাবেন ?

আমিও তাঁর সঙ্গে কথা বলার অথবা কাছে গিয়ে তাকে স্পর্শ কববার চেষ্টা করতাম না। ছায়ার সঙ্গে যে কথা বলা যায় না, ছায়াকে যে ছোঁওয়া যায় না, এটুকু জ্ঞান আমার ছিল। আমি শুধু তাকে দেখতাম। তাতে আমার বিরহ-বেদনা লঘু হয়ে যেত। কেবল, তিনি যখন ঝাপসা বিকৃত মূর্তিতে দেখা দিতেন, আমার বড়ে কষ্ট হত। আমি বুঝতে পাবতাম শুধু বৃপ পরিগ্রহ করার চেষ্টা করেও তিনি পারছেন না, কে জানে তার কত যাতনা হচ্ছে !

একদিন আমাদের এক অদ্ভুত মিলন হয়েছিল। সূক্ষ্মতা ও স্থূলতাযে দুর্লভ্য বাধা অতিক্রম করা তাঁর পক্ষে সম্ভব ছিল না, প্রবল ইচ্ছাশক্তি বলে আমি তা অতিক্রম করে গিয়েছিলাম। সেদিন আমি একটি ইংরেজি পরলোকতত্ত্বের বইয়ে জীবন্ত প্রাণীর সূক্ষ্ম দেহধাবণের কতকগুলি বিবরণ পাঠ করেছিলাম। রাত্রে তিনি তার আলোকপটে এসে দাঁড়ানো মাত্র আমি দেখতে পেলাম, আমাব ছায়াবূপ পিছন থেকে এসে তাকে জড়িয়ে ধরল। মুহূর্তের মধ্যে পবলোকগতা পত্নীর সঙ্গে আমার অনন্ত ব্যবধান ভুলে গেলাম। আমার নিবিড় আলিঙ্গনে তাঁর শিথিল অচল দেহ আগের মতো জীবনের আবেগে উষ্ণ ও স্পন্দিত হয়ে উঠল। তাঁর বক্তমাংসের দেহই যে আমার বক্ষে লগ্ন হয়ে আছে, আমার তাতে কিছুমাত্র সন্দেহ রইল না। আমি তাঁব চুলের স্পর্শ পেলাম, ত্বকের স্পর্শ পেলাম, তাঁব উষ্ণ নিশ্বাস আমার গালে লাগল। তাঁর দেহের ভাব পর্যন্ত আমি অনুভব করলাম।

ছায়া কি ভাবী হয় ?

তারপর সেদিন কী যে হয়েছিল আমার মনে নেই। স্ত্রীব ছায়াময়ী মূর্তি আমাব অভ্যস্ত হয়ে এসেছিল, কিন্তু তাঁর বক্তমাংসেব স্পর্শাযত্ত বাস্তব মূর্তি আমায় মুর্ছিত কবে দিল।

আত্মহত্যা করে স্ত্রীর সঙ্গে মিলিত হবার কল্পনা তাঁব মৃত্যুর দিন থেকেই আমাব মনে ছিল। এই ব্যাপারের পর আর একটা দিনও পৃথিবীতে থাকতে আমাব ইচ্ছা হল না। পবদিন দুভরি আফিম কিনে রাখলাম। ঠিক করলাম, রাত্রে স্ত্রীর আবির্ভাব হলে দরজা বন্ধ করে তাঁব সামনেই আফিম খেয়ে শুয়ে থাকব। রাত্রি প্রভাত হবার আগেই আমাদের জীবন ও মৃত্যু এই দুই স্তরের অন্তর্গত অস্তিত্বের ব্যবধান ঘুচে যাবে।

তাঁর ছায়াবূপকে সেদিন আমার যেন আরও স্পষ্ট আবও নিখুঁত মনে হল। আত্মহত্যা করতে আমার যে একটু-একটু ভয় ছিল, তাঁকে দেখার পর সেটুকুও মিলিয়ে গেল। উঠে গিয়ে আমি দরজা বন্ধ করলাম। সঙ্গে সঙ্গে শুধু স্ত্রীর ছায়া নয়, তার আলোর আবেষ্টনী পর্যন্ত অন্তর্হিত হয়ে গেল। তাঁর সঙ্গে তাঁর এই উদ্ভুল পটভূমিকে আমি কখনও অদৃশ্য হতে দেখিনি, কিছুই বুঝতে পারলাম না। আবার দরজা খুললাম। দেয়ালের গায়ে আলো এবং আমার স্ত্রীর ছায়া দুই-ই আবার বৃপ নিল। তখন তাকিয়ে দেখে টের পেলাম, আমার ঘরের দরজার বাইরে বাড়ির ঝি বসে আছে, ঠিক যেন কার প্রতীক্ষায়। নীচে নামার সিঁড়ির বাঁকের কাছে দেয়ালের গায়ে যে আলোটা জ্বলছে তার আলো দবজা দিয়ে সোজা আমার ঘরে ঢুকেছে।

শুনতে পাই তাবপর বছর খানেক আমি পাগল হয়ে গিয়েছিলাম। বর্তমানে আমার কিছুমাত্র পাগলামি নেই এবং আমি আবার বিয়ে করেছি।

অথচ, আশ্চর্য এই, এখনও আমি পরলোককে বিশ্বাস করি !

হাত

কাঠ যদি শূন্যতার প্রতীক হয়, কাঠির প্রতীক হওয়া উচিত রোগা শূন্যতার। কাঠ চিরকালই হয় কাঠি, মানুষকে রোগা হওয়ার জন্য ভুগতে হয় কিন্তু রোগে। এদিকে আবার মোটা হবাব রোগও জগতে আছে। রোগা হবাব ব্যাপাবটা তাই বড়ো জটিল, প্রায় দর্শনের সমস্যার মতো। মহামায়া যে কাঠির মতো সরু, সময় সময় সেটা এমন খারাপ দেখায় যে, স্পষ্ট মনে হয় মোযমানুষেব শরীরে এত বাড়াবাড়ি ভালো নয়। মহামায়াকে সবচেয়ে খারাপ দেখায় সে যখন দাঁড়ানো অবস্থাতেই উপড় হয়ে মেঝেতে কোনো হাতেব কাজ সাবে। বড়ো মাছ পড়লে ছিপও এই রকম ভঙ্গি করেই বেঁকে যায়।

মহামায়ার হাত দুটি বড়ো লম্বা। বোণা না হলে তাকে বেঁটে বলা যেত, গড়নের আর একটু অভাব থাকলে তাকে ছেলে বলা যেত, হাত দুটি তার ইঞ্চি কয়েক ছোটো আর একটু কম সুগোল ও সুপরিপুষ্ট হলে বলা যেত মানিয়েছে। বাড়িব মানুষগুলির মধ্যে সে নিজে যেমন বেমানান, তার প্রভাঙ্গগুলির মধ্যে হাত দুটিও তেমনই বেমানান! যেন ধার-করা জিনিস।

ধার-করা জিনিসের মতোই হাত দুটি কিন্তু তার কাজের। কত কাজ যে সে করে সীমা নেই। সেলাইয়ের কাজ, বোনাব কাজ, লেখার কাজ, সংসারেব কাজ, সেবার কাজ। হাতে কাজ না থাকলে সে এক মুহূর্ত থাকতে পারে না, ঘুম ভাঙার পব থেকে আবার ঘুমিয়ে পড়া পর্যন্ত হাত তাব অবিরাম কাজ করে যায়। হাতের পরিশ্রমের শ্রান্তিতে শরীর এলিয়ে আসে, কোমব টনটন কবে, মনে হয় হাঁটু মুচড়ে হুমড়ি খেয়ে সে পড়ে যাবে, কিন্তু হাত তখন তার বোধ হয় ডাম্বেল ভাঁজতেও রাজি। জোব করে কাজ থেকে বঞ্চিত কবে রাখলে হাত তাব এটা ঘাঁটে, ওটা ঘাঁটে, একে টানে, ওকে ঠেলে দেয়—ঠিক নিকর্মা মানুষেব মতো ছটফট করতে আরম্ভ করে। তারপর এক সময় দেখা যায় একটা অকাজকে কাজে পবিণত করে হাত তার ভারী ব্যাপ্ত হয়ে পড়েছে।

স্বামীর গদি-আঁটা চিত হবাব চেয়াবে চিত হয়ে ছোটো মেয়েকে মাই দিতে দিতে মেজো জা কেতকী বলে, চারাগাছটা টব থেকে ওপড়ানো হল কেন ?

মহামায়ার বিশ্বষের সীমা থাকে না। ফুলের চারার চেয়ে সে নিজের হাতেব দিকে ভাকায বেশি করে। তাই তো, তার হাত দুটিকে তো বিশ্বাস নেই ! এই তো হেঁসেল তুলে এসেছে আরও হাজাবটা টুকটাকি কাজ সেরে, এর মধ্যে এত কী অধীর হয়ে উঠল তাব হাত যে দেওরেব টুথব্রাশ দিয়ে খুঁড়ে খুঁড়ে টব থেকে আস্ত একটা ফুলের গাছ উপড়ে ফেলল ?

ছুঁচলো চিব্বকের চামড়া কুঁচকে, রেখাব মতো পাতলা ঠোঁট ফাঁক করে সে একটু হাসে, বলে, ভালো করে পুঁতব বলে উপড়েছি ভাই। রোজ জল দিছি, ফুল ফুটবার নাম নেই, তাই ভাবলাম একবার তুলে আবার পুঁতি, দোষটোষ কিছু থাকে তো শুধরে যাবে।

লাগসই কৈফিয়ত দিলে কী হবে, তাটা মহামায়ার খারাপ হয়ে যায়। লাগসই দূরে থাক কোনোরকম কৈফিয়তই দিতে পারেনি, এমন অকাজও কী সে করেনি ? সকালে সেজো দেওরেব ছেলেকে চারবার লোফালুফি করে খেয়াল হয়েছিল সেটা মানুষের বাচ্চা, কুমড়ো-কাঁকড় নয়। তার খানিক পরে ছোটো ননদের সাতাশ টাকার শাড়িখানা ছিঁড়ে দো-ফালা করে ফেলেছিল, এখনকার মতো এমনইভাবে রোদে-মেলা শাড়ির কাছে চূপ করে দাঁড়িয়ে থেকে। কেন এমন হয় ? কোনো কথা ভাবতে গেলেই নিজের হাতের কথা কেন সে ভুলে যায় ? কেন তার মনে থাকে না যে, সে একটু

অন্যমনস্ক হলেই হাত দুটি তার চুপিচুপি এমন একটা কিছু কাণ্ড বাধিয়ে তুলবে, যার জন্য নিজের তার বিপদের সীমা থাকবে না ?

মন খারাপ করে এই সব কথা ভাবতে ভাবতে হঠাৎ চমক লাগে মহামায়ার। এইটুকু ভাবনার অবসরেই ডান হাতটি এক কাজ করে বসে আছে। উঠানের ওদিকে উঁচু প্রাচীর, তারও ওদিকের বাড়িটার তেতলার জানালায় দাঁড়িয়ে যে ছেলেটা ইশারায় আসবার অনুমতি প্রার্থনা করছিল, এই নিঝুম দুপুরে তাকে তার ডান হাতটি ডেকে বসেছে।

নিঝুম দুপুর হয়তো নয়, একতলার প্রেসে হয়তো এখনই ঘটংঘটাং ছাপার কাজ আরম্ভ হয়ে যাবে, তবু অস্তুত দুপুর তো,—এ সময় এভাবে ইশারায় আদান-প্রদান চোখে পড়লে লোকে ভাববে কী ? লোকে তো জানবে না ও বাড়ির বারীনের কাশি হয়ে গলা ভেঙে গেছে বলেই নিজের বুক হাত ঠুকে জিজ্ঞাসা করেছে, এখন বুঝল নিতে আসবে কি না, আর সে অন্যমনস্ক হয়ে পড়েছিল বলেই তার অবাধ্য হাত হাতছানি দিয়ে তাকে ডেকেছে। গলা অবশ্য তার ভাঙেনি, কিন্তু মেয়েমানুষ হয়ে সে চ্যাঁচাবে কী করে ? হাতছানি দিয়ে না ডাকলে হত। ওর ইশারা আর তার হাতছানি যে দেখেছে, সে যখন ওকে এ সময় এ বাড়িতে ঢুকতে দেখবে, ভাবতে আর সে কিছু বাকি রাখবে না।

ভালো করে পূঁতবার জন্য ওপড়ানো-চারটি ইতিমধ্যে কয়েক টুকরোয় ভাগ হয়ে গিয়েছিল। সেদিকে চেয়ে মহামায়া আড়চোখে একবার কেতকীর দিকে তাকাল। কেতকী চোখ বুজছে। দুপুরবেলা স্বামীর ছেলেকে বুক নিয়ে স্বামীর চিত হবার চেয়ারে চিত হয়ে বেশিক্ষণ কেতকী চোখ খুলে রাখতে পারে না।

ভাঙা চারাগাছটা নীচে ফেলে দিয়ে মহামায়া দু-হাতে রেলিংটা শক্ত করে চেপে ধরল। এই কাজটাই করুক হাত দুটি, এই রেলিং ধরার কাজ। এত জোরে ধরুক রেলিং, যেন খুলবার সময় রীতিমতো একটু কষ্ট হয় হাত দুটির, প্রত্যেকটা আঙুল সোজা করবার সময় যেন বুঝতে পারে এ এক ধরনের শাস্তি।

সেইখানে দাঁড়িয়ে মহামায়া বারীনকে বাড়ি ঢুকতে দেখল, একতলার প্রেসে কেতকীর স্বামীর সঙ্গে কথা বলতে শুনল, দোতলা ডিঙিয়ে জুতোর শব্দে তেতলায় সপুত্র কেতকীর ঘুম ভাঙিয়ে কাছে এসে দাঁড়াতে দেখল, তবু রেলিংয়ের মুঠি খুলল না। আঙুলের গাঁটগুলি তখন তার ধবধবে সাদা হয়ে গেছে, রক্তের স্রোতের সঙ্গে একটা স্তিমিত ব্যথা দেহের ভিতরের দিকে বয়ে চলেছে।

বুঝলগুলো হয়েছে বউদি ?

বারীনের কথায় একটা শব্দ যেন বেঁচে উঠল। এক মুহূর্তে মহামায়ার দেহের অসাড়তম অঙ্গটুকুতে পর্যন্ত যেন এল প্রাণস্পন্দনের জোয়ার। তাড়াতাড়ি রেলিংয়ের বাঁধন থেকে হাত ছাড়িয়ে সে বলল, সব হয়নি, কাটা বাকি আছে। একটু বসুন, এখনই সেলাই করে দিচ্ছি,—পাঁচ মিনিট।

কাজের যে কোনো অভাব আছে তা নয়, বাড়িতে লোক তেরোজন, প্রেসের দুজন কম্পোজিটারও বাড়িতেই থাকে। আপিসের তাড়া নেই বটে, স্কুল-কলেজের তাড়া আছে। তবে মহামায়ার মুশকিল এই, সকলে তাকে সব কাজ করতে দেয় না। স্বামী আর ছেলেমেয়ের এমন সেবা আছে, যা খুব বেশি রকম আলসে স্ত্রী আর মাও নিজেরাই করতে ভালোবাসে। আবার এমন কতগুলি কাজ আছে মহামায়ার যা করতে নেই, করতে ভালো দেখায় না বা অন্য কাউকে করতে না দিলে খারাপ দেখায়। তা ছাড়া মহামায়ার আছে ঘেন্না। গা ঘিনঘিন-করা উৎকট অদ্ভুত ঘেন্না। মনের জোরে দরকারের সময় কখনও যদি বা ঘেন্না সে দমন করতে পারে, পেটের যা কিছু হঠাৎ গলা দিয়ে বার হয়ে আসতে

চাইলে কোনোমতেই চেপে রাখতে পারে না। নিজেই বমি দেখে নিজেই ঘেন্নায় সে আধমরা হয়ে যায়। ছোটো ছেলেমেয়ের কতকগুলি কাজও সে তাই করে না।

তবু যা করে, তার জনাই বাড়ির লোক উঠতে বসতে তাকে অনুযোগ দেয়। ওই শরীরে এত কাজ করা কেন ? বাড়িতে ঝি-চাকর নেই ? কাজ করার আর মানুষ নেই ? একজন যখন একজনের কাছে জল চাইল, একজনকে এক গ্লাস জল দেবার সুখ থেকে বঞ্চিত করতে ও রকম ওত পেতে না থাকলেই কী তার চলে না ? ভারীভারী কাজও করবে, টুকিটাকি কাজও করবে—কী এমন মধু আছে রে বাবা কাজে ! আর শুধু কি কাজ করা ? থেকে থেকে এমন এক একটা কাণ্ড করে বসবে—

অনুযোগ শুনতে শুনতে অবসন্ন শরীর এক এক সময় ভেঙে পড়তে চায় মহামায়ার, মনে হয় কেউ যদি চোখের পলকে তাকে ঘুম পাড়িয়ে দিত ! স্বপ্নহীন গাঢ় ঘুম,—হাত দুটিকে যখন যে কোনো একটা কাজে আটকে রাখবার ভাবনা তাকে ভাবতে হয় না। ঘুম গাঢ় না হলেও মহামায়ার হাত নিয়ে স্বস্তি নেই। ঘুমের মধ্যেও হাত দুটি তার বিছানা হাতড়ায়, চাদর গুটিয়ে তোলে, ছেঁড়া থাকলে সেই ফাঁকে আঙুল ঢুকিয়ে চাদর বা বালিশের ওয়াড় ফালাফালা কবে দেয়, তোশক বালিশ খুঁটেখুঁটে তুলো বার করে ফেলে, মুঠোর মধ্যে যা কিছু পায় দূরে ছুঁড়ে মারে। তার বিছানার ধারেকাছে আর কারও শোবার উপায় নেই। স্বামী যদি তার বেঁচে থাকত, কে জানে একদিন সকালে উঠে দেখা যেত কি না, তার হাত দুটি গলা টিপে স্বামী বেচারিকে মেরে রেখেছে !

সুখের বিষয় শরীরটা তার কাঠির মতো সবু,—হাতের মতো সবলও নয়, পাগলও নয়। দেহ যদি তার ঘুমের মধ্যে অবাধা হতে আরম্ভ করত আর ঘুমের মধ্যে বিছানা থেকে তাকে তুলে তার হাত দুটিকে যেখানে খুশি পৌঁছে দিত, কী যে তা হলে হত, ভাবলেও মহামায়ার সর্বাঙ্গ শিউরে ওঠে।

এমনই হাতের জালায় জীবন তার অতিষ্ঠ হয়ে উঠেছে।

ডান হাতে কলের হাতল ঘোরায়, বাঁ হাতে বুমালের কাপড় সূচের নীচে এগিয়ে দেয়, আর মনে মনে নিজেই বিস্মৃত ও স্বর্গীয় এক পিতৃব্যের মুণ্ডপাত করে। ছেলেবেলা তাকে নিয়ে মোটবে চেপে যাবার সময় তিনি নাকি একটা অ্যাকসিডেন্ট ঘটিয়েছিলেন, পিঠে আর হাঁটুতে চিহ্ন আছে।

তারপর থেকে নাকি সে বোগা হয়ে গেছে, পাশে বাড়েনি লম্বাষ বাড়েনি,—কেবল তার হাত দুটি বেড়েছে স্বাভাবিক বাড়।

নির্জন দুপুর, কলের মৃদু একটানা আওয়াজ, চেয়ারে বসে বসেই বারীনের ঢুল আসছিল। মহামায়া হঠাৎ জিজ্ঞেস করল, আচ্ছা ঠাকুরপো, আমাকে খুব বিচ্ছিবি দেখায়, না ?

বারান্দায় মাদুরে পাটিতে মেয়েরা শুয়েছে, স্বামীর চিত হবার চেয়ারে বাবীনের জুতোর আওয়াজে ভাঙা কেতকীর ঘুম হয়তো এতক্ষণে আবার ফিরে এসেছে, ঘরটা তাই জিনিসে ভরা হলেও কেবল একজন পুরুষ আর একজন নারী থাকায় মনে হচ্ছিল নির্জন।

প্রশ্ন শুনে বারীন চেয়ারেই জড়োসড়ো হয়ে বলল, না, বয়সের তুলনায় আপনাকে বরং ঢের বেশি কচি দেখায়।

তা বলছি না, বলছি হাত দুটোর জন্যে আমায় খারাপ দেখায় তো ? আচ্ছা তা দেখাক। আপনি তো আজ-বাদে-কাল ডাক্তার হবেন, বলুন তো, ছোটোবেলা মোটর অ্যাকসিডেন্ট হলে আমার মতো হয় কি না ?

আপনার মতো কী হয় ?

বেখাপ্পা দেখতে হয়—শরীরটা এমনই শুকিয়ে যায় কিছু হাত দুটো ঠিকমতো বড়ো হয়। ছেলেবেলা আমার এক কাকার সঙ্গে মোটরে বেড়াতে গিয়ে আমার এ দশা হয়েছে, তা বুঝি জানেন না ?

বারীনের হাসি দেখে মহামায়া মাথা হেলিয়ে জোর দিয়ে বলল, সত্যি। সবাই জানে। নইলে আমি বুঝি আপনা থেকে এমনি হয়েছি ?

বারীন হাই তুলে বলল, আপনা থেকে হয়েছি মানে ? আপনি তো এমনই—এমনই গড়ন আপনার। আপনার বাবার কি মার নিশ্চয় এ রকম গড়ন ছিল,—নয়তো কোনো এক পূর্বপুরুষের ছিল। Cell-এর মধ্যে যে genes থাকে—

প্রেসে বড়ো একটা মেশিন চলতে আরম্ভ করেছে, তবু সেলায়ের হাত-কলটার মৃদু একটানা শব্দ সুরের মতো স্পষ্ট। এবার আরও তাড়াতাড়ি বাকি বুমালাগুলি সেলাই হয়ে গেল। হাতের কাজও যেন ফুরিয়ে গেলে বাঁচে।

বারীনকে বুমালা দিয়ে মহামায়া বলল, কই, পাঞ্জাবির কাপড় তো এনে দিলেন না ?

না, না, আপনার ঘাড়ে অত চাপানো উচিত হবে না।

ঘাড়ে চাপানো :—মহামায়া মৃদু হাসল, বাড়ির কেউ জামা চায় না, কিছু চায় না, বলে আমার ছাঁটকট সেলাই ভালো নয়। সে কথা না বলে ঘাড়ে চাপানোর কথা কেন ?

বারীন বলল, তা কেন, আপনি চমৎকার ছাঁটেন, চমৎকার সেলাই করেন। আজকেই সন্দের সময় কাপড় এনে দেব।

কেতকী জেগেই ছিল, বারীনকে চলে যেতে দেখেও কিছু বলল না, কেবল তাকানোতে একটু নতুনত্ব এনে মহামায়ার দিকে তাকাল।

মহামায়ার একবার মনে হল, বুকে একটা ছেলে না ঘুমিয়ে থাকলে এ ভাবে কেতকী তাকাতে পারত না। তারপর আবার নিজেকে মহামায়ার অবসন্ন মনে হতে লাগল। হাতের ভার বহন করে দাঁড়িয়ে থাকতেও যেন কষ্ট হয়। কী নির্ভয় নিশ্চিতভাবে সকলে নিশ্চল হয়ে ঘুমিয়ে আছে। কারও হাতের আঙুলটি পর্যন্ত একটু নড়ে না। মীনা পাশ ফিরে শুল, হাত দুটি তাকে পাশ ফিরতে সাহায্য করল, তারপর আবার নিশ্চল হয়ে এলিয়ে পড়ল। তার হাত হলে ? এমন কিছু হয়তো একটা করে বসত সকলে জেগে উঠে যা নিষে হইচই করে তারও ঘুম ভাঙিয়ে দিত, বলত, দ্যাখো, তোমার কীর্তি।

ভুলেও কখনও বলত না, দ্যাখো, তোমাব হাতের কীর্তি।

সন্তপণে মীনার পাশে বসে মহামায়া তার ডান হাতের কাছে নিজের ডান হাতটি রাখল। মীনার চেয়েও তার হাত সবল আর সুডৌল—শুধু হাত দিয়ে বিচার করলে তার মতো বৃপসি মিলবে না। তবু এই হাতের জন্য মানুষটা সে বেচপ, বেখাপ্লা,—এই হাতের জন্য পদে পদে তার অশান্তি, উদ্বেগ। একরকম চ্যাপটা বেমানান একটা বাঁকা হাত নিয়েও মীনার জীবনে সুখের বন্যা—

উঃ ! উঃ ! শব্দ করে মীনা ধড়মড়িয়ে উঠে বসতেই মহামায়া মীনার হাত ছেড়ে দিল। নিজের হাতে হাত বুলোতে বুলোতে মীনা ক্রুদ্ধ স্বরে জিজ্ঞাসা করল, কী, তোমার হয়েছে কী বউদি ? হাতে একটু জোর আছে বলে আমার হাতটা গুঁড়ো করতে এসেছ কেন ? পালায়ানের কাছে যাও না ? গুন্ডার কাছে যাও না ? বারীনদার সঙ্গে লাগো না গিয়ে ?

মহামায়ার কান্না আসবার উপক্রম হয়ে এসেছিল। সজল মদুসুরে সে বলল, হঠাৎ মনের ভুলে তোর হাত চেপে ধরেছি মীনা, একটা কথা ভাবতে ভাবতে—

মীনা বেঁকে উঠে বলল, মনের ভুলে তো তুমি সবই কর ! চুল ধরে টানো মনের ভুলে, দামি শাড়ি ছিঁড়ে ফেল মনের ভুলে, হাত চেপে ধর মনের ভুলে,—হাত দুটো কেটে ফেলতে তো পার না মনের ভুলে ?

এ ভর্ৎসনায় ঘুমিয়ে থাকা মেয়েদের পক্ষে অসম্ভব। তারা জাগল। জেগে উঠেই জানবার জন্য ব্যাকুল হয়ে উঠল, কী হয়েছে, কী হয়েছে ?

ঘুমোচ্ছিলাম, আমার হাত মুচড়ে ভেঙে দিয়েছে।

মহামায়ার প্রতিবাদের জন্য এক মুহূর্ত অপেক্ষা করে সকলে আবার কলরব করে উঠল। একজন মহামায়ার একটি হাত উঁচু করে নেড়ে চেড়ে দেখে ঝটকা মেরে ফেলে দিয়ে বলল, হাত তো নয়, গদা যেন।

মহামায়া নীরবে উঠে গিয়ে রেলিংয়ের সেইখানে দাঁড়াল। মীনার হাত সে মুচড়ে ভেঙে দেয়নি, মুচড়ে ভেঙে দিয়েছে একটি ফুলের চারা। এখনও সেটি নীচে কল ঘরের ছাদে পড়ে আছে।

সাতটার সময় বারীন সাতগজ পাঞ্জাবির কাপড় নিয়ে এল, নীচে প্রেস তখন বন্ধ হয়ে গেছে, কাজ হচ্ছে কেবল দপ্তরির যাবে।

এ সময় মুহূর্তের জন্য মহামায়ার হাতের স্থির হবার অবকাশ থাকে না। কিন্তু আজ মহামায়া চুপচাপ বারান্দায় বসেছিল, দুহাতে ধবে ছিল রেলিংয়ের শিক। এ সময় এ অবস্থায় তাকে কেউ কোনোদিন দেখেছে বলে মনে করতে পারে না,—এ বাড়ির লোকদের তুলনায় সে যেমন বেমানান, তার দেহের তুলনায় তার হাত দুটি যেমন বেমানান, এ সময় এ ভাবে তার বসে থাকা যেন তার চেয়েও বেমানান। কেতকীর স্বামী তার গদি-আঁটা চেয়ারে চিত হয়ে পড়ে আছে, কেতকী নিজেব ছেলের কান্না থামাতে না পেবে পাগল হয়ে উঠেছে, আরও চার-পাঁচটা ছেলেমেয়ে চোঁচাচ্ছে। ভাঁড়ার বার করে দিতে গিয়ে মীনা প্রায় কঁদে ফেলার উপক্রম করছে, স্কুল-কলেজ থেকে ফিরে একবার যারা খাবার পেয়ে খায়নি, এখন বেড়িয়ে ফিরে খাবার চেয়ে তারা পাচ্ছে না, রান্নাঘর থেকে কীসের একটা গোলমাল শোনা যাচ্ছে, মহামায়ার বুড়ি শাশুড়ি কাশতে কাশতে মরে যাবার ভয় দেখাচ্ছেন।

কোমরে আঁচল জড়িয়ে মহামায়া একবার তার গদা দুটি নিয়ে যুদ্ধক্ষেত্রে নামলেই সব গোলমাল থেমে যায়, কিন্তু আঁচল সে জড়িয়ে রেখেছে গায়ে, আঙুল দিয়ে দুটি গদাকেই বেঁধে রেখেছে রেলিংয়ের শিকে। মানুষের উপর তার অভিমান হয়নি, ঘেন্না সে করছে নিজেকে। যে অনুভূতি তার মধ্যে সবচেয়ে প্রবল সেই অনুভূতিই আজ কেবল নাড়ির মধ্যে পাক দিয়ে উঠছে, মনে হচ্ছে এই বুঝি বমি করে ফেলল।

কোমরে আঁচল জড়ালে এ ভাবটা কমে যাবে কি না, বারীন আসবার অনেক আগে থেকে সে এই কথাটাই ভাবছিল। কোমরে আঁচল জড়িয়ে সে যে রহস্যের সৃষ্টি করে, তার পীড়ন সকলে যে শুধু তার কোমরে আঁচল জড়ানো সেবার জন্য সহ্য করে মহামায়ার তা অজানা নয়। বমি-বমি ভাব সামলাতে হলে নাড়ির কাছে খুব আঁট করে তাকে আঁচল জড়াতে হবে। এই সবু কোমর তার, আঁচল আঁট করে বাঁধলে কী অকথ্য সবুই দেখাবে কোমর।—আর তার তুলনায় কী অসম্ভব বিশাল দেখাবে তার হাত। লজ্জায় গায়ে কাঁটা দিয়ে উঠছিল মহামায়ার। নিজেকে সামলাবার আঁচল-সংক্রান্ত পরীক্ষাটুকু করার সাহস সে পাচ্ছিল না।

বারীন কাপড় নিয়ে আসতে সে উঠে দাঁড়াল। সিন্ধুর কাপড় দেখে খুশি হয়ে বলল, সিন্ধু ? বারীন বলল, হ্যাঁ। ভালো জামা করা চাই কিন্তু।

এ হাতে কি আর ভালো জামা হয় ঠাকুরপো ?

দু চোখে জল নেমে এল মহামায়ার। বারীনদের বাড়ির আলোকিত জানালাগুলির দিকে তাকিয়ে বলল, বড়ো অবাধা, বড়ো কুচ্ছিত হাত। কী যে করি আমি হাত দুটো নিয়ে !

কম্পোজিং বুমে টিমটিমে একটা আলো জ্বলছে, ছাপাখানা অন্ধকার। দপ্তরিখানার ভেতরটা আলোয় বলমল করছে। খোলা দরজা দিয়ে খানিকটা আর খোলা জানালা দিয়ে খানিকটা দেখা যায়,

যশ্বে ফেলে বুড়ো দাড়িওলা দপ্তির ছাপা ফর্মা কাটছে। দেখতে দেখতে মহামায়ার হাত এদিকে এগিয়ে যায় বারীনের দিকে। বারীন সাহেবি পোশাকে বেরিয়েছিল, সেই বেশেই সোজা এখানে এসেছে। মহামায়ার ডান হাত এগিয়ে গিয়ে তার কোটের মাঝের একটা বোতামকে পাকড়াও করে পাক দিতে থাকে। মুখে বমি করার ভাব ফুটে আছে ভেবে মুখ মহামায়ার ফেরানো থাকে অন্যদিকেই। কয়েকটা মোচড় খেয়েই বারীনের কোটের বোতামটি আলগা হয়ে খসে আসে। মহামায়া তখন পাকড়াও করে তার উপরের বোতামটিকে।

সেটি খসে এলে, নীচেরটিকে।

কেতকীর স্বামী চিত হয়ে থেকেই মৃদুস্বরে ডাকে, বউঠান, ও বউঠান ?

মহামায়া মুখ ফিরিয়ে আনতে আনতে বারীনের সে বোতামটিও খসে আসে। অন্য একটি বোতাম ধরে মহামায়া আরও মৃদুস্বরে বলে, কেন ঠাকুরপো ?

ও কী করছ ?

কী করছি ?

বোতাম ছিঁড়ছ কেন বারীনের ?

বোতাম ছিঁড়ছি ?—মহামায়া চমকে ওঠে, ওমা তাইতো !

একবার নিজের হাতের বোতামগুলি আর একবার বারীনের কোটের বোতামের খালি ঘরগুলির দিকে তাকায় মহামায়া, নিশ্বাস ফেলতে যাওয়ায় মনে হয় ভেতরে যা কিছু আছে সব তার বেরিয়ে আসতে চায়, কেবল ছিদ্রগুলি ছোটো বলে পারছে না।

একটু সরে দাঁড়ায় মহামায়া। কিন্তু কত দূরে আর সরে যাবে ? সকলকে শুনিয়ে শুনিয়ে মীনা কেতকীর স্বামীকে বলে, বোতাম ছেঁড়ার কথা কী বলছ মেজদা, সারাদিন আজ কত কী ছিঁড়েছে হিসেব রাখ কিছু ? আমাব সেই যে ঘাসের রঙের শাড়িটা কিনে দিয়েছিলে, নবুদের বাড়ি নেমস্তন্ন গিয়ে কাল নিজেই উনি তাতে চুন লাগালেন। ও বেলা ধুয়ে রেলিংয়ে মেলে দিয়েছি, কখন কাছে দাঁড়িয়ে কাপড়খানা ফালাফালা করে ছিঁড়েছেন। তারপর খোকাকে দুধ খাওয়াতে গিয়ে দিলেন ওব মুখে আশ্চর্য চামচটা সোঁদিয়ে। দুপুরে তোমার টুথব্রাশ দিয়ে খুঁড়ে খুঁড়ে তোমার অত সাধের চারাটি টব থেকে তুললেন, তুলে মুচড়ে ফেলে দিলেন। আমি এই বারান্দায় ঘুমোচ্ছি পাটি পেতে, বলা নেই কওয়া নেই, পাশে বসে এমন মুচড়ে দিলেন আমার হাতটা, এখনও কনকন করছে।

কোমরে আঁচল বেঁধে যে দু হাতকে খাটায়, মীনার কথা শুনতে শুনতে বমি থামাবার জন্য সে মুখে আঁচল গুঁজে দিয়েছে। বারীনের সিন্ধের থান মাটিতে ফেলে বারীনের একটা হাত ধরে টানতে টানতে সে সিঁড়ির দিকে এগিয়ে গেল। কেতকীর স্বামী একবার আর সিঁড়ি দিয়ে নামবার সময় বাড়ির দুজন মেয়ে দুবার জিজ্ঞেস করল কোথায় যাচ্ছ, মুখ থেকে আঁচলও সে সরাল না, কথাব জবাবও দিল না।

একবারে নীচের তলায় নেমে ঢুকল গিয়ে দপ্তির ঘরে।

মরতেও দিয়ো না ভাই ঠাকুরপো। বাঁচিয়ো।

বলে বাঁধানো বই কাটবার যশ্বে ফেলে কনুয়ের নীচ থেকে নিজের দুটি হাতকে মহামায়া কেটে বাদ দিল। নিজের রক্ত-ভেজা কয়েকটা বই খাতা আর ছাপানো ফর্মার ওপর টলে পড়ে জ্ঞান হারাবার আগে বলল, অবাক হয়ো না ভাই, লোকে আত্মহত্যাও করে। রক্ত থামিয়ে বাঁচাও। তোমার পাঞ্জাবি আর তৈরি করে দিতে পারলাম না।

নীচে মাদুরে বই-খাতার ওপর পড়ে রইল হস্তবিহীনা মহামায়া, লোহার যশ্বে ওপর একরাশ সবু সবু কাটা কাগজের ওপর পৃথক হয়ে রইল দুটি নিষ্পন্দ হাত।

বিড়ম্বনা

স্কুল নিয়ে বুড়ো শিববামের মাথাব্যথার অন্ত নেই। দশ বছর আগে একমাত্র মেয়ে মহাশ্বেতার বিয়ের পর জীবনের এই অবলম্বনটি সৃষ্টি করে নিয়েছিলেন, আজ মেয়েকে চোখের আড়াল করার সব প্রয়োজন শেষ হয়ে যাওয়া সত্ত্বেও স্কুল নিয়েই তিনি মেতে আছেন। ছাব্বিশ বছরের বিধবা মেয়ের কাছে শেষ জীবনে মানুষ আর কী সাত্ত্বনাই বা সংগ্রহ করতে পারে !

সে আর বেঁচে থাকার অবলম্বন নয়,—বাধা।

দশ বছর স্কুল হয়েছে, দশ বছরে অন্তত দেড়শো ছেলে প্রবেশিকা পরীক্ষা দিয়েছে, কিন্তু আজ পর্যন্ত একটি ছেলেও অন্তত দশ টাকার একটা স্কলারশিপ পেয়ে স্কুলের মুখ উজ্জ্বল করতে পারল না বলে শিববামের অসীম আপশোশ। সম্প্রতি এই আপশোশের অন্ত করতে বৃদ্ধ অকর্মণ্য ত্রিলোচনকে বিদায় দিয়ে তিনি নতুন একজন হেডমাস্টার এনেছেন।

নতুন হেডমাস্টারের নাম অনন্ত। ছত্রিশ বছর বয়সে বৃপের তার অন্ত নেই, সপ্তাহে একদিনের বেদি; কমাতে মনে থাকে না বলে মুখভরা খোচারেঁচা দাড়িগোফের জন্য বৃপের যেটুকু হানি হয় দর্শকের সে যেন ব্যক্তিগত ক্ষতি। প্রকৃতিটা একটু অদ্ভুত, মাঝে মাঝে নিতান্ত ছেলেমানুষের মতো খাপছাড়া ব্যবহার করতে ভালোবাসে। স্কুলসংলগ্ন ছোটো একতলা বাড়িটিতে ঠাকুর-চাকর নিয়ে বাস করে, নাওয়া-খাওয়া ইত্যাদি জীবন-ধারণের প্রয়োজনীয় ব্যাপাবগুলির প্রতি সে পরম উদাসীন। দুটি অতি আশ্চর্য বিলাসিতা কেবল তার আছে—রাত্রি জাগরণ এবং দিনে সাত-আটবার চা-পান। চা-পানের বিলাসিতাটা সাধারণ নেশার পর্যায়ভুক্ত বলে সহজেই বোঝা যায়, কিন্তু অর্ধেক রাত্রি পর্যন্ত ঘরের সামনে খোলা বারান্দায় কোন নেশায় যে সে জেগে বসে থাকে, কল্পনা কবা কঠিন।

হয়তো তারা গোনে। রাত জেগে তাবা গুনতে ভালোবাসে এমন মানুষের অভাব তো নেই

অথবা হয়তো ভাবে। রাত জেগে চিন্তার জাল বুনে যায় এমন মানুষের সংখ্যাও পৃথিবীতে কম নয়।

সকালে বেড়িয়ে ফেবার পথে শিববাম অনন্তের সঙ্গে খানিকক্ষণ স্কুল-সংক্রান্ত আলাপ করে আসেন।

বিশৃঙ্খল ঘরের চারিদিকে দৃষ্টিপাত করে বলেন, স্কুলের কাজে তোমার এত শৃঙ্খলা, ঘব এমন নোংরা কেন ?

অনন্ত হাসে,—কর্তব্য আর খেয়ালের মধ্যে এটুকু পার্থক্য থাকবে না ?

শিববাম বলেন, তা যেন রইল, তবু—বলি, একা থাক কেন ? কেউ নেই নাকি আপনার লোক ?

নাঃ—বলে অনন্ত হাসতে থাকে।—নিজের চেয়ে আপনার লোক আর কে আছে বলুন ? নিজেই যদি ঘর নোংরা রাখতে ভালোবাসি—

ভালোবাসো ? আমার মেয়ে শুনলে তোমায় কিন্তু পাগল বলত বাবা ! আর এ ঘরে এলে ব্যাপার দেখে সে নিজেই পাগল হয়ে যেত ! বিধবা হয়ে অবধি ঘরসংসার সাজিয়ে গুছিয়ে—

মুহূর্তে কল্পনায় যা মূর্ত হয়ে ওঠে বৃদ্ধের তাতে বাকরোধ হয়ে যায়। খানিক নীরব থেকে নিশ্বাস ফেলে বলেন, যাক, ও ছাড়া আর করারই বা আছে কী ! ও সব কথা থাক অনন্ত। সহ্য হয় না।

এমন ভাবে প্রসঙ্গ পরিবর্তন প্রার্থনা করেন যেন অনন্তই তার মেয়ের দূরদৃষ্টের কথা তুলেছিল !

ক্ষণকাল শিবরামের মুখের দিকে চেয়ে থেকেই অনন্তের দৃষ্টি ক্রিষ্ট হয়ে ওঠে। দৃষ্টিকে সে আড়াল করে চশমাটা ঠিক করে বসাবার ছলনায়।

অতঃপর স্কুলের প্রসঙ্গ ওঠে। শিবরাম ধীরে ধীরে এমনই উৎসাহিত হয়ে ওঠেন যে অনেক আবোল-তাবোল কথাও বলে ফেলেন।

শুধু স্কলারশিপ পাওয়া নয় অনন্ত, তক্ষশিলা রাজগৃহে যেমন একদিন দেশবিদেশের ছেলে জড়ো হত, আমার স্কুলে তেমনই বাংলাদেশের সেরা ছেলেগুলি জড়ো হবে,—এ যদি করতে পার তবেই বুঝব তুমি হেডমাস্টার !

বৃদ্ধের এই অসম্ভব আশাতে অনন্তের হাসি পায় না, সে গভীর মুখেই বলে, চেষ্টা করব বইকী।

শ্বেতা প্রশ্ন করে, নতুন হেডমাস্টারটি বুঝি খুব ছেলেমানুষ বাবা ?

শিবরাম বলেন, না, মাঝবয়সি। ছেলেমানুষ হেডমাস্টার দিয়ে কি স্কুলের উন্নতি হয় ? এমন লোক চাই যার অভিজ্ঞতাও আছে, আবার বুড়ো হয়ে কাজের ক্ষমতাও হারিয়ে ফেলেনি।

শ্বেতা স্থিত মুখে বলে, মাঝবয়সি লোক ছাড়া অমন সমঝয় হয় না বটে। তোমার বুদ্ধি দেখে সময় সময় আশ্চর্য হয়ে যাই বাবা। স্কুলের সব ব্যবস্থা নাকি তিনি উলটে দিচ্ছেন ?

ব্যবস্থা উলটেও দিচ্ছে, সংস্কারও করছে। যে সব মাস্টার ক্লাসে ঘুমোত আজকাল প্রাণপণে পড়াচ্ছে তারা !

সাত বছরের ছেলে কুণালকে কাছে টেনে নিয়ে শ্বেতা বলে, খোকাকে তাহলে এবার স্কুলে ভর্তি করে দিই, কী বল ? আমার বিদ্যে তো ফুরিয়ে এল।

শিবরাম ভেবে বলেন, স্কুলে দিবি ? দশটা থেকে চারটে পর্যন্ত ওকে না দেখে যদি পাগল হয়ে যাস ?

কী যে বলো তুমি ? বলে শ্বেতা হাসে, কিন্তু হাসির শেষটা অন্তরালের চোখের জলে ভিজে ওঠে। দশটা থেকে চারটা অবধি ছেলেকে চোখের আড়াল করার অনাগত সম্ভাবনায় নয়, না দেখে পাগল হয়ে যাওয়ার কথাটাতেই ব্যথা বাজে ! অতি বড়ো অনুচিত মিথ্যা ! কর্তব্যের কাছে শোক দিনের পর দিন ছোটো হয়ে চলেছে। এমন গ্লানিকর ব্যাপার তারই জীবনে সত্য হয়ে উঠল ! এ চিন্তায় চোখে জল আসা আশ্চর্য নয়। সারাজীবন স্বামীকে না দেখার অভিশাপ যার কাছে সহজ ও সহনীয় হয়ে এল, ক ঘণ্টা ছেলেকে না দেখে সে কাতর হবে ? লজ্জাকর পরিহাস !

কুণাল দাদুর পাশের আসনটি দখল করে বসে অনর্গল কথা আরম্ভ করে দেয়, তারপর একান্ত অসময়েই বৃপকথার রস-বৈচিত্র্য প্রার্থনা করে। শ্বেতা সরে যায় জানালায়।

কেন এমন হয় ? না চেয়ে জীবনের প্রথাহীন খাপছাড়া বৈচিত্র্য জুটেছিল, চিরন্তন দীপশিখার ধোঁয়া থেকে কলকতিলকের কালি সংগ্রহ করেও ভীতা সে তিলক পরেনি, বৈধব্যের বেদনায় আজও তার আপশোষ মিলিয়ে গেল না কেন ? অনুতাপে আজ এত মাধুর্য কেন, মুক্তির গৌরবে দাহ ? জীবনের সব যে মুছে গেল তার চেয়ে প্রত্যাখ্যাত কালিমার অভাবটাই আজ যেন বড়ো হয়ে উঠেছে ! এর চেয়ে বিভ্রমনা আর কী আছে জীবনে !

শ্বেতার আহানটা শিবরাম নিজেই অনন্তের কাছে পৌঁছে দিলেন। বললেন, সময় করে একবার যেয়ো হে অনন্ত, মেয়ে তোমায় ডেকে পাঠিয়েছে।

অনন্ত আশ্চর্য হয়ে বললে, কেন ?

ছেলেকে স্কুলে ভর্তি করে দেওয়া সম্বন্ধে তোমার কাছে তার নাকি কতগুলি অনুরোধ আছে। নিজের মুখে জানাতে চায়। আমি শুনতে চাইলাম, বললে না।

অনন্ত আনমনে বলল, তবেই মুশকিল !

শিবরাম অবাক ! মুশকিল ! কীসের মুশকিল ?

অনন্ত অকারণে বিরত হয়ে বলল, আশ্চর্য না, আমি অন্য কথা ভাবছিলাম। আপনাদের মেয়ে যদি কোনো অন্যায় অনুরোধ করেন—

কথাটা বড়োই অসংগত ও খাপছাড়া কৈফিয়তের মতো শোনাল। মেয়ের সম্বন্ধে এমন অন্যায় অনুমানে ক্ষুব্ধ হয়ে শিবরাম বললেন, না; তা করবে না—আমি তোমায় কথা দিতে পারি। নিজে সে অন্যায়কে এমন ঘৃণা করে যে অন্যায় অনুরোধ তার গলায় আটকে যাবে।

অনন্ত অধিকতর বিরত ও ব্যস্ত হয়ে বলল, তা জানি গাঙ্গুলি মশাই, তা জানি। ও রকম ভাবে কথাটা বলিনি, আমি ভাবছিলাম—

কী যে সে ভাবছিল তা অপ্ৰকাশিতই রইল। তার মুখ এমনই চিন্তাযুক্ত হয়ে উঠল যে শিবরাম আর একবার বিস্মিত হয়ে গেলেন।

বিকালের দিকে নিজের ঘরে বসে শ্বেতা একটা অদ্ভুত আত্মচিন্তায় ব্যাপ্ত হয়ে ছিল। হিমালী তার সমবয়সি মাসি, তার শিশু পুত্রটি এইমাত্র কেঁদে মার কাছে ফিরে গেছে। আধঘণ্টারও বেশি মাসি ছেড়ে সে খুশি হয়েই মাসতুতো দিদির সোহাগ সহ্য করেছিল, এ জন্য কৃতজ্ঞ না হয়ে রাগ করার মধ্যে যে কত বড়ো অসংগতি আছে শ্বেতার তা জানা ছিল না। কোথা থেকে খেলায় ব্যাপ্ত কুণালের কলরব ভেসে আসছিল, শ্বেতার বুক জেগে উঠছিল একটা ক্ষুব্ধ অভিযোগ। সন্তান শিশু হয়ে থাক এ কামনা হয়তো কোনো মা-ই করে না, কিন্তু শিশু না থাকলেই বা মায়ের চলে কী করে ! একান্ত অসহায় একটি জীবের হাসিকান্নার বৈচিত্র্য, স্নান করানো কাজল পরানো দুধ খাওয়ানো ঘুম পাড়ানো থেকে মুখে মাই তুলে দেবার প্রয়োজন, একবার যে মা হয়েছে তার তো কোনো দিনই ফুরিয়ে যায় না ! কুণালের বয়সটাকে শ্বেতা আজকাল যেন হিংসা করতে আরম্ভ করে দিয়েছে। কেন এত বড়ো হয়ে গেল ? দশ মিনিট কোলে করে থাকলে কোমর ব্যথা হয়, হাঁফ ধরে যায়, এ কী বিড়ম্বনা তার !

এক ছেলের মা হয়ে দিন কাটবে এই কী তার জীবনের চরম হিসাব নিকাশ ?

ঝি এসে সংবাদ দিল নতুন হেডমাস্টার এসে বসে আছেন।

বাবা কই রে ঝি ?

বেড়াতে গেছেন বুঝি, কে জানে !

শ্বেতা চিন্তিতা হয়ে বলল, তবে আমি কী করি বল তো ? আড়াল থেকেই কথা বলব অবশ্য, কিন্তু বাবা না থাকলে—

আজ যেতে বলব দিদিমণি ?

না, আমি যাচ্ছি। কুণাল কোথায় ডেকে আন তো।

অনন্তকে শিবরামের বসবার ঘরে বসানো হয়েছিল। শ্বেতা অন্দরের দিকের দরজার একপাট বন্ধ করে বাঁ হাতে দরজার প্রান্ত চেপে আড়ালে দাঁড়িয়ে বলল, আপনাকে একটা অনুরোধ জানাতে বড়ো সংকোচ বোধ করছি।

অনন্ত এতক্ষণ নিবিষ্টচিত্তে দরজা বেয়ে একটা কাঠ পিপড়ের উর্ধ্বগতি নিরীক্ষণ করছিল, দরজার প্রান্তে খানিকটা শ্বেতবসন ও কয়েকটি শূন্য আঙুলের আবির্ভাব দেখে বুঝল ওদিকে কে এসে দাঁড়িয়েছে। নিঃশব্দে একটু অকারণ হাসি হেসে সে বলল, অনুরোধ জানাতে যদি সংকোচ হয়, আপনি আদেশ করতে পারেন।

অন্তরালে শ্বেতার বিস্ময়ের সীমা নেই ! এ কেমনধারা কথা ? গলার স্বরটাও যেন চেনা মনে হয় ! উঁকি মেরে দেখার কৌতূহল দমন করে শ্বেতা বলল, আপনাকে আমি আদেশ করতে পারি না, অনুরোধই করছি। আমার ছেলেকে স্কুলে ভর্তি করে দিতে চাই, কিন্তু ও স্কুলে যেতে চাইবে না। প্রথম কয়েকদিন আপনি যদি দয়া করে এসে ওকে সঙ্গে করে নিয়ে যান—

বাঁ হাতের আঙুলে কড়া হাতের স্পর্শ পেয়ে শ্বেতা চমকে থেমে গেল, তারপর দরজার পাটটা খুলে ফেলে ক্রুদ্ধ কণ্ঠে বলল, কী স্পর্ধা আপনার !

রাগে তার মুখ লাল হয়েই উঠেছিল, কিন্তু অনন্তের মুখের দিকে চেয়ে এক মুহূর্তে কাগজের মতো সাদা হয়ে গেল।

অনন্ত গম্ভীর মুখে বলল, স্পর্ধা নয় শ্বেতা। পিঁপড়ে।

পিঁপড়ে কী ?

কাঠপিঁপড়ে—যা কামড়ালে আঙুল ফুলে যায়, খুব বাথা হয়।

কই পিঁপড়ে ?

মেঝে থেকে পেঁচা পিঁপড়েটা তুলে হাতের তালুতে রেখে মৃদু হেসে অনন্ত বলল, এই যে। বিনা কারণে এতকাল পরে তোমার আঙুল ছোঁব কেন ? আড়াল ঘুচিয়ে দেবারও কোনো ইচ্ছাই আমার ছিল না। গলা শুনে যে চিনতে না পারে—

শ্বেতা আহত হয়ে বলল, চিনতে পেরেছিলাম। কিন্তু আজ সে চেনাকে আমি স্বীকার কবব কেন ? তোমায় চেনা আজ আমার অনুচিত নয় ?

অনন্ত হাসল, কী জানি ! উচিত-অনুচিত ন্যায়-অন্যায়ের সঙ্গে তোমার আজ কী সম্পর্ক আমার জানা নেই। কিন্তু অনুচিত যদি, এখন স্বীকার করলে কেন যে আমায় তুমি ভালো কবেই চেনো ?

তুমি মুখোমুখি দাঁড়ালে বলে। একটু বসি, মাথাটা ঘুরছে।

চেয়ার প্রত্য্যখান করে শ্বেতা জানালায় গিয়ে বসল। কপালে তাব বিন্দু বিন্দু ঘাম, নিশ্বাসে চাপা ঝড়ের ইঙ্গিত। এ কথা বিশ্বাস করতেও ভয় হয় যে এতকাল পরে এমন অকস্মাৎ সে আবার অনন্তের সঙ্গে একঘরে বসে আছে। প্রকৃতির কালবৈশাখী ওঠে বহুক্ষণব্যাপী গুমোটের নোটিশ দিয়ে, তার জীবনের এই সব প্রলয়ংকর ব্যাপারগুলি কি কোনো নির্দেশ না দিয়েই এমনভাবে সহসা তাকে কাতর করে তুলবে ! তার মনে আজও অনন্তের স্থান যে কোথায় এই বিচলিত ভাব এই চাঞ্চল্য তা কী স্পষ্টভাবেই প্রকাশ করে দিল ! যদি সে জানত অনন্ত আজ আসবে, প্রস্তুত হয়ে থাকার সময় পেয়ে সে কি এখন হাসিমুখে কথা কয়ে শান্ত আত্ম-সমাহিত ব্যবহার করে নিজেকে গোপন রাখতে পারত না ? এ কী বিড়ম্বনা !

এমনভাবে হৃদয় অনাবৃত হয়ে যাওয়ার লজ্জা সে এখন কোথায় রাখে ?

অনন্ত বলল, আমায় তোমার বসতে বলা উচিত শ্বেতা। মনে রেখ আমি যেচে আসিনি, তুমি ডেকে এনেছ। অতিথিকে পাদার্থ্যা দেওয়া এ দেশের প্রথা, তুমি অন্তত বসতে বলা ! বলে হেসে অনন্ত নিজেই একটা চেয়ারে বসল। অকস্মাৎ গম্ভীর হয়ে বলল, এর কোনো মানে হয় না, বুঝলে ? তোমার এই নীরব প্রতিবাদ অর্থহীন। জান, তোমার কপালের ঘাম মুছিয়ে দিলে আজও একটু অস্বাভাবিক হয় না ? হাসিমুখে কথা কও। তা না পার, কবিত্ব করে বলো, হে আমার জীবনের শনি, হে আমার প্রত্য্যখ্যাত প্রেমিক, অভিমান ভুলে তুমি যে আমায় আবার খুঁজে নিলে এতে আমি ধন্য হলাম। তোমার অকল্যাণের তীব্র প্রেমে আমায় ঢেকে দাও, ঘিরে রাখো !

শ্বেতা কাতর হয়ে বলল, চূপ করো। তুমি অমন করে বললে আমার চিন্তাশক্তি অসাড় হয়ে যায়। ভালোমন্দের জ্ঞান লোপ পায়। চিরদিন তোমার কাছে কী পীড়নটাই আমি পেলাম !

তুমি কি সহজ ভাগ্যবতী শ্বেতা ! তোমার জীবনের ইতিহাস জানলে বাংলার লাখে মেয়ের বুক হিংসায় ফেটে যাবে ! বৈচিত্র্য বেঁচে থাকাব প্রয়োজন ও সার্থকতার মাপকাঠি। তোমার জীবনে কী অসাধারণ বৈচিত্র্য আমি এনে দিয়েছি ? একদিকে ধনী মাতাল স্বামীর বিকর্ষণ, অন্যদিকে কবি ভাবুক প্রেমিকের আকর্ষণ ! সকলের ভাগ্যে এ কি জোটে !

শ্বেতা বিস্ময়িত চোখে শুনছিল, মুখ ফিরিয়ে নিয়ে বলল, তবু আমার মতো দুঃখী কেউ নেই। দুঃখই তো জীবনের সেরা বৈচিত্র্য—বলে অনন্ত হাসল।

শ্বেতা কিন্তু এ কথার জবাব দিল অপ্রত্যাশিত উষ্ণতার সঙ্গে—তুমি মিথ্যা বলছ। দুঃখ জীবনের বিড়ম্বনা। ছাব্বিশ বছরের বুডিকে তুমি দার্শনিক তত্ত্বকথা শোনাতে এস না আজ। আমার জীবন বিড়ম্বিত হয়েছে কীসে জানো ? তোমার দেওয়া দুঃখে।

অনন্ত স্মিত মুখে বলল, আমি কোনোদিন তোমার এ কথার প্রতিবাদ করব না শ্বেতা। আমি কেবল বলব, দশ বছরের বিরহীর কাছে দার্শনিক তত্ত্বকথা শোনার ভাগ্য সকলের হয় না।

দশ বছরের বিরহী !

বাঙ্গ করলে ?

না !

ইচ্ছে করলে করতে পার। কিছু এসে যায় না। কিন্তু সত্যি শ্বেতা, মন দিয়ে আমার উপদেশ শুনলে তোমার মনের প্রসারতা বাড়ত !

শ্বেতা ক্রিষ্ট স্ববে বলল, আমি তোমার সঙ্গে ঝগড়া করতে চাই না।

অনন্ত তৎক্ষণাৎ স্বীকার করে বলল, আমিও না। আমাদের ঝগড়ার সময় এখনও আসেনি, কী বল ?

এ কথার জবাব না দিয়ে শ্বেতা জানালা দিয়ে বাইবে চেয়ে রইল। বাগানের দিঘিটা চোখে পড়ে, দিঘির জল নাচিয়ে বায়ুর খেলা। বুকভরা ছোটো ছোটো উর্মি, চারিদিকে তট। তটে তটে তটোর্মির সঙ্কি।

দিঘির পশ্চিম তীরে দাঁড়িয়ে কুণাল জলে ডিল ছুঁড়েছে। দূর থেকে ছেলেকে দেখে শ্বেতার আজ যেন চমক লাগল। মাতাল স্বামীর খেয়ালের ভেতব দিয়ে বিধাতা যদি অমন অনুকম্পাই কবলেন, ওই সঙ্গে অনন্ত তুষণর অন্ত কবে এই অনন্তকেও ভুলিয়ে দিলেন না কেন ? তার ওই নাড়ি-ছেঁড়া ধনের সাত বছরব্যাপী প্রভাব ও আত্মমর্যাদার শিক্ষা কত সহজে ব্যর্থ করে দিচ্ছে এই একান্ত পর মানুষটি ! হায়, এ কী বিড়ম্বনা।

কুণাল মুখ তুলে চেয়ে জানালায় মাকে দেখে হাসল। শ্বেতার ইচ্ছা হল কপালে কঙ্কণহীন করাঘাত করে কেঁদে ওঠে !

অথচ জীবন যে রঙিন হয়ে উঠেছে বুঝতে কেবল প্রথম ধাক্কাটি সামলে ওঠারই বাধা ছিল। দশ বছর ধরে প্রেমিক ব্যথার পূজায় তাকেই নন্দিত করেছে, এর গর্ব আর আনন্দ কোনো নারীই কি অস্বীকার করতে পারে ! জীবনের একমাত্র পার্থিব প্রেমই সব যুক্তি-তর্ক বিশ্লেষণের প্রতিকূলেও দিনগুলি অবর্ণনীয় মাধুর্যে ভরে দেবার শক্তি রাখে বইকী !

সমবয়সি মাসি হিমালী বলে, তোর চোখ দেখে মনে হয় জেগে জেগে স্বপ্ন দেখিস। কদিন ধরে দেখছি রাতজাগা রোগেও ধরেছে।

শ্বেতা হেসে বলে, কবিতা লেখা অভ্যাস করছি। একটা অবলম্বন চাই তো মাসি !

মাসি গম্ভীর হয়ে বলে, কাব্য অবলম্বন করে পাড়ি জমাতে পারবি এমন আশা তুলেও করিস না।

আশা কিছুই করি না মাসি ! বলে শ্বেতা মাসির কাছ থেকে প্রশ্নান করে। মাসি কিন্তু অত সহজে ছাড়বার পাত্রী নয়, শ্বেতাকে খুঁজে নিয়ে আবার প্রশ্ন করে :

আমার খোকাকে একেবারে ত্যাগ করেছিস যে কদিন ?

আমার কাছে ও থাকতে চায় না,—কাঁদে।

কাল কিন্তু তোর কাছে যাবার জন্যই কাঁদছিল—বলে মাসি শ্বেতার মুখখানি ভালো করে নিরীক্ষণ করার চেষ্টা করেন।

শ্বেতা ব্যগ্রতা দেখিয়ে বলে, সত্যি মাসি ? তবে তো এফুনি ওকে আমার বড্ড দরকার !

মাসির খোকাকে খুঁজে নিয়ে শ্বেতা এমনই আদর আরম্ভ করে যে খোকা বেচারি কেঁদেই আকুল ! খোকার কান্নায় খুশি হয়ে শ্বেতা বলে, দেখলে মাসি ? সাথে কি নিই না ওকে !

যে আদরই তুই করিস ! একবেলা হবিষ্যি করে এত সফুর্তি তোর কোথা থেকে আসে তাই ভাবি।

বোনঝির মধ্যে কী একটা অদ্ভুত অসংগতি হিমালীর চোখে পড়ে, তাই এ রকম একটা সূক্ষ্ম খোঁচা না দিয়ে সে থাকতে পারে না। শ্বেতা মনে মনে রাগ করে, মাসির এই অনধিকার চর্চার কারণে সে খুঁজে পায় না। রাতভোর স্বামীর সোহাগ ভোগ কবে ভোরবেলা ও বিধবা বোনঝিকে খোঁচাতে আসে কেন !

শেষে শ্বেতার মন যায় খারাপ হয়ে। পশ্চিমের খোলা বারান্দায় চূপ করে দাঁড়িয়ে সে স্কুলের টিনের চালাটার দিকে চেয়ে থাকে। হেডমাস্টারের বাড়ি স্কুলের ওদিকে, বারান্দায় দাঁড়িয়ে দেখা যায় না। শ্বেতা ভাবতে থাকে, নির্জন গৃহে নিঃসঙ্গ অনন্ত কী করছে।

হিমালীর ছেলের কান্না, কুণালের চিৎকার করে পাঠাভ্যাস, নীচে ঝি-চাকরের কলরব সমস্ত তার কাছে হঠাৎ মিথ্যা হয়ে যায়, চারিদিকে ঘর বাড়ি মাঠের বৃকে সকালবেলার তাপহীন উজ্জ্বল রৌদ্রের ব্যাপ্তি, খানিকদূরে শিরীষগাছের শাখায় কয়েকটা শকুনির নিস্পন্দ অবস্থান, ঘোষেদের বাড়ির সামনের কাঁচাপথ দিয়ে মানুষের আনাগোনা, সমস্তই তার কাছে কেমন যেন দুর্বোধ্য হয়ে ওঠে, মনে হয় দুবেলা দেখেও তার এই ক্ষুদ্র পৃথিবীকে সে চিনতে পারেনি ; এতদিন যা নিত্যকার দেখায় তুচ্ছ হয়েছিল, আজ তাদের মধ্যে অজ্ঞান মানে, অতিরিক্ত মানে আবিষ্কার করা কঠিন নয়।

স্কুল থেকে এসেই কুণাল শুরু করে দেয়, জান মা, হেডমাস্টার মশাই আমাকে বাড়ি নিয়ে গিয়ে কত আদর করলেন।

কী আদর করলেন ?

এই চুমু খেলেন।

কোথায় চুমু খেলেন রে খোকা ? গালে ?

হুঁ।

শ্বেতা ছেলের দুটি গালই চুষনে ভরে দেয়, বলে, কার চুমু তোর বেশি ভালো লাগে বল তো ?

কুণাল সলজ্জ বলে, তোমার। হেডমাস্টার মশাইয়ের মুখে যা দাড়ি !

শ্বেতা নিঃশব্দে হাসে।

কুণাল নিজের মনে বলে, ওঁর ঘরে তোমার একটা ছবি আছে মা। লাল পর্দা দিয়ে ঢাকা। আমি পর্দা তুলে দেখে ফেললাম বলে বললেন, তুমি ভারী দুষ্টু খোকা। এমন মজা মা, ফুল দিয়ে তুমি অর্ধেক ঢেকে গেছ।

সত্যি খোকা ? শ্বেতার চোখ হঠাৎ ছলছল করে আসে। এ সেই ছবি, ন-বছর আগে শেখবিদায়ের দিন অনন্ত যেটা ভিক্ষা চেয়ে নিয়েছিল। কায়ার প্রত্য্যখ্যানে অনন্ত তবে ন-টি বছর ছায়া নিয়ে কাটিয়েছে ! হায়, মানুষটার জীবনে এ কী বিভ্রম !

নিজেকে তুচ্ছ মনে হয়, অকিঞ্চিৎকর। কুণালের অস্তিত্ব ভুলে গিয়ে শ্বেতা ভাবতে থাকে, বিনা তপস্যায় এত বড়ো সম্পদ তার জুটল কী করে ?

শিবরাম এসে বললেন, জানিস মা, আমাদের হেডমাস্টারটি বড়ো দুঃখী।

এ যেন জানা নেই এমনি ভাব দেখিয়ে শ্বেতা বলল, কেন বাবা ? ওঁর দুঃখ কী ?

শিবরাম গম্ভীর মুখে বললেন, সংসারে আপনার কেউ নেই, দেওয়ানা ফকিরের মতো ঘুরে বেড়ায়, দুঃখী বইকী ! বললে, ন-বছর আগে ওর বউ হারিয়ে গিয়েছিল, সেই থেকে—

বউ হারিয়ে গিয়েছিল ? ওঃ !

অনন্তের এই রূপকের চমৎকারিত্বে শ্বেতা'ব মন পুলকিত হয়ে উঠল। নিজের ঘরে গিয়ে সে নিজের মনেই আবৃত্তি করে চলল, বউ হারিয়ে গিয়েছিল ! বউ ! আজ আবার সেই হারানো বউকে পাওয়া গেছে। হারিয়েছিল তবুগী বউ, ফিরেছে ছাব্বিশ বছরের বুড়ি ! যে আজ মস্তুরও বড়ো ঈশ্বরের বিধান মেনে বউ হতে ভয় পায় না !

সকাল থেকে শ্বেতা আজ আনমনা হয়েছিল। সেদিন শমনজারি করে গিয়ে অনন্ত আর আসেনি বটে, আজ কিন্তু সে নিলামের দাবি নিয়ে আসবে। আগামী অভিসারের কল্পনাতেই দিনের আলোয় শ্বেতার গালে রক্ত খেলা করে যাচ্ছিল। বৃকের মধ্যে এখন থেকেই অনেক কিছুই যেন উত্তেজনায় খেপে উঠছে। তারই প্রতিক্রিয়ায় সারা দেহে এমনই অবসাদ যে কোনো কাজেই প্রবৃত্তি নেই।

ঝিকে দিয়ে নিজের ঘরখানা ধুয়ে মুছে রাখবে বলে খোঁজ নিয়ে শ্বেতা জানল, ঝি কোথায় যেন গেছে। বাড়িতে ঝি-চাকরের অভাব নেই, ঘর ধোয়ার কাজে কোনো বাধা হল না, কিন্তু দরকারের সময় নিজস্ব ঝিকে না পেয়ে শ্বেতা তার ওপর মনে মনে বিরক্ত হয়েই রইল।

ঝি ফিরতেই বলল, কোন চুলোয় গিয়েছিলি রাখীর মা ?

ঝি বলল, চুলোয় যাব কী জন্যে দিদি? হেডমাস্টারের বাড়ি গিয়েছিলাম। মা গো, কী কাণ্ডটাই হল !

কৌতূহলী হয়ে শ্বেতা বলল, কী কাণ্ড রে ?

শোনো বলি। রাখীর বাপের কাল জ্বর। আমায় বললে, কাজে তো যেতে পারব না রাখীব মা, সকালে একবার গিয়ে বাসনগুলো মেজে দিয়ে আসিস। কী করি, গেনু বাসন মাজতে হেডমাস্টারের বাড়ি। বাসনটা সন মেজে তো দিদি আমি চলে আসব, গটগট করে বাড়ির ভেতর ঢুকল এক ফিরিঞ্জি খেস্তান মেমসাহেব।

মেমসাহেব ?

খাঁটি মেম নয় গো, দিশি। কিন্তু কী রূপ দিদি, আহা ! মা দুগুগো যেন ফিরিঞ্জি মেয়ে হয়ে এলেন। পায়ে জুতো মোজা, ঘাঘরার মতো শড়ি পরা, গলায় লিকলিকে সবু হার। হেডমাস্টার তো ঘর থেকে বেরিয়ে ভিরমি যাবার জো ! হেঁকে বললে, তুমি কোথা থেকে এলে নীলা ? তোমায় না আসতে বারণ করেছিলাম ? মেয়েটা তার জবাবে বললে, তোমার কাছে না এসে কোথায় যাব ? তুমি আমায় ফেলে এলে কেন ? তারপর বিনিয়ে বিনিয়ে যা বললে দিদিমণি তাতে বুঝলাম মেয়েটা আমাদের মাস্টারের বউ।

কী বললে ?

বললে, আমি তোমার ইস্তিরি, তোমায় আমি ছাড়ব কেন? পিখিমির শেষ পর্যন্ত তোমার সঙ্গে ঘুরব আমি।

তারপর ?

তারপর দুজনায় বিবোম ঝগড়া শুরু হল। ভয়ে মরি, খুনোখুনিই বা হয়। মাস্টার গগন ফাটিয়ে চৌঁচিয়ে বললে, এই বদস্বভাবের জন্য তোমায় আমি দেখতে পারি না নীলা ! যারা গায়ের জোরে বিয়ে দিয়েছে তাদের কাছে যাও, আমার কাছে এসেছ কেন ? মেয়েটা বললে, আমার কী দোষ ? তোমার কাছে আমি কোনো অপরাধ করিনি। মাস্টার তাতে আরও চৌঁচিয়ে বললে, আমার দুর্বলতার সুযোগ নিয়ে ইস্তিরি হয়েছে, এই দোষ। যাও যাও চলে যাও তুমি। শূনে মুখে ন্যাকড়া গুঁজে মেয়েটা ফুঁপিয়ে কাঁদতে লাগল। মাস্টার আর কিছু না বলে গুম হয়ে দাওয়ায় বসে রইল। অনেকক্ষণ পরে বললে, কেঁদো না নীলা, এদিকে এসো। তারপর আমায় বললে, তুমি যাও ঝি। আমার কী চলে আসতে পা ওঠে ? কিন্তু কী করি—

লাটিমের মতো সারা বাড়িতে শ্বেতা একা পাক খেয়ে বেড়াতে লাগল, ভিতরের অস্থিরতার সঙ্গে বাইরের সামঞ্জস্য রেখে যতটুকু স্বস্তি মেলে। কিন্তু স্বস্তি তার কাছে চিরদিনের জন্যই দুর্লভ হয়ে গেছে।

পাকা খবর পাওয়া গেল শিবরামের কাছে। প্রাতর্ভ্রমণের পর ফেব্রার পথে আজও তিনি হেডমাস্টারের সঙ্গে আলাপ করতে গিয়েছিলেন।

বললেন, জানিস শ্বেতা আমাদের হেডমাস্টারের কাণ্ড ? ওর বউ হারানোর কথাটথা সব মিথো। এই বুড়োর সঙ্গে সে দিন একটু ইয়ার্কি দিয়েছিল। বুঝলি !

শ্বেতা নীরব।

ওর বউ আজ এসেছে।

শ্বেতা তবু নীরব।

শিবরাম কন্যার মন্তব্যের জন্য খানিক অপেক্ষা করে বললেন, মানুষটা অতি বদ, অতি বেহায়া। নিজে থেকেই বললে, একটা প্রণয়কাণ্ডের নায়ক হয়েছিলাম গাঙ্গুলি মশাই। স্বশুর আব শালারা জেলে দেবার ভয় দেখিয়ে—

শ্বেতা অসহিষ্ণু হয়ে বলল, আমি সব শুনছি বাবা। ওকে তুমি ডাড়িয়ে দাও। শিবরাম ক্ষুব্ধ হয়ে বললেন, তাড়াতে হবে না মা, ও নিজেই চলে যাচ্ছে। এদিকে স্কুলটার উন্নতি হচ্ছিল বেশ, অমন কাজের লোক কী আর পাওয়া যাবে !

শ্বেতা শিবরামকে সাত্বনা দিয়ে বলল, যাবে বাবা, ওর চেয়ে ভালো লোক পাওয়া যাবে। আমি তোমায় বলছি, ও যা কাজ করেছে সব লোকদেখানো, সব ভান, সব অভিনয়—

রকমারি

বাড়িতে পা দিতেই গৃহিণীর উচ্চকণ্ঠ কানে আসিল। বেড়াইয়া ফিরিতেছিলাম, মনটা বেশ প্রফুল্ল ছিল। ভাবিলাম, প্রফুল্লতাটুকু বুঝি চৌকাঠের বাহিরেই রাখিয়া যাইতে হয়।

ভিতরে আর ঢুকিলাম না। বৈঠকখানা ঘরটা অন্ধকার, ধীরে ধীরে সেখানে প্রবেশ করিলাম। সুইচটা টিপিয়া দিতে গিয়া হাত গুটাইয়া নিলাম। আলো জ্বালিলেই খবর পৌঁছবে। গৃহিণীর মুখের অন্ধকারের চেয়ে বাহিরের ঘরের অন্ধকারটা নিরাপদ মনে হইল।

জামাটা খুলিয়া চেয়ারের উপর ফেলিয়া রাখিয়া চৌকির উপর বিছানো ফরাশে গিয়া চূপ করিয়া বসিলাম।

পরিচিত কণ্ঠস্বর গ্রামে গ্রামে চড়িতে লাগিল। তীক্ষ্ণ কণ্ঠ, ততোধিক তীক্ষ্ণ বাক্যবাণ ; কাহাকে লক্ষ করিয়া যে প্রয়োগ হইতেছে বুঝিতে দেরি হইল না। সামনাসামনি কী রকম বিধিতেছিল ভগবানই জানেন, এতদূরে আসিয়া কিন্তু সবাসাচীর অব্যর্থ সন্ধানের দুর্ভাগ্য লক্ষ্যের মতো আমাকে বিধিতে লাগিল। একটা মোটা গলা সক্রোধে গর্জিয়া কী বলিতে যাইতেছিল, পরক্ষণে থামিয়া যাইতেছিল। প্রলয় গণিমা নিঃশব্দে বসিয়া রহিলাম।

কতক্ষণ পরে সুর নামিতে লাগিল। নামিতে নামিতে শেষে একেবারেই থামিয়া গেল। বুঝিলাম, অপবজন পৃষ্ঠপ্রদর্শন করিয়াছে।

পরক্ষণে পুরাতন ভূতা হরিচরণ ঘরে ঢুকিল। অন্ধকারে আমায় দেখিতে না পাইয়া খুব কাছেই বসিয়া পড়িল। বুঝিলাম কাঁদিতেছে। বিশেষ আশ্চর্যের কথা নয়। আমারই এক এক সময় কাঁদিতে ইচ্ছা করে। ও তো চাকর !

প্রশ্ন করিলাম, কী হয়েছে রে, হরে ?

ভূত দেখিলে মানুষ যেমন চমকিয়া ওঠে, এক হাত দূরে আমার সাড়া পাইয়া হরিচরণ সেই রকম চমকিয়া উঠিল। তাড়াতাড়ি উঠিয়া দাঁড়াইয়া বলিল, দেখতে পাইনি বাবু—

বলিলাম, আচ্ছা আচ্ছা, তাতে আর কী হয়েছে। তোকে বকছিলেন কেন রে ?

হরিচরণ কতক্ষণ চূপ করিয়া থাকিয়া যাহা বলিল, তাহার মর্ম এই : আজ সকালে গৃহিণী তাহাকে শয়নগৃহের দেওয়াল ঝাড়িতে আদেশ করেন। বাজার হইতে ফিরিয়া কাজটা করিবে ভাবিয়া সে বাজারে চলিয়া যায়। তারপর আলুপটলের হিসাবের গোলমালে কথাটা বেমালুম তার মন হইতে সরিয়া পড়ে। সন্ধ্যার আগে হঠাৎ ঘরের কোণে মাকড়সার জাল নজরে পড়ায় গৃহিণীর মেজাজ সপ্তমে চড়িয়া যায় এবং হরিচরণের উপর তৎক্ষণাৎ দেওয়াল ঝাড়িবার আদেশ জারি হয়। সে যত বলে, কাল করব মা, গৃহিণী ততই উষ্ণ হইতে থাকেন। অগত্যা হরিচরণ সেই ভর সন্ধেবেলা দেওয়াল ঝাড়িতে আরম্ভ করে। হঠাৎ নিতান্তই তার কপাল দোষে, ঝাড়নে লাগিয়া একখানা ছবি পড়িয়া গিয়া ভাঙিয়া যায়। সেই হইতে বর্ষণ শুরূ হইয়াছে। গৃহিণীর নাকি অভিমত—কাজ করিতে বলায় রাগে সে ইচ্ছা করিয়া ভাঙিয়াছে। নহিলে, সে কি চোখের মাথা খাইয়াছে যে অতবড়ো একটা জিনিস দেখিতে পায় না ?

আমি কি ইচ্ছা করে ভেঙেছি বাবু ? মা তো বুঝলেন না, কেবল বকুনি দিতে লাগলেন। এত কথা সয়ে থাকতে পারব না, কাল সকালে আমায় মাইনে দিয়ে বিদায় দেবেন।—বলিয়া উপসংহার করিল।

দরজার কাছে চড়া গলা শোনা গেল, কার কাছে মানের কান্না কাঁদছিল রে হরে ?

কাঠ হইয়া গেলাম। চাকরকে কাছে ডাকিয়া চুপিচুপি দুঃখের কাহিনি অর্থাৎ গৃহিণীর অদ্ভুত ক্ষমতার কথা শুনিতেছি, ইহার চেয়ে বড়ো অপরাধ আমাদের দাম্পত্য পেনাল কোডে লেখে না।

ঘরে ঢুকিয়া খপ করিয়া সুইচটা টিপিয়া দিলেন। আমার দিকে বারেক চাহিয়া মুচকি হাসিয়া বলিলেন, বেড়িয়ে এসে চাকরের মুখে আমার নিন্দেটা বড়ো মুখরোচক লাগছে, না ? বলিয়া বাহির হইয়া গেলেন।

হাসিটা ভয়ানক ! শব্দ রাগ ঠান্ডা হয়, কিন্তু হাসির আড়ালের রাগটা বড়ো বেয়াড়া, কিছুতেই বাগ মানিতে চাহে না।

হরিচরণ কথা কহিল না। তার ঘরে গিয়া বিছানা পাতিয়া সটান শয়ন করিল। উঠিলাম,— বসিয়া লাভ নাই। চেয়ারের উপর হইতে জামাটা টানিতেই একটা চায়ের কাপ জামার তল হইতে পড়িয়া তিন টুকরা বড়ো এবং বহু ক্ষুদ্র টুকরাতে বিভক্ত হইয়া গেল। জামায় তিন ইঞ্চি ব্যাসের একটি গোলাকার দাগ। বরাদ্দ দুই কাপের উপর তৃষ্ণা পাওয়ায় দোকান হইতে এক কাপ চা আনাইয়া চুপিচুপি এখানে বসিয়া খাইয়াছিলাম। কাপটা আমিই চেয়ারের উপরেই নামাইয়া রাখিয়াছিলাম। অপকর্মের অত বড়ো নীরব সাক্ষীটাকে সরাইয়া ফেলিবার মতো বুদ্ধি ঘটে ছিল না। হয় রে, সেই কিনা আমায় ফাঁসাইল। জামার এ অবস্থা দেখিলে—অগ্নিতে ঘৃতাহুতি বলিয়া একটা কথা আছে না ?

আলমাবি খুলিয়া মোটা মোটা আইনের বইয়ের পিছনে জামাটা লুকাইলাম, ভাবিলাম কাল সকালে ডাইং ক্রিনিং-এ পাঠাইয়া দিব। উপরে গিয়া শয়নগৃহে ঢুকিতেই নজরে পড়িল খাটের উপর পা ছড়াইয়া বসিয়া তিনি আমার একুশ টাকা দামের ফাউন্টেন পেনাট লইয়া একটা কাগজে খসখস করিয়া কী লিখিতেছেন। পায়ের শব্দে নজর তুলিলেন। বলিলেন, খালি গায়ে ? জামা কী হল ? বলিয়ে দিয়ে এলে নাকি ? ব্যস, ডাইং ক্রিনিং খতম। নিজের উপর চটিয়া গেলাম। অন্য একটা জামা গায়ে দিয়া এ ঘরে ঢুকিলেই হইত। এই কার্তিকের শেষে স্বামীর...খালি গা দেখিয়া কোন সুগৃহিণীর না জামার কথাটা মনে জাগে ! ওকালতি করিয়া বাহিরের লোকের আন্দাজ মতে মাসে তেরো চৌদ্দশো, নিজের হিসাবমতো সাত আটশো টাকা রোজগার করি, আব এইটুকু বুদ্ধি মাথায় আসিল না? ধিক ! বলিলাম, বাইরের ঘরে ফেলে এসেছি, নিয়ে আসছি। বলিয়া তাড়াতাড়ি পা বাড়াইলাম। আলমাবির বইয়ের পিছনের গোপনতাটুকু গোপন করাই শ্রেয়।

গৃহিণী বলিলেন, থাক থাক, তুমি বোসো ! ঝিকে দিয়ে আনিয়া নিচ্ছি। তুমি ওই ফ্লানেলের শাটটা গায়ে দাও !

কপাল ! বাহিরের ঘরের সেই জাতীয় সাংঘাতিক হাসি হাসিয়া পূর্বে বরাবর একটা গোটা রাত কথা বন্ধ করিয়া আসিয়াছেন। আর যেদিন জামায় চায়ের দাগ লাগিল এবং একটা হাস্যকর জায়গায় সেটা লুকাইয়া রাখিলাম, সেই দিনই তিনি এমন সদয় হইয়া পড়িলেন। ঝিকে ডাকিলেন এবং জামা আনিতে পাঠাইলেন। একটু সরিয়া বসিয়া নিজের পাশে খাটের উপরকার জায়গাটা দেখাইয়া বলিলেন, এইখানে বোসো, একটা কাজ আছে। আগে শাটটা গায়ে দিয়ে নাও। বেশ ঠান্ডা পড়েছে আজ, তোমার আবার যে সর্দির ধাত !

ওঃ ! কাজ আছে তাই ! প্রয়োজনের খাতিরে অমন হাসিটাকে নিরর্থক হইতে দিবার উদারতা গৃহিণীর ছিল।

জামাটা গায়ে দিয়া নির্দিষ্ট স্থানে বসিলাম। বলিলেন, মৃগালিনীকে চেন তো ?

ঘাড় নাড়িয়া বলিলাম, চিনি।

কে বলো তো ?

বঙ্কিমবাবুর মানস কন্যা, এবং—

এবং তোমার প্রণয়িনী।—

আমি বলিলাম, থুঃ, ওয়াক্ !

গৃহিণী বলিলেন, তাই নাকি ! বেশ বেশ। শূনে সুখী হলাম। ঠাট্টা এখন থাক, কাজের কথা শোনো ! এ তোমার সে মৃগালিনী নয়, আমার সেই। ধীরেনবাবুর স্ত্রী গো ! মনে নেই !

মনে ছিল, কিন্তু বলিলাম, উঁহু, মনে তো পড়ছে না।

তিনি বলিলেন, থাক থাক অত সাধু বনতে হবে না। যার গান শূনে ধীরেনবাবুর সঙ্গে স্ত্রীবদল করতে চেয়েছিলে তার কথা তিন মাসেই ভুলেছ বটে !

সর্বনাশ ! ধীরেনের কানে কানে বলা সেই পরিহাসটুকুও শুনিতে বাকি নাই !

বলিলেন, এখন শোনো। সেই ভারী একটা মজা কবেছে। আমার কাছে একটা চিঠি লিখেছে, ইংরিজিতে। একটা ভালো রকম জবাব লিখেছি, কারেক্ট করে দাও দেখি। বুদ্ধি তোমার যদিও কম, এম এ বি এলটা তো পাশ করেছ, পারা উচিত। ভুল থাকলে কিন্তু ধীরেনবাবু হাসবেন !

বলিলাম, মজুরি ?

অগ্রিম চাই ?

নিশ্চয়ই। যদি ফাঁকি দাও !

কণ্ঠস্বর যে কণ্ঠেই বাস করে সে বিষয়ে সন্দেহ নাই। নহিলে, ওষ্ঠে বাস করিলে গৃহিণীর নই। পঁচিশ বৎসর বয়সের অধবসুধাই ঝাল লাগিত এবং ওষ্ঠ জ্বলিত।

বাহির হইতে ঝি বলিল, বাইরের ঘরে বাবুর জামা তো পেলুম না মা। গৃহিণী আমার মুখের দিকে চাহিলেন, বলিলেন, সদব দরজা বন্ধ ছিল দেখে এসেছিস।

ঝি বলিল, নজর করিনি মা।

নজর করিসনি ! ঘরে গেলি, একটা জামা খুঁজলি, আর তোর নজরে পড়ল না সদব দরজা খোলা কী বন্ধ ! চোখ চেয়ে কাজ করিস ? না, কাজ করবার সময় স্বপ্ন দেখিস ? অবাক করলি বাছা ! যা দেখে আয়।

ঝি চলিয়া গেল এবং ফিরিয়া আসিয়া জানাইল, সদর দরজা খোলাই ছিল।

বেশ ! সেদিন এতটাকা খরচ করে এমন সুন্দর সাদা ভয়েলের পাঞ্জাবিটা করিয়ে দিলুম, যাবেই তো !

আমি আমতা আমতা করিয়া বলিলাম, আমি একবার দেখে আসি। বলিয়া নীচে নামিয়া গেলাম। আইনের কেতাবের পিছন হইতে জামাটা টানিতেই, খোঁড়াব পা যে খানায় পড়ে ইহাব সত্যতা প্রমাণ করিবার জন্যই বোধ হয়, কোথায় একটা পেরেক লুকাইয়া ছিল। জামা খানিকটা ছিঁড়িয়া গেল। উহা লইয়াই উপরে গেলাম।

ঝি আসিয়া দাঁড়াইল।

গৃহিণী বলিলেন, জামা যে পেলিনে, এটা কী ?

দেখতে পাইনি মা।

তা দেখতে পাবি কেন ! এমন ব্যাগার ঠালা কাজ করিস কেন বল তো ? এটা কি ছুঁচ না আলপিন যে কোথায় লুকিয়ে ছিল খুঁজে পাসনি ?

ঝি চুপ করিয়া রহিল।

গৃহিণী আরও কী বলিতে যাইতেছিলেন, ঝির দিকে চাহিয়া হঠাৎ বলিলেন, তুই কাঁপছিস কেন রে ?

শরীরটা ভালো লাগছে না মা।

গৃহিণী তৎক্ষণাৎ আগাইয়া গিয়া তার কপালে হাত দিলেন। বলিলেন, ইস, তাইতো ! বেশ জ্বর হয়েছে যে ! আচ্ছা তুই কী রকম মানুষ বল তো ঝি ? জ্বর গায়ে কে তোকে কাজ করতে বলেছে ? সন্ধ্যাবেলা অতগুলো বাসন মাজলি তুই কোন আক্কেলে শূনি ? একটা বাড়াবাড়ি অসুখ বাধিয়ে আমায় দশটা টাকা খরচ করাবার মতলব, না ? যা যা শূয়ে পড়গে যা। অবাক মানুষ তুই বাছা !

ঝি বলিল, ঠাইটা করে দিয়ে শুছি মা।

ফের মুখের ওপর কথা বলে ! কাল যদি তোকে দূর না করি তো--ভালো চাস তো শূয়ে পড়গে যা বাছা। কেন বকছিস, অসুখটা বাড়লে হাঙ্গামা তো আমাকেই পোয়াতে হবে !

ঝি আর কথাটি না বলিয়া চলিয়া গেল।

গৃহিণী একটু দাঁড়াইয়া থাকিয়া বলিলেন, দেখিগে শুলো কি না। যে সব তোমার ঝি-চাকর ! একটা যদি কথা শোনে ? বলিয়া চলিয়া গেলেন।

ফিরিয়া আসিয়া আমার জামাটা লইয়া আলনায় টাঙাইতে গিয়া গৃহিণী সেই দাগ ও ছেঁড়া দেখিতে পাইয়া বজ্রগর্ভ দৃষ্টিতে আমার পানে চাহিলেন।

দাগ ও ছেঁড়ার একটা কাল্পনিক ইতিহাস আরম্ভ কবিয়াছিলাম,—ওটা হয়েছিল কী জান ?— এই গিয়ে—

এ সময় সৌভাগ্যক্রমে নীচে বন্ধু নীরদবরণের কণ্ঠ শুনিলাম, ওহে—ঘুমুলে নাকি ?

নীবু এসেছে। কী বলছে শূনে আসি।—বলিয়া আমি চম্পট প্রদান কবিলাম।

নয়টার সময় বন্ধুকে বিদায় দিয়া, দুর্গানাম জপ করিতে করিতে উপরে গিয়া দেখি, গৃহিণী একমনে একখানি চিঠি পড়িতেছেন। মুখেব মেঘ কাটিয়া গিয়াছে।

নয়টার সময় আহার শেষ কবিয়া আবার নীচে নামিলাম। আপিস ঘবে ঢুকিয়া মোকদ্দমাব কাগজপত্র লইয়া বসিলাম। হঠাৎ মনে পড়িল আমার জ্যেষ্ঠ শ্যালকের তিনদিন হইল পত্র আসিয়াছে। পত্রে বহুদিন আমার কোনো পত্র না লেখার জন্য অনুশোাগ আছে এবং গৃহিণীও সে পত্রখানা পড়িয়াছেন। তৎক্ষণাৎ কাগজ লইয়া পত্র লিখিতে বসিলাম। লেখা শেষ করিয়া খামে ভরিয়া ঠিকানা লিখিতেছি, গৃহিণীর গলা কানে গেল, ভালো চাস তো উঠে আয় হবে, আমাকে রাগাস নে বলে দিচ্চি ! খাবি না তো তুই বিকেলে বললি না কেন ? অত ভাত নষ্ট হবে ?

হরের জবাব শোনা গেল, আমার অসুখ হয়েছে, আমি খাব না।

গৃহিণী বলিলেন, সে সব আমি জানি। চাকরি করতে এসে ভাতের ওপর রাগ করিস তোর লজ্জা করে না হারামজাদা ? উঠে আয় বলছি !

হরে বলিল, আমি খাব না।

গৃহিণী, বেশ ! বলিয়া স্থান ত্যাগ করিলেন এবং আমার আপিস ঘরে ঢুকিয়া একটা চেয়ারে বসিয়া পড়িলেন।

ঠিকানার উপরে ব্লটিং চাপা দিয়া বলিলাম, খাওয়া হয়েছে তোমার ?

হুঁ।

হরে বুদ্ধি খেলে না ?

বৎকার দিলেন, শুনতে পাও না ? এতক্ষণ ধরে সাধছিলাম কাকে ?

আমি চুপ করিয়া রহিলাম। কথা বলাটা নিরাপদ নয়।

কতক্ষণ পরে আশ্বে আশ্বে বলিলেন, তুমি একবার হরেকে বলো গে না !

আমি ? তুমি বলতে খেলে না, আর আমার কথা শুনবে ?

চুপ করিয়া রহিলেন।

আমি বলিলাম, মবুক, নিজেই খিদেব জ্বালায় জ্বলবে। একটা চাকর, তাকে আবার খোশামোদ করে খাওয়াতে হবে, ভারী তো ! চলো শোবে, রাত হল।

চলো, বলিয়া তিনি উঠিয়া দাঁড়াইলেন।

শয়ন ঘরে ঢুকিয়া বলিলেন, আচ্ছা, একটা শেষ ধর্মের ডাক দিয়ে আসি। একটা লোক না খেয়ে থাকবে তাই, নইলে—কথাটা শেষ না করিয়াই তিনি চলিয়া গেলেন। আমি একটু হাসিয়া বাবান্দায় রেলিংয়ের কাছে দাঁড়াইলাম।

গৃহিণীর শাস্ত গলা শোনা গেল, হরে, লক্ষ্মী বাবা ! উঠে এসে খেয়ে নে। মিথো জ্বালাস কেন বল দেখি ?

আমার খিদে নেই, খাব না মা।

হরে !—কণ্ঠস্বর ঠিক কোন গ্রামের বলা শক্ত ! কিন্তু অতি তীক্ষ্ণ। এবং ভর্ৎসনা, ক্রোধ, সাত্বনা ইত্যাদি এতগুলি ভাব লইয়া ওই একটি কথা উচ্চারিত হইল যে শুনিলে অবাক হইতে হয়।

হরিচরণ আর দ্বিবুক্তি না করিয়া উঠিয়া আসিল।

গৃহিণী বলিলেন, রান্নাঘরে ভাত ঢাকা আছে, খেয়ে দরজা বন্ধ করে শুয়ে পড়ো। কাল সকালে মাইনে নিয়ে তুমি বাবু বিদেয় হয়ে। তোমাকে দিয়ে আমার পোষাবে না। বলিয়া উপরে উঠিয়া আসিলেন। নীচের বাবান্দায় আলোতে দেখিলাম হরিচরণ নিঃশব্দে রান্নাঘরে গিয়া ঢুকিল।

তিনি উপরে উঠিবার আগেই আমি ঘরে ঢুকিয়া খাটের উপব বসিলাম। তিনি আসিলে বলিলাম, খেলে ?

দরজায় খিল দিতে দিতে বলিলেন, হুঁ, খাবে না আবার। কাল কিন্তু ওকে দূর করব।

আমি বলিলাম, বেশ তো।

পাশে বসিয়া বলিলেন, চিঠিটা কারেক্ট করেছ ? কাল সকালের ডাকে যাওয়া চাই কিন্তু।

বলিলাম, না।

কেন ? সময় হল না বুঝি ?

গম্ভীরভাবে বলিলাম, তুমি না ম্যাট্রিক পাস করেছিলে ? না, বিয়ের সময় ওই কথা বলে আমাদের ঠকানো হয়েছিল ? ম্যাট্রিক পাস করেছ আব শুদ্ধ করে ইংরাজিতে একখানা চিঠি লিখতে পার না ?

কে বললে পারি না ? তবে, হঠাৎ যদি ভুল থাকে, চর্চা তো নেই ! তাই তোমায় অনুরোধটা জানিয়েছিলুম—তা ঘাট হয়েছে। বিয়ের সময় তোমার মামা না কে পুৰো আধঘণ্টা ধরে ম্যাট্রিকের সার্টিফিকেটখানা ঘুরিয়ে ফিরিয়ে দেখেছিলেন, মনে নেই ?

আমি হাসিয়া তাকে নিকটে আকর্ষণ করিয়া বলিলাম, তাই নাকি ! তবে তো কথাই নেই। আচ্ছা দেব কাল কারেক্ট করে।

আমার গলা জড়াইয়া ধরিয়া বলিলেন, আবার কাল ! তোমায় একটা কাজ করতে বললেই দশটা ওজোর কর। বেশি রাত হয়নি, পাঁচ মিনিটও লাগবে না, দাও না লক্ষ্মীটি এখনি। কাল সকালের ডাকে পাঠিয়ে দেব।

আদেশ প্রতিপালন করিলাম।

পরদিন প্রাতে হরে আসিয়া বেতন ও বিদায় চাহিলে গৃহিণী তাহাকে শুধু মারিতে বাকি রাখিয়াছিলেন। সন্ধ্যায় ফিরিয়া দেখি আমার সেই চায়ের দাগ-ধরা নূতন ফ্রান্সেলের পাঞ্জাবিটা হরে গায়ে দিয়া বেড়াইতেছে। ছেঁড়া অংশটুকু গৃহিণী সেলাই করিয়া তাহাকে দিয়াছেন।

কবি ও ভাস্করের লড়াই

প্রতিভার প্রতি চারণী দেবীর বিশেষ পক্ষপাতিত্ব ছিল। রূপ কাকে বলে জানার পর থেকেই সে জানত এ তার মন উদ্বুদ্ধ করতে পারে। অল্প বয়স থেকে এই ধরনের একটা জ্ঞান মনের মধ্যে পুষে রাখার ফলে চারণীর ধারণা জন্মে গিয়েছিল যে একটি বিশেষ বৃহৎ প্রতিভাকে বৃহত্তর প্রতিভায় পরিবর্তিত করার জন্য সে পৃথিবীতে এসেছে; তার নারী-জীবনের উদ্দেশ্য লক্ষ্য ও সার্থকতা সন্তান-পালনের মতো প্রতিভার প্রতিপালনে। অবিকল এই উদ্দেশ্যের উপযুক্ত করে চারণী নিজেকে গড়ে তুলেছিল। কবি, চিত্রকর, ভাস্কর অথবা নিছক গদ্য-সাহিত্যিক ঠিক কোন ধরনের প্রতিভার বিকাশের ভারটা তাকে গ্রহণ করতে হবে জানা না থাকায়, সব দিক বজায় রাখার জন্য, এই চার রকম প্রতিভার উপযুক্ত করেই নিজেকে সে তৈরি করেছিল। স্কুল-কলেজে এ রকম ব্যাপক ও অবাস্তব শিক্ষার ব্যবস্থা নেই; স্কুল-কলেজ প্রতিভাকে মানে না। স্কুল ছাড়িয়ে চারণী তাই আর কলেজে ঢোকেনি। বাড়িতে নিজেরই তত্ত্বাবধানে সে চারটি ক্লাস করত। সকালে কবিতার, দুপুরে ছবি ও খোদাই-এর, রাতে গদ্যসাহিত্যের।

এমনিভাবে পুস্তক ও অ্যালবামের মধ্যস্থতায় চারণী জগতের বড়ো প্রতিভার সঙ্গে পরিচিত হতে লাগল কিন্তু রক্তমাংসের প্রতিভার খোঁজ সে পেলে না। দু-চারজন কবি শিল্পী ও সাহিত্যিক যাদের সঙ্গে তার আলাপ হল তারা এত গরিব যে তাদের প্রতিভাকে চারণী মেনে নিতে পারলে না। তা ছাড়া, এ রকম প্রতিভার বিকাশের ভার নেবার সাধ চারণীর কোনো দিনই ছিল না। টাকাপয়সার গোলমাল সে অত্যন্ত অপছন্দ করত। প্রতিভার জন্য জীবন উৎসর্গ করতে সে সর্বদাই রাজি ছিল কিন্তু আজ-আনো-আজ-খাও কালকে-উপোস-দাও যে প্রতিভা তার জন্য দু-চারঘণ্টা সময় ও দু-চার কাপ চায়ের বেশি আর কিছু উৎসর্গ করা তার কাছে ছিল নষ্ট করার শামিল। জীবন অমূল্য। দুটো-পাঁচটা ফালতু জীবনও মানুষের থাকে না যে নষ্ট করা চলে। চারণী তাই তার পরিচিত গরিব প্রতিভাগুলির পাশ কাটিয়ে চলত। সুতরাং পাশে পাশে চলবার মতো প্রতিভাও সে আবিষ্কার করতে পারত না।

বেড়ে বেড়ে চারণীর বয়স যখন হল একুশ এবং তার ক্ষীণ আর্টিস্টিক দেহটি একটু স্থূল হয়ে উঠবার উপক্রম করলে তখন ভয় পেয়ে ও হতাশ হয়ে প্রতিভা-চিনির বোঝাবাহী এক ভাষাতত্ত্বের অধ্যাপকের কাছে নিজেকে সমর্পণ করে দেওয়া সে প্রায় স্থির করে ফেললে। এমন সময় প্রায় এক সঙ্গে দুজন ধনবান রূপবান বলবান প্রতিভার আবির্ভাবে চারণীর জীবনে একটা খণ্ডপ্রলয় হয়ে গেল। প্রথম এল অরবিন্দ—উদীয়মান ভাস্কর। তারপর, অরবিন্দের সঙ্গে চারণীর বিয়ের কথা যখন পাকা হয়ে এসেছে, তখন এল মহাব্রত,—উদীয়মান কবি।

দুজনেই প্রতিভা। মরবার আগে সাগর পারে দু-চারজন ভক্ত না রেখে ওরা কেউ মরবে না, এটুকু নিঃসন্দেহ। চারণীর ভারী বিপদ হল। দুটি প্রতিভা-স্রোতের সম্পর্কে যে ঘূর্ণাবর্ত সৃষ্টি হল তাতে পাক খেয়ে খেয়ে তার মাথা এমনই গুলিয়ে গেল যে সে কোনোমতেই ঠিক করে উঠতে পারলে না কোন স্রোতে ভেসে যাবে। আসলে চারণীর একেবারেই মনের জোর ছিল না। যখন যে প্রতিভাটি তার কাছে থাকত তার মনে হত তাকেই সে ভালোবাসে। দুজনের দুরকম কিন্তু প্রায় সমান জোরালো ব্যক্তিত্ব দিনের মধ্যে অন্তত দশবার তাকে পেড়ুলামের মতো এদিক-ওদিক দোলাত আর বাকি

সময়টা দুজনের সমান আকর্ষণ অনুভব করে তার মনে হত নিজেকে চুলচেরা দুভাগে ভাগ না করে ফেললে এ টানাটানি সমস্যার আর শীমাংসা নেই।

আগে এসেছিল বলে অরবিন্দের কিছু কিছু দখলি স্বত্ব জন্মেছিল কিন্তু মহাব্রত এক রকম কথা বলেই তা বাতিল করে দিলে। এদিক দিয়ে অরবিন্দের চেয়ে সে ছিল বেশি শক্তিম্যান। আশ্চর্য ছিল তার কথা বলার ক্ষমতা। তার বক্তব্য রূপ নিত বক্তৃতার এবং তাতে যেখানে অখণ্ডনীয় যুক্তি থাকত না সেখানে থাকত বেগবতী আবেগ, আর যেখানে বেগবতী আবেগ থাকত না সেখানে থাকত অখণ্ডনীয় যুক্তি। দশ মিনিট তার কথা শুনে চারণী ভেসে যেত। তার আর বিন্দুমাত্র সন্দেহ থাকত না যে তার জীবনের একমাত্র উদ্দেশ্য লক্ষ্য ও সার্থকতা এই বিস্ময়কর মুখর কবি-প্রতিভাকে সন্তানের মতো প্রতিপালন করা। মহাব্রত চলে যাবার পর অরবিন্দের আবির্ভাব ঘটা পর্যন্ত চারণী উত্তেজিত হয়ে থাকত। অরবিন্দ এসে বেশি কথা বলত না, যা বলত তাও মৃদু স্বরে, যার প্রধান সুরটা হত আদরের। মাঝে মাঝে চোখ তুলে তাকিয়ে সে স্নানভাবে একটু হাসত। দেখে চারণীর মন যেত গলে। তার মনে হত মহাব্রতের মুখর প্রেমের চেয়ে অরবিন্দের নিঃশব্দ ভালোবাসা টের বেশি কাবাময়। মহাব্রতের উপস্থিতি অপ্রাভাবিক, উন্মাদনাকর, অরবিন্দের কাছে বসে থাকার চেয়ে স্বাভাবিক কিছু নেই। চারণী টের পেত মহাব্রতকে সে ভয় করে। ভালোবাসা দিয়ে যত নয় এই ভয় দিয়ে মহাব্রত তাকে বশ কবেছে। মহাব্রতের প্রচণ্ড অস্থির জীবনীশক্তি তাকে আচ্ছন্ন অভিভূত করে দেয়, তাই তার কাছে বসে থাকার সময় জগতে আর কোনো মানুষ আছে বলে সে ভাবতে পারে না। এখানে অরবিন্দকেই সে ভালোবাসে।

চারণীর এই দ্বিধা ও সন্দেহের ফলে যে অবস্থার সৃষ্টি হল তা এমনই জটিল যে বিশদ বর্ণনা ও ব্যাখ্যা দিতে গেলে মনস্তত্ত্বের গবেষণার মতো শোনাবে। ঘটনাচক্রে প্রতিভা দুজনের একজন যদি কয়েকটা দিনের জন্য দূরে সরে যেত তাহলে সব গোলমালের অবসান হতে পারত, কিন্তু যেহেতু চারণীর কাছে একা থাকার সময় তাদের প্রত্যেকে টেব পেত চারণী তাকেই ভালোবাসে, কোনো ঘটনাচক্রেই তাদের একটি দিনের জন্য তফাতে নিয়ে যেতে পারত না, লুকোচুরি খেলার মতো চারণীকে নিয়ে তারা জয়পরাজয়ের খেলা খেলত। সকালে চারণীকে জয় করে যেত মহাব্রত, বিকালে বিজয়ী হত অরবিন্দ। যেদিন চারণীর হৃদয়-দুয়ারে তাদের আবির্ভাব ঘটত একসঙ্গে সেদিন ঠিক কে যে জয়ী হল বুঝতে না পেরে দুজনে অত্যন্ত বিচলিত হয়ে বাড়ি ফিরত, আর দুর্বলচেতা চারণী দ্বিধাসন্দেহের পীড়নে ছটফট করে রাত কাটাত।

মোটা হতে আরম্ভ করে চারণী ভয় পেয়ে রোগা হবার জন্য খাদ্যনিয়ন্ত্রণ আরম্ভ করেছিল, পেট ভরে খেত না, পুষ্টিকর খাবার এড়িয়ে চলত। ফলে, এই সময় মোটা হওয়া স্থগিত হলেও তার মনের মতো তার শরীরটাও খুব দুর্বল হয়ে পড়েছিল। তার ওপরে তার অদ্ভুত সমস্যার অবিরাম পীড়ন সে সহ্য করতে পারলে না। তার অনিদ্রা অজীর্ণ ও অস্থলের ব্যারাম হল। তারপর হল নার্ভাস ব্রেকডাউন। একদিন মহাব্রত ও অরবিন্দ দেখা করতে এলে দুজনকেই সে তাড়িয়ে দিলে এবং আশ্রয় নিলে শয্যার। তার অসুখের সংবাদে ব্যাকুল হয়ে মহাব্রত ও অরবিন্দ বারবার তাকে দেখতে ছুটে গেল কিন্তু চারণী খবর পেয়ে চেষ্টামেচি করে বাইরে থেকেই তাদের বিদেয় করে দিলে।

তারপর একদিন বাড়ির সকলে শহরের অন্য প্রান্তে বিয়ের নেমস্তম্ভ রাখতে গেছে, খালি বাড়িতে চারণী অনেক রাত অবধি ঘুমোবার ব্যর্থ চেষ্টা করে মরিয়া হয়ে একরাশি ঘুমের ওষুধ খেয়ে ফেললে। একরাত্রির ঘুম অথবা চিরনিদ্রা কোনটা তার কাম্যা ছিল জানবার উপায় নেই, পরদিন অনেক বেলায় তার ঘরের দরজা ভেঙে দেখা গেল সে মরে গেছে। মরবার সময় বৃকে বোধ হয় খুব যত্নগা হয়েছিল, জামা ছিঁড়ে আঁচড়ে-আঁচড়ে নিজের বুক সে ক্ষতবিক্ষত করে ফেলেছে।

খবর পেয়ে প্রতিভা দুজন দেখতে গেল।

চারবীর একটি বউদি ছিল, অল্প বয়সে চারণীর অত্যন্ত বিদ্বান ও অত্যন্ত নীরস দাদার সঙ্গে তার বিয়ে হয়। চোখের সামনে চারণীকে দুটি প্রতিভার পূজো পেতে দেখে তার বোধ হয় খুব হিংসা হত। সেই দুজনকে চারণীর ক্ষতবিক্ষত বুকটা দেখালে।

কৈদে বললে, বুক কত যাতনাই না জানি হয়েছিল।

চারণীর মৃত্যু অথবা অপমৃত্যুর আগে এ কথা অনায়াসেই মনে করা চলত যে তার প্রেমিক প্রতিভা দুটির মধ্যে লড়াই বাধিয়ে সে কৌতুক উপভোগ করছে। সাধ করে যে মেয়ে নিজেকে প্রতিভার উপযুক্ত করে গড়ে তোলার পাগলামিকে প্রশ্রয় দিতে পারে সে এ রকম কৌতুক উপভোগ করবে তাতে বিস্ময়ের কী আছে। চারণীর মৃত্যুর পর এও খুব সহজে অনুমান করা গিয়েছিল যে জীবনের স্বাভাবিক নিয়মে প্রতিভা দুটি এবার তাদের মৃত্যু প্রিয়াকে অতি দ্রুত বিস্মৃত হবে। দুটি প্রেমিকের মধ্যে লড়াই বাধিয়ে যে মেয়ে মজা দ্যাখে তাকে মনে রাখবে এমন প্রেমিক জগতে কে আছে ? আসলে এ রকম মেয়ের প্রেমেই কেউ পড়ে না। জয় করার জেদটাকে মনে হয় প্রেম। মরে গেলে অথবা সরে গেলে এ রকম মেয়েকে মনে রাখার বিশেষ কোনো কারণ থাকে না। যে রাজ্য রসাতলে গেছে তার অধিকার নিয়ে মামলাবাজ দুটি রাজা হয়তো মারামারি করে মরে, হৃদয়-সংক্রান্ত জয়পরাজয়ের সমস্যা হৃদয়ের সঙ্গে অন্তর্হিত হয়, জেদ যায় জুড়িয়ে, মৃত্যুর স্মৃতির প্রতি একটু দয়র্দ কোমলতা ছাড়া প্রেমের চিহ্নটুকু থাকে না। মহাব্রত ও অরবিন্দের কাণ্ডকারখানা দেখে প্রথম টের পাওয়া গেল নিছক রেবারেবি তাদের প্রেমের ভিত্তি ছিল না, চারণী তাদের নিয়ে কৌতুক করেনি। প্রতিভা দুটির শোকের মাপকাঠিতে আবার মাপজোক করে চারণীর হৃদয়ৈশ্বরের নূতন পরিমাণটা আবিষ্কার করে আমাদের অবাক হতে হল। ওরা দুজনে প্রমাণ করে দিল দু-ফোঁটা চোখের জল নিয়ে মরবার মতো সাধারণ মেয়ে সে ছিল না। হৃদয়-জয়ের বিপুল প্রতিভাই তার ছিল।

অরবিন্দ মানুষের সঙ্গে ত্যাগ করে স্টুডিওতে আশ্রয় নিল, মহাব্রত চিন্মু আর ফিরিঙ্গি হোটোলে রকম-রকম পানীয় চেখে বেড়াতে লাগল। একজন শুকিয়ে যেতে লাগল ঘরের কোণে নীরবে, আর একজন শুকিয়ে যেতে লাগল বাইরে হইচই করে। লড়াই যেন তাদের থামেনি। প্রকৃতিগত বৈশিষ্ট্য বজায় রেখে তারা যেন চারণীর জন্য পান্না দিয়ে শোক করতে লাগল। তাদের প্রতিভায় যারা সন্দেহ করত এবার তাদের সন্দেহ দূর হল। অল্পবিস্তর উন্মত্ততা প্রতিভার সবচেয়ে বড়ো প্রমাণ।

তাদের এই অসামাজিক অস্বাভাবিক জীবনযাপনে আত্মীয়স্বজন ব্যথিত হল, প্রতিবাদ করল, বন্ধুবান্ধব হাসিগল্পের আড্ডায় টানবার চেষ্টা করল, কিন্তু তাদের নির্লিপ্ত ভাব অব্যাহত রইল। হাসতে না জানলে এ জগতে বন্ধু টেকে না, দুজনের মনোবিকার সহ্য করতে না পেরে বন্ধুরা তাদের রেহাই দিল। ব্যর্থ হয়ে হাল ছাড়ল আত্মীয়স্বজন। শহরের লক্ষ লক্ষ মানুষের মধ্যে তারা নিঃসঙ্গ হয়ে গেল। কেবল একজন, পরের সুখদুঃখ নিয়ে নাড়াচাড়া করার প্রবৃত্তি যার মজাগত, সে-ই জোঁকের মতো দুজনের পিছনে লেগে রইল। সে চারণীর ঈর্ষাতুরা বউদি প্রিয়ংবদা। কানাঘুষায় এদের ব্যাপার শুনে সে যেদিন জানতে পারল ভালোবাসার চোটে তার নন্দদটিকে মেরে শোকের চোটে এবার এরা নিজেদের মারছে, সেইদিন দারোয়ান পাঠিয়ে দুজনকে সে করল নেমস্তন্ন। কিন্তু এরা কেউ গেল না। তাতে অপমান বোধ করে প্রিয়ংবদা দিন পনেরো আর উচ্চবাচ্য করল না। কিন্তু পরের সুখদুঃখের কারবার আয়ত্ত করার কৌতূহল প্রিয়ংবদার বড়ো তীব্র। পনেরো দিন উঠতে বসতে যতবার তার মনে হল একটা লায়লা ও দুটি মজনের আবির্ভাবের মতো বিস্ময়কর ব্যাপার তার আশেপাশেই ঘটেছে, অথচ সময়মতো ব্যাপারটা সে ভালো করে অধ্যয়ন করেনি ততবারই তার বুকের মধ্যে কেমন করে উঠতে লাগল। সে আবার দারোয়ান পাঠাল। এবার এরা দুজনেই নেমস্তন্ন গ্রহণ করল

কিন্তু নেমস্তম্ন রাখতে ভুলে গেল। তৃতীয়বার প্রিয়ংবদা দারোয়ানের হাতে দুজনকে কড়ামিঠে এমনই একটা অদ্ভুত চিঠি পাঠাল যে সেদিন বিকেল হবার আগেই দুজনে তাদের বাড়ি গেল।

চারণীর মৃত্যুর পর চারণীর বাড়িরই বসবার ঘরে, যেখানে দেওয়ালের গায়ে চারণীর ফটো ছিল আর চারণীর হাতে আঁকা ছবি ছিল আর অর্গানে চারণীর গান স্তব্ধ হয়ে ছিল আর আবহাওয়ায় চারণীর হাসির রেশ ছিল, সেইখানে প্রিয়ংবদার মধ্যস্থতায় কবি ও ভাস্করের দেখা হল। পরস্পরকে দেখে প্রথমে তারা স্ত্রীলোকের মতো হিংসা ও বিদ্বেষ অনুভব করল, দুজনেরই মনে হল গলা টিপে একটা মানুষকে হত্যা করতে পারলে তাদের সুখের সীমা থাকবে না। তারপর এই পাশবিক ইচ্ছার জন্য লজ্জায় তারা খানিকক্ষণ আড়ষ্ট হয়ে রইল। তারও পরে তাদের দুজনের প্রত্যেকে স্থির করে নিল যে, না, বাস্তব জগতে তাদের শত্রুতা নেই ; চারণীর দেহটা অদৃশ্য হয়েছে সত্য কিন্তু চারণীর প্রেম সে পেয়েছিল, সূতরাং আধ্যাত্মিক পরাজয়ের গ্লানিতে দক্ষ হয়ে যে জীর্ণ-শীর্ণ হয়ে গেছে তার সঙ্গে আর বিবাদ কীসের ? প্রত্যেকে এই রকম ভেবে পরস্পরকে তারা ক্ষমা করল।

অরবিন্দ বলল, নতুন কবিতা কিছু লিখলেন ? মরুনন্দিনীর কবিতাগুলি বড়ো ভালো লেগেছিল। মিছরির মতো জমট-বাঁধা রস—তবে ঝাঁঝটা একটু বেশি,—অ্যামোনিয়ার মতো। বড়ো বেশি অভিভূত করে দেয়।

মহাব্রত বললে, অল্প বয়সের লেখা। ঝাঁঝটাই তখন বেশি ছিল ! নতুন কিছু লিখিনি। আপনি নতুন কিছুতে হাত দিয়েছেন ? গতবার বোম্বের এগজিভিশনে আপনার উর্বশী দেখে মুগ্ধ হয়ে গিয়েছিলাম।

এই ভাসাভাসা ভদ্রতার আলাপ গড়িয়ে গড়িয়ে সন্ধ্যায় আলো জ্বালবার সময় এতদূর এগিয়ে গেল যে উপেক্ষিতা প্রিয়ংবদা দেখে শূনে খ বনে গেল। কেবল এদের দুজনকে নেমস্তম্ন করলে খারাপ দেখাবে বলে সে আরও দু-চারজনকে বলেছিল, সকলের হাসিগল্প গানের মাঝখানে এই দুই মহাশত্রু যে পরস্পরের মধ্যে এমন করে ডুবে যাবে প্রিয়ংবদার তা কল্পনাতেও আসেনি। ওরা কী পাগল ? চেহারা অবশ্য দুজনেরই অনেকটা পাগলের মতো, তবু ঘরে যতগুলি লোক আছে তাদের সকলের চেয়ে জ্ঞান ও বুদ্ধিতে ওরাই যে শ্রেষ্ঠ তাতে সন্দেহ নেই। খণ্ডখণ্ড ঝাপসা জগৎ নিয়ে যাদের কারবার ওদের চোখের দিকে তাকিয়ে সূর্যালোকের চেয়ে তীব্র আলোয় বলসানো সম্পূর্ণ এক একটা জগৎ দেখে তাদের ভয়ই করে। তবু ওরাই এ রকম খাপছাড়া কাণ্ডগুলি ঘটায় কেন ? তা ছাড়া, আলাপ করবে বলে সে ওদের নেমস্তম্ন করেছে। অথচ কথা কইলে জবাব পর্যন্ত দেয় না। খাওয়ার পর তার কাছে বিদায় না নিয়েই আলাপ করতে ওরা যখন চলে গেল প্রিয়ংবদার মনে হল সকলের সামনেই সে কেঁদে ফেলবে।

তাদের ছাড়াছাড়ি হল পথে। দুজনের মনের পরিচয় পেয়ে দুজনের কাছেই তারা তখন অবাধ হয়ে গেছে। সাধারণ মানুষের সঙ্গে তারা মিশতে পারে না ; তাদের মনের গড়ন স্বতন্ত্র, তারা নিঃসঙ্গ জীবনযাপন করে। আজ আলাপ-আলোচনার উপযোগী একটি সঙ্গী লাভ করে দুজনেই যেন তারা ধন্য হয়ে গেল। কথা রইল, পরদিন মহাব্রত অরবিন্দের স্টুডিও দেখতে আসবে। সঙ্গে আনবে তার অপ্রকাশিত কবিতা। অরবিন্দ কবিতা শুনবে, মহাব্রত দেখবে মর্মর-মূর্তি।

মহাব্রত সকালেই এল। কথা ছিল বিকালে আসবার। চাকর প্রথমে সোজা জবাব দিল যে দেখা হবে না। তারপর মহাব্রতের প্রচণ্ড এক ধমক খেয়ে সে অরবিন্দের বোন পদ্মাকে ডেকে আনল। পদ্মা বলল যে সকালে তার দাদা কাজে ব্যস্ত থাকে, কারও সঙ্গে দেখা করে না।

মহাব্রত রেগে আগুন হয়ে বললে, আমায় নিজে আসতে বলেছিল। দেখা করবে কি করবে না সে নিয়ে মাথা না ঘামিয়ে দয়া করে খবরটা দিন যে মহাব্রত এসেছে।

পদ্মা বললে, আসতে বলেছিল তো আসুন। খবর দেবার আমার সময় নেই।

চাকরোর সঙ্গে মহাব্রতকে সে চারতলায় অরবিন্দের স্টুডিওতে পাঠিয়ে দিল। স্টুডিওটা ধরলে বাড়িটাকে চারতলা বলা চলে, আসলে তিনতলা বাড়ির ছাদে অরবিন্দ স্টুডিও বানিয়েছে। দেওয়াল ইটবালির চেয়ে কাচেরই বেশির ভাগ, মাথার উপরে স্কাইলাইটও আছে। আলোয় স্টুডিওর ভেতরটা ঝলমল করছিল। ভেতরে ঢুকে হঠাৎ যেন আহত হয়ে মহাব্রত দাঁড়িয়ে পড়ল। অরবিন্দ নিবিষ্টচিত্তে চারণীকে রূপ দিচ্ছে, পাশে হাসিমুখে দাঁড়িয়ে আছে আর একটি চারণী। সমাপ্ত ও অসম্পূর্ণ কয়েকটি মাটি ও পাথরের দর্শক স্টুডিওর এক কোণে ভিড় করে দাঁড়িয়ে তাই দেখছে।

অরবিন্দ তার দিকে পিছন ফিরেছিল, তার আবির্ভাব সে টের পেল না। মহাব্রত অনেকক্ষণ দাঁড়িয়ে দাঁড়িয়ে হাস্যমুখী মর্মরশূভ্রা চারণীকে দেখল। মহাব্রতের সঙ্গে পরিচয় হওয়ার কদিনের মধ্যেই চারণীর জীবন সমস্যার ভারে পীড়িত হয়ে উঠেছিল, চারণীর অবাধ নির্মল হাসি ও চোখের সেকৌতুক চাহনি দেখবার সুযোগ তার কখনও হয়নি। এই চারণীকে তার অচেনা মনে হল। তার অগোচরে চারণীর এই অভিব্যঞ্জনা ও ভঙ্গিমার সঙ্গে অরবিন্দের এতদূর ঘনিষ্ঠতা হয়েছিল যে পাথরে সে তা ফুটিয়ে তুলতে পেরেছে, এ কথা মনে করে মহাব্রতের হৃদয় ঈর্ষায় উদ্বেল হয়ে উঠল। চারণীর এই প্রতিমূর্তিতে অনেক খুঁত ছিল। সে খুঁতগুলিকে পর্যন্ত মহাব্রত চারণীর অদেখা রূপের বৈশিষ্ট্য বলে ভেবে নিল। তার কষ্টের সীমা রইল না।

অরবিন্দ যখন তাকে দেখতে পেল সে হাঁ করে চারণীর দিকে তাকিয়ে আছে, গতরাত্রির নিবিড় অন্তরঙ্গতা ভুলে গিয়ে অরবিন্দ প্রথমে খুব বিরক্ত হল। এমন কী খবর না দিয়ে একেবারে স্টুডিওতে উঠে আসার জন্য কয়েকটা রূঢ় কথা তার ঠোঁটের কাছে এগিয়েও এল। কথাগুলি চেপে নিয়ে সে বলল, কতক্ষণ এসেছেন ?

মহাব্রত বললে, এই খানিকক্ষণ। দুটো মূর্তি করেছেন কেন ?

এ প্রশ্নের জন্য একটু ভনিতার প্রয়োজন ছিল। অন্তত কিছুক্ষণ অন্যকথা বলে প্রশ্নটা উচ্চারণ করলেও আকস্মিকতা একটু কমত। কাল তারা ইঞ্জিতেও চারণীর সম্বন্ধে কোনো কথা বলেনি।

অরবিন্দ বলল, এ মূর্তিটা ভালো হয়নি। মন শান্ত হবার আগেই কাজ আরম্ভ করেছিলাম, অনেক খুঁত থেকে গেছে। হাসিটা বড়ো স্পষ্ট আর—

মহাব্রত ছেলেমানুষের মতো আগ্রহের সঙ্গে জিজ্ঞাসা করল, আপনার মন শান্ত হয়েছে ?

অরবিন্দ বলল, হ্যাঁ।

সেই দিন থেকে মহাব্রত প্রতি সন্ধ্যায় হোটেল হোটলে মদ চেখে বেড়ানো বন্ধ করলে। দিবারাত্রি একটা অস্থির আবেগে সে চঞ্চল উদ্ভ্রান্ত হয়ে রইল। কাব্যের যে প্রেরণা তার মদের নেশার সঙ্গে একাকার হয়ে মিশে গিয়েছিল আবার তাকে পৃথক করে আয়ত্ত করার জন্য সে পাগল হয়ে উঠল। জগতের সমস্ত কবির দুয়ারে সে স্মরণ নিল, কবিতার পর কবিতা পাঠ করল। নিজের পূর্বকৃত রচনা পড়ে পড়ে সে নিজেকে খুঁজল। বড়ো কষ্টে মহাব্রতের দিন ও রাত্রি কাটতে লাগল। কিন্তু এক মুহূর্তের জন্য নিজেকে সে শিথিল হতে দিলে না। পাথরে চারণীকে অমব করার তপস্যায় অরবিন্দ অনেকদূর এগিয়ে গেছে। কবিতায় চারণীকে অমর করতে হলে তার তপস্যা আরও উগ্র হওয়া চাই।

মহাব্রতের শরীর অল্পে অল্পে ভালো হল। মনে ধীরে ধীরে ভাব ও আবেগের আবির্ভাব হতে লাগল। ফাঙ্কনের গোড়ায় অনেক রাত্রে খোলা ছাদে দাঁড়িয়ে সাগর-ভেজা বাতাসের আর্দ্র স্পর্শ অনুভব করতে করতে মাঝে মাঝে সে যেন সুর-ছন্দ-ধ্বনি-ভাব-গন্ধ-বেদনা প্রভৃতির সমন্বয়-করা তার হারানো কাব্যজগতের সন্ধান পেতে লাগল। সব অস্পষ্ট, ঝাপসা। তবু আশা জাগাবার পক্ষে তাই যথেষ্ট। লেখার তাগিদও যেন সে অনুভব করল। স্কীণ, ভীরা সে তাগিদ। মহাব্রত তাতেই খুশি হল। তারপর চৈত্রমাসে একদিন রাতে সে চারণীকে স্মরণ করে লিখতে বসল স্মৃতি-কাব্য,

ইন-মেমোরিয়মের মতো যার অমরতা চারণীকে অমর করবে। তাকেও করবে অবশ্য কিন্তু সেটা বাহুল্য, তার কোনো প্রতিকার নেই। পুরানো দিনের মতো কাগজপত্র ছড়িয়ে, বিদ্যুতের আলো নিভিয়ে বুপোর দীপাধাবে মোমবাতি জ্বালিয়ে সে লিখতে বসল। পাশের ফুলদানি থেকে সোনা রঙের চাঁপা আর সবুজ রঙের কাঁঠালিচাঁপা ফুল পুরানো দিনের মতো তাকে তীব্র মিশ্রিত গন্ধ সরবরাহ করতে লাগল। গভীর রাত্রির নিজস্ব ছাড়া ছাড়া শব্দ দিয়ে ভাগ করা যে স্তব্ধতায় আগে সে কবিতা লিখত আজও সে স্তব্ধতাই তাকে ঘিরে রইল। কিন্তু এক লাইন কবিতা সে লিখতে পারল না, কলম হাতে করে যতক্ষণ সে ঈষৎ নীলাভ কাগজের দিকে চেয়ে রইল তার সময় ব্যোপে তার মনে জেগে রইল এই কথাটা যে, চারণীকে অমরতা দেবার জন্য সে কবিতা লিখতে বসেছে। এই জ্ঞানকে মগ্নচেতনায় তলিয়ে দিয়ে আসল কবিতাকে সে মনে আনতে পারল না। মহাব্রতর ভয় হল। পরদিন সে আবার লিখবাব চেষ্টা করল। যে অবস্থায় সে তার শ্রেষ্ঠ কবিতা রচনা করেছে তেমনই অনুকূল অবস্থাতেও আজ এক লাইন কবিতা তার মনে এল না। কতকগুলি জোড়-বিজোড় শব্দ শুধু তার মনে ভেসে বেড়াতে লাগল।

মহাব্রতর শাস্তি নষ্ট হয়ে গেল। ভয়ে সে যেন মরার মতো হয়ে গেল। এ কোন অদৃশ্য দুর্বোধ্য শক্তি তার প্রকাশের পথরোধ করে দাঁড়িয়েছে, তাব কাব্যের উৎসমুখে শিলাব মতো চেপে বসেছে ? আব আত্মাকে অবরোধ করেছে কীসে ? মহাব্রতর ঘুম এল না বলে তার মদ খাবার ইচ্ছা হল। বাড়ি থেকে মদের গন্ধটুকুও বিতাড়িত করে দিয়েছিল বলে হঠাৎ সবদিক দিয়ে নিজেকে ব্যর্থ ও অসহায় মনে করে সে কাঁদল। সেদিন সকালে অরবিন্দের স্টুডিওতে চারণীকে দেখে সে টের পেয়েছিল চারণী অরবিন্দকে ভালোবাসত। তা না হলে অরবিন্দের জন্য সে অমন করে হাসবে কেন, অমন করে চাইবে কেন ? সে দিন থেকে মহাব্রতের একটা স্বর্ণ ভেঙে ধুলায় লুটিয়ে পড়েছে। চারণীর অমর স্মৃতিকাব্যটিও যদি সে লিখতে না পারে, সেই পরাজয় সে সহ্য করবে কী করে ? বেঁচে থাকবে সে কীসের জন্য ?

বেঁচে থাকার উদ্দেশ্য অবশ্য জগতে সংখ্যাতীত, খুঁজলেও মেলে, না খুঁজলেও মেলে, কিন্তু মহাব্রত প্রতিভাবান কবি বলে চারণীর স্মৃতিকে অবলম্বন করে এক অমর ব্যথাকাব্য রচনা করা ছাড়া জীবনের আর কোনো উদ্দেশ্যই দেখতে পেল না। এও সে ভুলে গেল যে উত্তেজিত অশান্ত মন নিয়ে অমর কাব্য রচনা করা যায় না। হ্যালামের মৃত্যুর সতেরো বছর পরে টেনিসনের ইন-মেমোরিয়ম প্রকাশিত হয়, বন্ধুকে যখন কবি ভুলে গেছে, সুদূর অতীতে নিয়তির বৃঢ় আঘাতে প্রাপ্ত ভাব-তরঙ্গের স্মৃতিটুকু মাত্র যখন কবির অবলম্বন, বন্ধুবিরোগ-বেদনা নয়। আর সে তো শুধু বন্ধু। নিজের মরণ ঘনিয়ে না এলে সুদূর অতীতে হৃদয়ে বিপর্যয় আনা স্মৃতিটুকু মাত্র মনে রেখে মৃত্যু প্রিয়াকে কে ভুলতে পারে যে অমর স্মৃতিকাব্য লিখতে পারবে ? করুণ রসে টইটমুর কবিতা লেখা যায়, উদ্ভাস্ত প্রেমের সেই আবেগ উগ্র কাব্য নিয়ে মানুষ হইচইও করে, কিন্তু লোনা রাসায়নিক চোখের জলের মতো সে বাঁচবে কেন, সে উপে যায়,—সে তো মড়াকান্না। প্রতিভাবান কবি হয়েও মহাব্রত এ সব কথা যেন ভুলে গেল। জ্বরদস্তি করে পরপর কয়েক রাত্রি সে কাব্য লিখল আর সকালে উঠে না পড়েই ছিঁড়ে ফেললে।

তারপর সে শহর ছেড়ে গেল পালিয়ে।

নানা দেশ ঘুরে মন একটু ঠান্ডা হয়ে এলে হঠাৎ একদিন তার মনে হল চারণীকে নিয়ে যে কারণে সে কবিতা লিখতে পারেনি তা হয়তো এই যে, তার কবি-মন কাব্যরচনার অনুপযোগী স্মৃতিকেই শুধু গ্রহণ করেছে। চারণীর জীবনে যে আবহাওয়া ছিল, যেটুকু বাস্তবতা সমস্ত কবিকল্পনার ভিত্তি, হয়তো সে তা হারিয়ে ফেলেছে। যে সব বস্তু ও বাস্তবতা চারণীকে ঘিরে ছিল তাদের মাঝখানে বসে লিখলে সে লিখতে পারবে। চারণীর অনুশীলন কক্ষটির কথা মহাব্রতর মনে এল। সে ঘরে দীর্ঘ

কাল ধরে সে নিজেকে প্রতিভার উপযোগী করে গড়ে তুলেছিল। সেই ঘরে বসে সে ছবি আঁকত, কবিতা পড়ত, ভাষ্কর্যের চর্চা করত, সাহিত্যের পরিচয় নিত। চারণীর আঁকা ছবি ও খোদাই করা মূর্তি, তার পড়া অসংখ্য বই, তার ব্যবহার-করা অসংখ্য বস্তু সে ঘরে চারণীর স্বকীয়তাকে আজও ধরে রেখেছে। ওই ঘরে দুদণ্ড বসলে স্মৃতিকাব্যের আরম্ভটা হয়তো সে আয়ত্ত করতে পারবে।

আশাশ্বিত হৃদয়ে মহাব্রত কলকাতায় ফিরল। কোনো বিষয়ে তাড়াহুড়ো করতে আজকাল তার ভয় করে। প্রথমে দুদিন বিশ্রাম করে নিল। পরের দিন সকালে সে গেল চারণীদের বাড়ি। শুনল চারণীর সেই ঘরখানা সাফ করে তিনদিন আগে প্রিয়ংবদা একটি মেয়ে প্রসব করেছে। চারণীর ছবি বই প্রভৃতি জিনিসপত্র খানিক এ-ঘরে ও খানিক সে-ঘরে সাজিয়ে রাখা হয়েছে।

চারণীর শোবার ঘর ?

সে ঘরে চারণীর পিসিমা শোন।

তারপর মহাব্রত অনেক ভেবে একদিন অরবিন্দের স্টুডিওতে গেল। সেখানে চারণীকে একবার অনেকক্ষণ ধরে দেখে এসে শেষ চেষ্টা করে দেখবে। এতে তার লজ্জা, চারণীকে অমর করার গৌরব এতে তার ক্ষুণ্ণ হবে। কিন্তু উপায় কী ? যেখান থেকে হোক স্মৃতিকাব্য আরম্ভ করার প্রেরণাটুকু সংগ্রহ করতে না পারলে তার যে একেবারেই পরাজয়।

অরবিন্দ তাকে হাসিমুখে অভ্যর্থনা করে বলল, আসুন।

মহাব্রত চেয়ে দেখল, চারণীর দ্বিতীয় প্রতিমূর্তি সমাপ্ত হয়েছে। আগেকার হাস্যমুখী মূর্তির চেয়ে এ মূর্তি বহুদিক দিয়ে ভিন্ন—সব দিক দিয়ে। সে মূর্তির খুঁত ও অসম্পূর্ণতা আজ এ মূর্তির সঙ্গে তুলনা করে সে ধরতে পারল। চোখের পলকে এও সে বুঝতে পারল এবারও অরবিন্দের কাছে তার হার হয়েছে। অরবিন্দ সৃষ্টি করেছে চারণীকে, ঈষৎ স্থূলকায়ী, ভীৰু চোখ, শ্রান্ত বিপন্ন হাসি, দ্বিধা-সন্দেহ-ভয়ে লেপা মুখ, নিখুঁত ও আসল চারণী। অরবিন্দ তাকে অমরতা দেয়নি, পরের কাছে এ মূর্তি হয়তো প্রশংসার বেশি কিছু পাবে না, কিন্তু কী দাম অমরতার ? অরবিন্দ যতকাল বাঁচবে চারণী তার সঙ্গে থাকবে। মৃত্যুর কবল থেকে ছিনিয়ে এনে চারণীকে সে জীবন-সঞ্জিনী করেছে। এরপর তাকে স্মৃতিকাব্যের অমরতা দিতে চাওয়া হাস্যকর।

মহাব্রতের মাথার ভেতরে কেমন গোলমাল হয়ে গেল। অরবিন্দের হাতুড়ি আর বাঁটালিটা তুলে নিয়ে চারণীর মুখখানা সে ক্ষতবিক্ষত করে দিল। সে যেন অসতী স্ত্রীকে সাজা দিচ্ছে। অরবিন্দ সবটুকু জীবনীশক্তি ব্যয় করে এই মূর্তি গড়েছিল। চামড়া দিয়ে হাড়-ঢাকা শরীরে তার একটুও শক্তি ছিল না। এবারও সে তার চারণীকে বাঁচাতে পারলে না।

আশ্রয়

শচীন দত্তের বাড়িতে চাকর টেকে না। মাইনে কম, খাওয়ার কষ্ট, পান থেকে চুন খসলে গালাগালি, সুতরাং চাকর টিকবে কেন ! কেরানির মতো ওদের চাকরি তো দুর্লভ নয়, লোকে ডেকে নিয়ে কাজ দেয়।

এক মাস কাজ করে দীনবন্ধুও পালাবার উপায় দেখল। নতুন মাসের দুই তারিখে সে এক পয়সা দিয়ে চারখানা চিঠির কাগজ কিনে ফেলল। আড্ডায় বসে আদালতের পিয়নকে দিয়ে এই মর্মে পত্র লেখাল যে, দেশে তার বউ মরো-মরো, স্বামীকে যেতে লিখছে সকাতরে।

চিঠি পড়ে শচীন দত্তের স্ত্রী বিমলা নাক সিটকে বললেন, মরো-মরো তো চিঠি লিখলে কী করে শূনি ? সেজোমেয়ে নন্দরাণী হেসে বলল, বজ্জাতি, না রে ? তোর বউ তোকে খামে চিঠি লেখে, ইস ! কই দেখি বার কর তো খামটা ?

দীনবন্ধু বলল, খামটা ফেলে দিয়েছি আজ্ঞে। আর তেনা চিঠি লিখবে কেন, চিঠি লিখেছে আমার ভাই জগবন্ধু।

দীনবন্ধুর পেটে অনেক বুদ্ধি।

বিমলা অনেকক্ষণ তানানানা ভাঁজলেন, শেষে বললেন, আচ্ছা যাস বাড়ি, কিন্তু লোক দিয়ে যেতে হবে বাছা। নইলে মাইনে পাবিনে।

নন্দরাণী বলল, এই শীতে আমাকে দিয়ে খাসন মাজালে তোর কী হবে জানিস ? গাড়িতে কলিশন হয়ে বাড়ির বদলে একেবারে স্বর্গে চলে যাবি।

দীনবন্ধু আড্ডায় ফিরে বন্ধু বন্ধুকে ধরল তাকে উদ্ধার করে দিতে হবে। বিশেষ কিছু না, সে শুধু শচীন দত্তের বাড়ি কাজ করে আসবে। তাকে সঙ্গে নিয়ে গিয়ে দীনবন্ধু বলবে, এই লোক দিলাম, দাও মাইনে। মাইনে নিয়ে সে শটকাবে। বন্ধুও সে-বেলাটা খেটে পরদিন আর ও মুখো হবে না।

বন্ধু ত্রিশ বছরের জোয়ান, কিন্তু তার মুখে একটা অসুস্থ বিমর্ষতার ছাপ। মাঝে মাঝে তার মাথার কল একেবারে বিগড়ে যায়। তখন সামান্য একটা কথা বুঝতে তার এত দেরি হয়, এমনভাবে সে হাবার মতো ফ্যালফ্যাল করে তাকিয়ে থাকে যে দেখলে মমতা হয়। মাথা যখন অনেকটা পরিষ্কার থাকে তখনও সে মুখ ভাব করে একপাশে চুপচাপ বসে থাকে, সহজে কথা বলতে চায় না, তাসখেলায় যোগ দিতে আহ্বান করলে শুধু মাথা নাড়ে। দুপুরবেলা তেরো টাকার হারমনিয়মের বেখাপ্পা আওয়াজের সঙ্গে দেড় টাকার তবলা পিটে আড্ডায় যখন বিষম সংগীতচর্চা হয়, বন্ধু নির্লিপ্তের মতো একধারে পড়ে থাকে। সকলে বেশি রকম হইচই আরম্ভ করলে সে আড্ডা ছেড়ে চলে যায় এবং অনেকক্ষণ পথে পথে ঘুরে কাটিয়ে আসে। বন্ধুর জীবন যেন স্তব্ধ হয়ে গেছে, জীবনের কলরবের প্রতি ওর তাই বিরক্তি।

দীনবন্ধুর প্রস্তাবে অনেক কৌতুক ছিল, যারা শুনল সকলে হাসল—বিশেষ করে বিপিন দাস। বন্ধু কোনোদিন হাসে না, সে শুধু স্বীকার করে বলল, আচ্ছা।

বিমলা বললেন, এই নাকি তোর নতুন লোক, যে ফরসা জামাকাপড়, থাকলে হয় টিকে !

দীনবন্ধু বলল, বাপরে, আমি দিয়ে যাচ্ছি, টিকবে না ?

নন্দরাণী জিজ্ঞাসা করল, তোমার নাম কী ?

বঙ্কু বলল, বঙ্কু ।

ব্রঙ্কা ? কী কালার ? ব্রাউন না ব্ল্যাক ? বলে নন্দরাণী হাসল।

বঙ্কু বলল, ব্ল্যাক। ব্ল্যাক মানে কালো।

নন্দরাণী অপ্রতিভ হয়ে বলল, তুমি ইংরেজি জানো ?

বঙ্কু বলল, বুক ফার্স্ট—হর্স মানে ঘোড়া, সোয়ান মানে হাঁস।

শুনে নন্দরাণী রাগ করে সেখান থেকে চলে গেল। বঙ্কু এদিক ওদিক চেয়ে কলতলায় গিয়ে অঞ্জলি পেতে জল খেতে আরম্ভ করল। বিমলা মুখভার করে বললেন, ইঞ্জিরি জানা চাকর আমাদের দরকার নেই দীনু। তুই অন্য লোক দেখে দে। বাটা মেয়ের মুখের ওপর ইঞ্জিরি ঝেড়ে দিল।

দীনবন্ধু বিপদগ্রস্ত হয়ে বলল, একটু পাগলাটে মা কিন্তু কাজ দেখলে অবাধ হয়ে যাবেন। কিছু খেতে চায় না, দু মাস খেটে এক মাসের মাইনে নেয়। মাসকাবারে মাইনে দিতে গেলে বলে আজ তো মাসের অর্ধেক এখন মাইনে নেব কেন ?—মাথাটা একটু খারাপ। দু টাকা কম দিলেও খুশি হয়ে কাজ করবে।

বিমলা নরম হয়ে বললেন, কিন্তু পাগল-ছাগল লোক—

দীনবন্ধু জিভ কাটল, পাগল কেন হবে মা, পাগল নয়। ছেলে-বউ মারা যাওয়ার পর থেকে কেমন একটু হাবামতো হয়ে গেছে, এই মাসের। অপঘাতে মরল কিনা ছেলে আর বউটা, তাই---

নন্দরাণী ফিরে এসে দাঁড়িয়েছিল, জিজ্ঞাসা করল, কীসের অপঘাত বে ?

দীনবন্ধু বলল, অপঘাত বইকী আজে। নদীর ধারে গ্রাম, বউটাকে কুমিরে নিলে, ছেলেটা মোলো জলে ডুবে। সে কী ছেলে দিদিমণি, যেন রাজপুত্র ! সেদিন সন্ধ্যা লেগেছে কী লাগেনি, মহাকাল ডাকলে, আয় বঙ্কুর বউ, আয় বঙ্কুর ছেলে। মহাকালের ডাক, সাড়া না দিয়ে তো উপায় নেই, ছেলের হাত ধরে বউটা জল আনতে গেল নদীতে। সেই যে গেল দিদিমণি, আর ফিরে এল না। দেহ আমরাই খুঁজে পেলাম চরের মধ্যে এক গর্তে।

নন্দরাণী বলল, সেই থেকে বঙ্কুর মাথা খারাপ হয়ে গেছে বুঝি ?

আজে। কিন্তু কোনো জুলুম নেই দিদিমণি, খুব ঠান্ডা। গাল দিলেও ফিরে কথাটি কয় না।

তবে মার খুব সুবিধে হবে, বলে নন্দরাণী হাসল।

মাইনে হস্তগত করে প্রস্থানের আগে দীনবন্ধু হেঁকে বলে গেল, ভালো করে কাজ কবিস বঙ্কু, এমন মূনিব আর পাবিনে। দুবেলা গিন্নিমার পায়ের ধুলো নিস।

কলতলায় বাসন ছড়ানো ছিল, আদেশের অপেক্ষা না রেখেই বঙ্কু সেগুলি মাজতে আরম্ভ করেছিল, ফিরেও তাকাল না। উঠানে লিচুগাছের ব্যাপক ছায়া। একপাশে চৌবাচ্চা ও কল, সেখানে পাতার ফাঁকের চিকরি-কাটা আলোছায়ার আলপনা। নন্দরাণীর মনে হল নতুন চাকরটা যেন রোদ আর ছায়া দিয়ে বোনা চেক আলোয়ান গায়ে জড়িয়ে বাসন মাজতে বসেছে, যার বউকে খেয়েছে নদীর কুমির, ছেলেকে খেয়েছে নদী নিজে।

ওকে বেশি বকাবকি কোরো না মা। দুঃখী লোক।

বিমলা চটলেন, আমি বুঝি খালি বকাবকি করি ?

কর না ? দীনবন্ধু পায়ের ধুলোর ঠাট্টা করে গেল কেন, ধরতে পারনি ? একটা পাগলাকে দিয়ে ও মিছামিছি পালিয়েই বা গেল কেন তবে ? মিছামিছি নয় ? খামের চিঠি মা, খামের চিঠি ! দীনবন্ধুর বউ খামে চিঠি লেখে !

রান্নাঘর থেকে একটা এঁটো গ্লাস নিয়ে নন্দরাণী কলতলায় গেল।

এটা আগে মেজে দাও তো বঙ্কু।

বঙ্কু খালা মাজা বন্ধ করল। আঙুল দিয়ে বাসনগুলি দেখিয়ে জিজ্ঞাসা করল, কীসের আগে ? ওগুলি মাজার আগে না সকলের আগে ?

হাসির কথা, নন্দরাণী কিন্তু হাসল না। বলল, সকলের আগে। জল খাব কি না, তাই।

বঙ্কু একটু ভেবে বলল, এক মিনিট লাগবে।

লাগুক, তুমি মেজে দাও।

বঙ্কু প্লাসটা মাজল, প্লাসের সঙ্গে হাতও ধুয়ে কল থেকে জল ভরে নন্দরাণীকে দিল। কী জানি কী ভেবে গম্ভীরমুখে বলল, নদীর জল খুব মিষ্টি, কলের জলে স্বাদ নেই। দেশে আমরা নদীর জল খাই।

নন্দরাণীর মনে হল সত্যিই জলে স্বাদ নেই। তার আরও মনে হল, বঙ্কুব দেশের নদীর নাম যদি গঙ্গা হয়। তবে তো বঙ্কু তাকে হাতে করে যে জল দিল তার মধ্যে বঙ্কুর বউয়ের সূক্ষ্মতম এককণা রক্ত আর বঙ্কুর ছেলের তিলপরিমাণ প্রাণ মিশে ছিল ! বঙ্কু তাকে কী খাওয়াল ? কী গিলে ফেলল সে ? জলটা অমন বিস্বাদ লাগল কেন ?

বঙ্কুর শোকার্ত উপস্থিতিটা স্মরণে ঘা মারছিল, নন্দরাণীর মনে হল সত্যিই কীরকম একটা বিস্মী বোটকা স্বাদ আটকে রয়েছে জিভে।

তোমার দেশ কোথায় বঙ্কু ? গঙ্গার ধারে ?

বঙ্কু বিস্মিত হয়ে বলল, কী করে জানলেন ?

আর কী কবে জানলেন ! নন্দরাণীর সমস্ত শরীর শিরশির করে পেটের মধ্যে পাক দিয়ে উঠল, সে সেইখানে বসে পেটের সব উগবে ফেলে দিতে আবশ্য করল। শুধু জল নয়, অবেলায় খাওয়া ডালভাত তরকারি। তার যতই মনে হতে লাগল সেগুলি কুমিরের ভুক্তাবশিষ্ট বঙ্কুব বউয়ের পচা মাংস, ততই বমির ধমক বেড়ে গিয়ে নন্দরাণীর দম আটকে যাওয়ার উপক্রম হল।

বঙ্কু হতভম্ব। জ্বর হয়ে তাব বউ একদিন এমনিভাবে বমি কবেছিল। কিন্তু এ তো বউ নয়, এ তেমনভাবে বমি করে কেন ?

বিমলা ছুটে এলেন, বড়োছেলে সরোজ ছুটে এল, ছেলেমেয়ে যে যেখানে ছিল মুহূর্তে কলতলায় হাজির হয়ে গেল, সুস্থ হয়ে কলসির জলে মুখ ধুয়ে নন্দরাণী ঘরে গিয়ে শুয়ে পড়ল। খানিকক্ষণ মুখ বাঁকিয়ে পড়ে থেকে হঠাৎ এক সময় বালিশে মুখ গুঁজে সে বেজায় হাসতে আরম্ভ করে দিল। বিমলার কাছে খবর গেল নন্দরাণী ফুঁপিয়ে ফুঁপিয়ে কাঁদছে !

বিমলা এলেন, ও রাণী কাঁদিস কেন ?

নন্দরাণী হাসিমুখ বাব করে বলল, কাঁদছি কই, হাসছি। ভূতে পেয়েছে ভাবছ। হিস্টিরিয়া হয়েছে ? তা নয় মা। আমার নার্ভগুলি গোপ্তায় গেছে—এক শিশি নার্ভ টনিক কিনে দিয়া আমায়। নদীতে স্রোত থাকে সে কথাটা কী একবারও মনে হল ছই। মিথো বমি করে মরলাম। বঙ্কুর ছেলে বউ অ্যাঙ্গিনে সমুদ্রে পৌঁছে গেছে, কী বল মা ?...কে রে ?

বঙ্কু এসে দরজায় দাঁড়িয়েছিল, একগাল হেসে বলল, আমার বউ বমি করে কাঁদত। একদিন—নন্দরাণী ধমক দিয়ে বলল, যা চলে এখান থেকে, পাজি !

বঙ্কু ধীরে ধীরে সরে গেল।

রাত্রি এগারোটায় বঙ্কু আড্ডায় ফিরল। তিন জোড়া তৈলকুঞ্চ তাসে বিস্মি কাবার হচ্ছে। বিপিন বাজারের দিকে গিয়েছিল, সে পুঁটির সম্বন্ধে গোপনীয় সংবাদ দিচ্ছে। একটু থেমে জিজ্ঞাসা করল, কেমন চাকরি করলি বঙ্কু ?

বঙ্কু বলল, বেশ।

দীনবন্ধু বলল, কাল যাস আমার সঙ্গে, বোস-বাবুদের বাড়ি চাকরি করিয়ে দেব।

বঙ্কু বলল, আচ্ছা।

কিন্তু খুব ভোরে উঠে বঙ্কু বেরিয়ে যাচ্ছে দেখে দীনবন্ধু অবাক হয়ে গেল।

কোথায় চলেছিস রে ?

কাজে যাচ্ছি। দিদিমণি খুব সকালে যেতে বলে দিয়েছে।

ওখানে তুই কাজ করবি নাকি ?

করব, বলে বঙ্কু চলে গেল।

দীনবন্ধু সকলকে বলল, একদম খেপে গেছে। ব্যাগার খাটতে চলল ভূতের বাড়ি।

বঙ্কুর কাজ বেশ, কিন্তু ওর সঙ্গে কথা কইলেই মুশকিল বেধে যায়। নিজে নিজে পনোরো মিনিটের মধ্যে সব মশলা বেটে ফেলে, কিন্তু হলুদটা আগে বেটে দিতে বললেই তার সব গোল পাকিয়ে যায়। প্রত্যেকটি হলুদ পাঁচ মিনিট ধরে কচলে কচলে ধোয়, বাটতে আরম্ভ করে হঠাৎ থেমে গিয়ে কী সব ভাবতে থাকে, শেষে নন্দরাণীকে বলে, আমার বউ খুব তাড়াতাড়ি হলুদ বাটতে পারত। আমার অনেকক্ষণ লাগে। বউ কী করে হলুদ বাটত ভাবছি।...এমনি করে নোড়া ধরত ?

দু মাসে এক মাসের মাইনে নেয়, তাও কম ; বিমলা প্রাণপণ চেষ্টায় নিজেকে সামলে চলেন। কিন্তু মানুষের স্বভাব কোথায় যাবে ! তিনি বলেন, আ-মরণ ! যেমন করে রোজ বাটিস তেমনি করে বাট না ? রাণীর মুখের দিকে তাকিয়ে আছিস যে হাঁ করে ? ও জানে নাকি তোর বউ কেমন করে নোড়া ধরত ?

নন্দরাণী মাকে সরিয়ে দেয়, বলে, তুমি যাও মা এখান থেকে। তুমি মুখ ছোটাতে এমন ভড়কে যাবে যে সারাদিনেও হলুদ বেটে উঠতে পারবে না।

বঙ্কুকে বলে, আমি দেখিয়ে দেব বঙ্কু ?

কথাটা বুঝতে বঙ্কুর সময় লাগে। বুঝে বলে, দেখি হাত ?

নন্দরাণী হাত দেখায়। বঙ্কু মাথা নেড়ে বলে, নরম হাত, ব্যথা হবে। আমার বউয়ের হাত খুব শক্ত ছিল। একদিন এমন চড় মেরেছিল—কাকে ?

বঙ্কু অনেকক্ষণ ভাবে। তারপর বলে, পাঁচুকে। পাঁচু ঘুরে পড়ে গিয়েছিল চড় খেয়ে। তারপর মা-ব্যাটায় কী কান্না !

নন্দরাণী বলে, চড় মেরে পাঁচুর মা কেঁদেছিল কেন ?

অনেক ভেবেও বঙ্কু এ প্রশ্নের জবাব দিতে পারে না, করণ চোখে নন্দরাণীর মুখের দিকে চেয়ে থাকে, নন্দরাণীর মনে হয় তার মনের ভেতরটা যেন ভিজে সঁগাতসঁগাতে হয়ে আছে—কুয়াশায় চারদিক আচ্ছন্ন। এতবড়ো জোয়ান লোকটা নিজের মনের কুয়াশায় নিজেকে হারিয়ে ফেলেছে।

কিন্তু মশলা চাই, নইলে রান্না বন্ধ। নন্দরাণী বলে, তোমার দেরি হবে, আমায় দাও।

এ যেন অন্যায শাসন, এমনই মুখ করে বঙ্কু জোরে জোরে মশলা বাটতে আরম্ভ করে। নন্দরাণীর মনে হয় শিলটাই বুঝি সে ভেঙে ফেলবে।

চাকরকে ধমকানো এ বাড়ির ছেলেবুড়োর ধাতস্থ, দিনকয়েক সংযত হয়ে চললেও ক্রমেই সকলে নিজের নিজের মেজাজ প্রকাশ করতে আরম্ভ করল। অন্য সকলের চেয়ে বিমলাই বেশি, কারণ তিনি বাড়ির গিন্নি বলে সর্বদা চাকরের সঙ্গে তাকেই কারবার করতে হয় এবং তাতে মেজাজ প্রকাশের সুযোগ অহরহ উপস্থিত থাকে। নন্দরাণী বঙ্কুকে ধমকায় না তা নয়, কিন্তু অন্য কাউকে সে বেশি ধমকাতে দেয় না। বঙ্কু যেন তার নিজস্ব সম্পত্তি, তার খুশি হলে সে বকবে, মারবে, কিন্তু অন্যে তা পারবে না, নন্দরাণীর মনোভাব কত-কটা এই রকম। অন্য সকলে বঙ্কুর প্রতি ক্রুদ্ধ হয়ে উঠলে

নন্দরাণী রাগ করে কড়া কথা শুনিয়ে তাদের থামিয়ে দেয়, মাকে অনেক করে বুঝিয়ে বলে, একরকম মাগনার চাকর, ওকে কেন বকো বল তো ? চলে গেলে ভালো হবে বুঝি ? বিমলা চূপ করে থাকেন, কিন্তু রাগ হলে ফের বকেন। কিন্তু তার বকুনি গালাগালির রূপ নিতে পারে না, শুবুতেই নন্দরাণী থামিয়ে দেয়।

একদিন খাওয়া নিয়ে গন্ডগোল বাধল। অল্প দুটি ভাত আর একটু ডাল ছাড়া বঙ্কুর জন্য সেদিন কিছুই ছিল না।

অন্যদিন নীরবে খোয়ে যায়, আজ বঙ্কু বলল, তরকারি কই ?

বিমলা বলল, তরকারি নেই, ওই দিয়ে খা।

বঙ্কু বলল, তবে আমায় দুধ দাও। নইলে খাব না।

তোকে উননের ছাই দেব। না খাস তো উঠে যা।

কিন্তু বঙ্কু উঠেও গেল না, ভাতও খেঁশ না, খালি মাথা নেড়ে বলতে লাগল, দুধ দাও। আরে, দাও না দুধ ! কী দিয়ে ভাত খাব ? দুধ দাও।

তার মাথা নাড়ার রকম দেখে শর্কিত হয়ে বিমলা ডাকলেন, ও রাণী, দ্যাখ এসে বঙ্কু কেমন করছে। নন্দরাণী এল।

কীরে বজ্জাত ? বদমাসি হচ্ছে ? খা বলছি !

একটু দুধ দেবে না ? এক কড়াই দুধ কে খাবে ?—বঙ্কুর স্বরটা অত্যন্ত করুণ।

নন্দরাণী বলল, তোকে কচু দেব। নবাবপুত্র কি না, দুধ খেতে দেবে ওকে ! ডাল দিয়ে খা !

বঙ্কু নীরবে খেতে আরম্ভ করল। নন্দরাণী সগর্বে মার দিকে চেয়ে ঘরে চলে গেল। অর্থাৎ একটু ডাল তো আছে, আমি ইচ্ছে করলে ওকে শুধু ভাত খাওয়াতে পারি !

বঙ্কু যে তার মুখের কথায় বাঁচে মবে এর আনন্দে নন্দরাণী দিশেহারা।

বঙ্কুকে শাসন করে নন্দরাণী আবার গিয়ে শূয়ে পড়ল। দু ঘণ্টা পরে ঘুম ভেঙে দেখল, বঙ্কু দরজার বাইরে চূপ করে বসে আছে।

সদয় হয়ে বলল, কীরে বঙ্কু !

বঙ্কু বলল, আমার পেট ভরেনি।

আমি তার কী করব ? আড্ডায় গিয়ে খেয়ে আয়গে যা। আমাকে জল দিয়ে হাস এক গ্লাস !

জল দিতে ঘরে ঢুকে বঙ্কু আব বাইরে যেতে চায় না ! নন্দরাণী বলল, যাবি না আড্ডায় ?

বঙ্কু মাথা নাড়ল। নন্দরাণী বলল, তবে আমার একটু পা টেপ।

বিমলা দেখে রাগ করে বললেন, ওকে দিয়ে পা টেপাচ্ছিস যে ? ওই জোয়ান মন্দ—ধিঞ্জি মেয়ের যদি একটু বুদ্ধিসুদ্ধি থাকে।

নন্দরাণী হেসে বললে, পাগল আর ছাগল সমান মা। ওর শরীরটাই বড়ো মনের বয়স এক বছরও নয়। নইলে তোমার বাড়ি কাজ করে ?

নন্দরাণী মাকে এমনিভাবে খোঁটা দেয়। নিজে যেন সে বঙ্কুর প্রতি দয়াবতী।

কারও দয়া থাক বা না থাক বঙ্কু এ বাড়িতে কায়মি হয়ে রয়ে গেল। কয়েক মাসের মধ্যে এ কথাটা স্পষ্টই বোঝা গেল যে ধমক ছোটো জিনিস, গালাগালি দিয়েও বঙ্কুকে তাড়ানো যায় না। মাইনে না পেয়ে আধপেটা খেয়েও সে ও-বাড়ির মাটি কামড়ে পড়ে থাকবে।

নন্দরাণী হেসে বলে, পাগলের মর্জি। কিন্তু তাই বলে সবাই মিলে যে ওকে গাল দেবে তা হবে না কিন্তু। বিমলা এ উপদেশের মর্যাদা রাখতে অস্বীকার করলেন। বালতির কানায় লাগিয়ে কাপড় ছেঁড়ার জন্য একদিন এমন গালাগালি করলেন যে নন্দরাণীকে খুঁজে বার করে বঙ্কু কেঁদেই অস্থির। বঙ্কু বোঝে নন্দরাণী তারই পক্ষে।

অতবড়ো মানুষটির কান্না দেখে নন্দরাণীর বিষম হাসি পেল। তাকে হাসতে দেখে কান্না থামিয়ে বঙ্কু ভীত চোখে খানিকক্ষণ চেয়ে থেকে সরে গেল।

হাসি পাক, বঙ্কু তার উপরে নির্ভর করেছে, এটুকু নন্দরাণী বোঝে। এর মর্যাদা রাখবার জন্য বঙ্কুর সামনে সে মাকে বলল, কেন অত বক ? তোমার বড়ো বাড়াবাড়ি মা !

বটে ! বিমলা পেটের মেয়ের মুখ-ঝামটা সইলেন না, সমান প্রত্যুত্তর দিলেন। ফলে মা ও মেয়ের রীতিমতো ঝগড়া হয়ে গেল।

তার পক্ষ হয়ে নন্দরাণীকে লড়তে দেখে বঙ্কু ভারী খুশি। আনন্দে সে কেবল মাথা চালতে লাগল।

একদিন নন্দরাণী কলঘরে স্নান করছে। এমন সময় বঙ্কুর কাণ্ডে বিমলা একেবারে খেপে গেলেন। নন্দরাণীর আয়না-চিরুনির সাহায্যে চুল আঁচড়াবার শখ বঙ্কুর কেন হয়েছিল বলা কঠিন, কিন্তু সে শখ যে জন্যই হোক আয়নাটা দেওয়াল থেকে নামিয়ে ভালো করে মুখ দেখার শখ না চাপলে কোনো গোল হত না। বঙ্কুর হাতে নন্দরাণীর ক্রিম-মাখা, পিছলে পড়ে আয়নাটা ভেঙে গেল। বিমলা এমন গালাগালি আরম্ভ করলেন যেন আয়নার শোকে আর্তনাদী মড়াকান্না জুড়েছেন।

বড়াহেলে সরোজ জানে কথার মারে মানুষ মরে না। সে বঙ্কুর গালে ঠাস করে চড়িয়ে দিল। বঙ্কু কাঁদোকান্দো হয়ে কলঘরের সামনে গিয়ে জেরে দরজা ঠেলে আরম্ভ করল।

ভেতর থেকে নন্দরাণী জিজ্ঞাসা কবল, কে ?

আমাকে দাদাবাবু মারছে ! বঙ্কুর স্বর কান্নায় ভেজা।

বঙ্কুর গলার আওয়াজ পেয়ে বিষম চটে নন্দরাণী ধমক দিল, যা এখান থেকে বজ্জাত কোথাকার।

ও দিকে বিমলা হাঁকলেন, ও সরোজ, দ্যাখ বঙ্কু হারামজাদার কাণ্ড।

কাণ্ড দেখে সরোজের মাথায় রক্ত চড়ে গেল, বঙ্কুর কান ধরে হিড়হিড় করে টেনে নিয়ে গিয়ে নামিয়ে দিয়ে এল রাস্তায়।

দূর হয়ে যা বজ্জাত কাঁহাকা।

বিমলা বললেন, আহা, তাড়িয়ে দিল কেন একেবারে ! তোর বড়ো বাগ সরোজ। যা ডেকে নিয়ে আয়। মাগনার চাকর মাগনা জোটে ভাবিস নাকি ?

তুমি ডেকে আনো গে। বলে সরোজ দাড়ি কামাতে বসল।

কলঘর থেকে বেরিয়ে এসে নন্দরাণী সদরে গিয়ে পথের দুদিক উঁকি মেরে দেখল, কোথাও বঙ্কুর চিহ্ন নেই, সে চলে গেছে। রাগে মুখ কালো করে সে ভেতরে এল।

সরোজ বলল, যাক যাক, মবুক। স্নানের ঘরের দরজা ঠ্যাঁলে—ব্যাটা বজ্জাত।

নন্দরাণী বলল, দু ইঞ্চি পুবু দরজা, সেটা মনে রেখো দাদা। মাতব্বরির করা তোমার একটা অতি উৎকট স্বভাব। আমার বেরিয়ে আসার তর সইল না তোমার ?

তুই এসে কী করতিস শূনি ?

তোমায় বলতাম তাড়িয়ে দাও, না হয় মারো? বলতাম কিছু বোলো না ! দুমদাম পা ফেলে নন্দরাণী চলে গেল।

কিন্তু দেখা গেল এত সামান্য কারণে কাজ ছেড়ে চলে যাওয়ার মতো মন্দ চাকর বঙ্কু নয়। ঘন্টাখানেক পরে সে কোথা থেকে এসে নীরবে এঁটো বাসন কুড়োতে আরম্ভ করল আর মাঝে মাঝে ভীত চোখে তাকাতে লাগল নন্দরাণীর দিকে। এই এক ঘন্টায় তার মস্তিষ্ক এইটুকু আয়ত্ত করতে পেরেছে যে, নন্দরাণীর স্নানের সময় কলঘরের দরজা ঠেলা অপরাধ।

সরোজ হেসে বলল, দেখলি ?

নন্দরাণী বলল, তুমি ভাবছ ও মান-অপমান বোঝে না ? বলব চলে যেতে ?

সরোজ বলল, থাক। তুই বললে হয়তো চলে যাবে।

নন্দরাণী সগর্বে হেসে বলল, মানুষ বশ করতে জানা চাই দাদা। শুধু বকলেই হয় না।

সে যেন অনেক চেষ্টায় অনেক তপস্যায় বঙ্কুকে বশ করেছে ; বঙ্কুর বশ্যতা স্বীকারে বিধাতাব কোনোই হাত নেই; সবটুকু কৃতিত্ব তারই !

বাইরের চৌবাচ্চায় বঙ্কু কাপড় ধোয়, খানিক পরে ছাড়া-কাপড় আনতে কলঘরে ঢুকে সে আর বেরিয়ে আসার নাম করে না। বিমলা বলেন, তোর সাবান মাখছে হয়তো মুখে, রাণী।

নন্দরাণী তাড়াতাড়ি কলঘরে গেল। দেখল, বঙ্কু সকালের কাপড় বালতিতে তুলে তার ডুবে শাড়িটা দিয়ে মুখ মুছছে।

ও কী হচ্ছে বঙ্কু ?

বঙ্কু তাড়াতাড়ি শাড়িটা ফেলে দিয়ে ভীত চোখে চেয়ে রইল।

নন্দরাণী বলল, ভয়ানক বজ্জাত তো তুই ! আমার কাপড়ে মুখ মুছছিস কেন ?

বঙ্কুর মুখে কথা নেই।

বঙ্কুর বুদ্ধির জড়তা ক্রমেই কেটে গেল। কাজটা প্রকৃতির, কিন্তু তাতে নন্দরাণীর অজ্ঞাত প্রভাব কি একটুও ছিল না? অবশ্য চাকরের বুদ্ধির জট খুলবাব ধৈর্য ও ইচ্ছা নন্দরাণীর থাকার কথা নয়। বঙ্কুকে সে পছন্দ করত শুধু এই জন্য যে, বঙ্কু নিজেকে বাড়ির মধ্যে বিশেষ করে তারই চাবুর করে রেখেছিল। সে যেন নন্দরাণীর ব্যক্তিগত সম্পত্তি, তাকে নিয়ে যা খুশি করার অধিকার নন্দরাণীর আছে। মুখের কথা খসামাত্র বিনা বাক্যব্যয়ে পালন করে, বকে কাদানো যায়, মিষ্টি কথায় খুশি করা চলে, এমন একান্ত নির্ভরশীল মানুষকে কে না পছন্দ করে?

কিন্তু বঙ্কুর সহজ বুদ্ধি ফিরে আসার সঙ্গে চারদিকে গোল বাধতে লাগল। বঙ্কুব বিশেষত্ব লোপ পেয়ে এল, তার বুদ্ধির বিকাশের সঙ্গে একজন পূর্ণ মানবের মধ্যে শিশুর প্রাণ দেখে এবং সেটা এক শোচনীয় ফল বলে জেনে, তাকে আর অন্যান্য চাকরদের চেয়ে পৃথক করে দেখার আব কোনো কারণ রইল না। তার উপবে বঙ্কু নিজের প্রাপ্যগন্ডা বুঝে নিতে শিখল এবং একদিন ন মাসের বাকি মাইনে এক সঙ্গে দাবি করে বসে সকলকে ক্রুদ্ধ ও চমকিত করে দিল।

বিনা পয়সায় নন্দরাণীর কেনা গোলাম হয়ে থাকতেও তার বিশেষ আপত্তি দেখা গেল। তার নির্ভরশীলতা গেল শোচনীয়ভাবে কমে। কেউ ধমকালে সে এখন নিজের হয়ে নিজেই লড়াই কবে, নন্দরাণীর মুখ চেয়ে থাকে না। নন্দরাণী অন্যায় হুকুম করলে সে গম্ভীর মুখে জানায়, সে অন্য কাজ করছে। নন্দরাণীব জুলুমে বিরক্ত হয়ে এক সময় ফৌস কবে ওঠে।

একটা রাজা যেন হাত ছাড়া হয়ে গেছে, নন্দরাণীর এ রকম জালা বোধ হয়। হৃতবাজা পুনরুদ্ধারের জন্য সে প্রাণপণে চেষ্টা করে। কিন্তু যে রাজা সে নিজের চেষ্টায় জয় কবেনি, একবার হারিয়ে নিজের চেষ্টাতেই আবার সে রাজা জয় করবে কী কবে ! সে রাগ চেপে অনুযোগের সুরে বলে, তুই আজকাল আর আমার কথা শুনিস না বঙ্কু!

বঙ্কু বলে, যে সব অন্যায় কথা, কী করে শুনি। মশলা বাটছি, হুকুম দিলে ঘরঝাঁট দিয়ে যা— একটা মানুষ তো আমি।

তবে তুই দূর হয়ে যা বাড়ি থেকে।

মাইনে চুকিয়ে দাও, এখুনি যাচ্ছি, বলে বঙ্কু রেগে চলে যায়।

শেষে একদিন নন্দরাণীর সঙ্গেই ঝগড়া করে মাইনে না নিয়ে বঙ্কু চলে গেল। বলে গেল, আমার মাইনের টাকায় তুমি হার গড়িয়ে দিদিমণি। এ কথা শুনে সরোজ তাকে মারতে উঠেছিল, কিন্তু বঙ্কুকে বুঝে দাঁড়াতে দেখে গায়ে হাত তোলা আর সঙ্গত বিবেচনা করেনি।

দুদিন পরে সকালবেলা কিছু বঙ্কু ফিরে এল। নন্দরাণী তখন দাঁত মাজছে।
বঙ্কু ম্লান মুখে বলল, নতুন লোক রেখেছ নাকি দিদিমণি?
যদি রেখে থাকি?

তাকে ছাড়িয়ে আমায় রাখতে হবে। তোমায় ছেড়ে আমি থাকতে পারব না। মাইনে চাইনে আমি। কথাটার কদর্থ করে রাগে কাঁপতে কাঁপতে নন্দরাণী উঠে চলে গেল। মাকে গিয়ে বলল, শুনছ মা, আমায় ছেড়ে থাকতে না পেরে বঙ্কু ফিরে এসেছে। মাইনেও নেবে না।

বিমলা বললেন, বেশ তো। পাগলের কথায় তুই রাগ করেছিস নাকি?

নন্দরাণী মুখ বাঁকিয়ে বলল, ও পাগল? দেখ গে ওর ঘরে আমার শাড়ি আমার জুতো আমার চুল এই সব জড়ো করা আছে। হারামজাদাকে রোজ পা টিপতে দিতাম, ঘুমিয়েও পড়তাম এক একদিন....মাগো!

আহা, কী যে সৎ বলিস! বলে বিমলা কার্যান্তরে গেলেন।

নন্দরাণী দাঁড়িয়ে দাঁড়িয়ে ভাবতে লাগল, তারপর কাকে যে মুখ ভ্যাংচাল অন্তর্যামী জানেন। পরের বছর বৈশাখ মাসে নন্দরাণীর বিয়ে হল এক দোজপক্ষ মুনসেফের সঙ্গে। বিয়ের তিন মাস পরেই সে স্বামীর ঘর করতে চলে গেল বহরমপুরে।

ঠিক এক মাস পরে বঙ্কু সেখানে গিয়ে হাজির!

নন্দরাণী বললে, কীরে বঙ্কু?

বঙ্কু বলল, মা বড়ো বকে, তাই কাজ ছেড়ে দিয়েছি। আমায় রাখবে দিদিমণি? আমি মাইনে নেব না। নন্দরাণীর কোলে স্বামীর প্রথম পক্ষের ছেলে, গায়ে একরাশি গয়না, পরনে দামি কাপড়, সিঁথিতে চণ্ডা সিঁদুর। তার চাল অতি ভারিক্কি—গিন্নির মতো এবং বেমানান। সে বলল, তা বেশ তো, থাক না।

মুনসেফ শুনে বললেন, আরে না, মাইনে দেব বইকী! খাটবে মাইনে দেব না—ছি!

নন্দরাণী বলল, তোর মাইনে আমার কাছে জমা থাকবে, কী বলিস বঙ্কু?

বঙ্কু বলল, আচ্ছা।

তারপর দিন কেটেছে মাস কেটেছে বছর কেটেছে অনেকগুলি। নন্দরাণীর ঘরভরা ছেলেমেয়ে, সে বেজায় মোটা হয়ে পড়েছে। বঙ্কু এখনও তার কাছে চাকরি করে—বিনা পয়সার গোলামি। তার মাথার মধ্যে কোনো গোল নেই, কিন্তু নন্দরাণীর উপর তার আগের মতোই নির্ভরতা, নন্দরাণীর মুখের কথায় মরণ-বাঁচন।

কুড়ি বছরের মাইনে জমা, মুনসেফ মাঝে-মাঝে ঠাট্টা করে বলেন, বঙ্কু যদি এখন সব মাইনে চেয়ে বসে রাণী, তোমায় আমি বিক্রি করব।

নন্দরাণী হাসে, তারপর নিজের মোটা শরীরটার দিকে চেয়ে গভীর হয়ে যায়। গড়ানো চাকা গড়িয়েই চলবে অবশ্য, কিন্তু তবু ভয় করে! চুল পাকতে দাঁত পড়তে আর বাকি কত!

বঙ্কুর কিন্তু চুলও পেকেছে, দাঁতও পড়ে গেছে কয়েকটা।

শৈলজ শিলা

জীবনের একমাত্র উদ্দেশ্য ছিল বিধবা মাসির খোশামোদ করা। মাসি মরিল। সুতরাং জীবনটা উদ্দেশ্যহীন হইয়া গেল।

উদ্দেশ্যহীন জীবনটা নিয়া কী যে করিব ভাবিয়া পাই না।

বন্ধুবান্ধবের কু-পরামর্শে একদা সুপ্রভাতে মেয়ে দেখিতে গিয়া যৎপরোনাস্তি অপমানিত হইলাম। মেয়ে অবশ্য সুন্দরী, ফিরিঙ্গি স্কুলের প্রবেশিকা ক্লাসেও পড়ে, কিন্তু গৃহস্থঘরের মেয়ে তো ?—হবু বরের দিকে চোখ তুলিয়া চাহিয়া আতঙ্কে মুখ কালো করিবার কী তার অধিকার ? সারাদিন রাগে গজগজ করিলাম এবং পাশের বাড়িব কালো মেয়েটাকেই বিবাহ করিব স্থির করিয়া বিকালে ছাদে উঠিলাম।

আমাকে দেখিবামাত্র মুচকি হাসিয়া মেয়েটা তৎক্ষণাৎ নীচে চলিয়া গেল।

কবে যেন মাদুর পাতিয়া ছাদে শূইয়াছিলাম, কয়েকদিন বৃষ্টিতে ভিজিয়া মাদুরটা ছাদের সঙ্গে একেবারে আঁটিয়া গিয়াছে। মস্ত একটা হাই তুলিয়া ইহার উপরেই চিত হইয়া শূইয়া পড়িলাম। মনে মনে ভাবিলাম, অপরাহ্নের ওই চকচকে আকাশটা যে আয়না নয়, এ জন্য কত জন্ম ধরিয়া তপস্যা করিয়াছিলাম কে জানে !

আকাশে উঠিয়া পৃথিবীর দিকে মুখ ফিরাইয়া সঁতার দিতে থাকিলে কোথাও গিয়া পৌঁছানো যায় কিনা এমনই একটা অবাস্তব চিন্তা করিতে করিতে ঘুমাইয়া পড়িয়াছিলাম—স্বপ্ন দেখিলাম পাহাড়ের। তবুহীন শস্যহীন ধূসরবর্ণ রাক্ষসের মতো গাদাগাদি করিয়া রাখা পাহাড়গুলির চাপে স্বপ্নেই আমার উপত্যকার প্রেম গুঁড়া হইয়া গেল। তিনদিন বাদে পিঠে বোঁচকা বাঁধিয়া চলিয়া গেলাম দার্জিলিং এবং একদা টাইগার হিলে সূর্যোদয় দেখিয়া সূর্যের উদ্দেশ্যেই কয়েকদিনের জন্য বাহির হইয়া পড়িলাম।

ইহাতে আমার যে কী শাস্তি হইল শুনিলে আপনাদের চোখে জল আসিবে। একঘণ্টার ভিতরে সূর্যদেব কোন দিকে উঠেন তাহা তো ভুলিয়া গেলামই, পাক খাইতে খাইতে আমি নিজে কোন দিকে চলিলাম তাহার পর্যন্ত কিছু স্থিরতা রহিল না। নিজেকে টানিয়া হিঁচড়াইয়া একটা খাড়াইয়ের উপর তুলিয়া কোন দিকে নামিলে যে হাত-পা ভাঙিয়াও প্রাণটা বজায় রাখা যাইবে ঠিক করিতে পারি না, যে দিক দিয়া উঠিয়াছি, সে দিকে নামার কথা ভাবিলেও হৃৎকম্প হয়। হাত আব হাঁটুর চামড়া ছিঁড়িয়া রক্ত পড়িতে লাগিল, মাসলগুলি ছিঁড়িয়া পড়িতে চাহিল, এমন মাথা ঘুরিতে লাগিল যেন পৃথিবীর ঘূর্ণিত গতি প্রত্যক্ষ করিতেছি !

অবশেষে একবার যখন হাত ফসকাইয়া কুড়ি ফিট আন্দাজ গড়াইয়া একটা গাছের গুঁড়িতে আটকাইয়া গেলাম, তখন আর উঠিবার চেষ্টামাত্র না করিয়া মনে মনে বলিলাম, থাক যথেষ্ট হইয়াছে। সেইখানে শূইয়া শূইয়া পকেট হইতে বিস্কুটের গুঁড়া বাহির করিয়া মুখে পুরিতে লাগিলাম এবং চারিদিকে চাহিয়া প্রাকৃতিক দৃশ্যগুলি উপভোগ করিতে আরম্ভ করিলাম।

ভাবিলাম, একেবারে শূকনা শিলার গায়ে এই গাছটা গজানো না জানি কোন নিষ্ঠুর দেবতার কীর্তি। ওই তো তলা দেখা যাইতেছে, গড়াইয়া পড়িলেই হইত ! জীবনের উদ্দেশ্যটা তাহা হইলে কিছু কিছু বোঝা যাইত নিশ্চয়।

ঘণ্টাখানেক বিমাইবার পর উঠিবার চেষ্টা করিলাম। কোনোমতে গাছটা ধরিয়া উঠিয়া দাঁড়াইয়া উপরের দিকে চাহিয়া স্পষ্ট বুঝিলাম নিজের ইচ্ছায় যেটুকু নামি নাই শত ইচ্ছা করিলেও সেটুকু আর উঠিতে পারিব না। নানাবিধ কসরতের সাহায্যে ঘণ্টাদুয়েকের মধ্যে নীচে নামিয়া পড়িলাম।

সোজা হইয়া দাঁড়াতেই দেখি, চমৎকার ! ত্রিশ গজ তফাতে পাহাড়ি উনুনে একটা ভাতের হাঁড়ি চাপানো রহিয়াছে এবং নিকটে যে রাঁধুনি বসিয়া আছেন, তিনি নিঃসন্দেহ বাঙালি ভদ্রলোক !

মাতালের মতো হেলিয়া দুলিয়া নিকটে গেলাম। প্রশ্ন করিলাম, আপনি এখানে ?

ভদ্রলোকের মুখ আমসির মতো শূকাইয়া গেল ! বলিলেন, আজ্ঞে, আপনাকে তো চিনলাম না ? হাসিয়া বলিলাম, এখানেই জীবন কাটিয়েছেন নাকি ? মানুষ দেখেননি কখনও ? আমি আপনার মতোই মানুষ। এত জায়গা থাকতে এখানে এসে ভাত রাঁধছেন কেন তাই জিজ্ঞাসা করছি। খিদে পেয়েছে।

খিদে পাবার জন্য বুঝি এখানে শুভাগমন করেছেন ?

ভদ্রলোক বিব্রত হইয়া বলিলেন, আমার বড়ো বিপদ মশাই।

সে আমারও, বলিয়া বসিলাম। নিকটবর্তী গৃহটায় চোখ পড়িল উনানের ধোঁয়া হইতে আত্মবক্ষা করিতে গিয়া।

বাঃ বাঃ এ যে দেখছি গৃহা ! আপনি ওখানে তপস্যা করেন নাকি ? পঞ্চাশোর্ধে বনং ব্রজেৎ করেছেন ?

আজ্ঞে না। বিপদ তো ওইখানে।

শুনিয়া ভদ্রলোকের আপত্তি সম্পূর্ণ উপেক্ষা করিয়া গৃহায় উকি দিলাম। একটি যুবতি মেয়ে মাদুরে শূইয়া বেদনায় কাতরাইতেছে !

ভড়কাইয়া লোকটির কাছে ফিরিয়া গিয়া চাপা গলায় বলিলাম, এ যে বিষম কাণ্ড মশাই !

আজ্ঞে হাঁ। ওর ছেলে হচ্ছে।

হচ্ছে নাকি ? বলিয়া আমি প্রকাণ্ড একটা হাঁ করিয়া ফেলিলাম এবং বহুক্ষণ অবধি সে হাঁ বন্ধ করিতে খেয়াল হইল না।

যত দুর্গম পথ দিয়াই আমি আসিয়া থাকি এখানে আসিবার একটা সুগন্ধ পথও আছে দেখা গেল। এই পথ দিয়া প্রত্যহ দুবেলা পাঁচ-ছয় মাইল চড়াই-উতরাই ভাঙিয়া নানাবিধ প্রয়োজনীয় দ্রব্যাদি সংগ্রহ করিয়া আনিবার ভারটা আমার উপরেই পড়িল। ভদ্রলোকটি দেখিলাম বেজায় কুঁড়ে। দু বেলা রান্না করেন, খান আর গৃহামুখে মস্ত একটা পাথরে ঠেস দিয়া বসিয়া চুপচাপ আকাশ-পাতাল ভাবেন। একেবারেই অকর্মণ্য।

গৃহা-আলো-করা একটি মেয়ে হইয়াছে। ট্যাট্যা করিয়া কাঁদে, চুকচুক করিয়া দুধ খায় আর চোখ বুজিয়া ঘুমায়। আমি চাহিয়া দেখি আর তারিফ করি।

বলি, লোকজন ডেকে এবার লোকালয়ে নেবার ব্যবস্থা কবা যাক, কী বলেন মশায় ?

লোক ডাকার কথা শুনিলে লোকটা কেমন কাঁদোকাঁদো হইয়া যায়, শহরে ইহাদের বিপদের কথা প্রচার করিব বলিলে একেবারে কাঁদিয়া ফেলে।

স্ত্রী তো চব্বিশ ঘণ্টার ভিতর দশ ঘণ্টা কাঁদিয়াই কাটায়। ভিতরে কিছু গোলমাল আছে বুঝিতে পারি, মেয়েটার চুলপাড় শাড়ি আর সিঁদুরহীন সর্ষি দেখিয়া সন্দেহ আরও দৃঢ় হয়। স্বামীকে জিজ্ঞাসা করিলে বলে, আঁতুড়ে কী সিঁদুর পরতে আছে ? স্ত্রীকে জিজ্ঞাসা করিলে সে ডুকরাইয়া কাঁদিয়া ওঠে !

বড়োই জটিল ব্যাপার। নকল দুঃস্বপ্নের মতো।

দিন দশেক বাদে কিন্তু সব সরল হইয়া গেল। খাদ্য ও দুগ্ধের সন্ধানে বাহির হইয়াছিলাম, ফিরিয়া দেখি কচি মেয়েটা কাঁদিয়া কাঁদিয়া গলা শূকাইয়া মরিতে বসিয়াছে, মা-বাপ কাহারও চিহ্ন পর্যন্ত নাই ! মেয়েটার কাছে একটা চিঠি পড়িয়াছিল। যেমন সংক্ষিপ্ত তেমনই ভীষণ। আমার

উপকারের জন্য কৃতজ্ঞ হইয়া নাম-ধাম না দিয়া লোকটি রহস্যের মীমাংসা করিয়া দিয়া গিয়াছে। যুবতিটি নাকি লোকটির স্ত্রী নয়, বালবিধবা কন্যারত্ন।

পাপটাকে যাহাতে গৃহাতেই মরিতে দিয়া পলাইয়া গিয়া জগতের কল্যাণ করি শেষের দিকে এ-রূপ একটা অনুরোধও জানানো হইয়াছে।

খুকিকে কোনো প্রকারে একটু দুধ খাওয়াইয়া আমি মাথায় হাত দিয়া বসিয়া রহিলাম। অনুপস্থিত বিধবাটি এবং তাহার বাপের উদ্দেশ্যে আমার গালাগালি শুনিয়া গৃহের পাথরগুলিও বোধ হয় সেদিন লজ্জা পাইয়াছিল।

পনেরো বছর পরে ভূমিকম্প !

বাৎসল্যের সিমেন্ট দিয়া যৌবনের শক্ত গারদ করিয়াছিলাম, তাহা ফাটিয়া একেবারে চৌচির ! মেয়েটা গৃহা আলো করিয়া জন্মিয়াছিল, এখন আমার বাড়িটা এমন আলো করিয়াছে যে, এই প্রৌঢ় বয়সে মাঝে মাঝে চোখে অন্ধকার দেখিতে আরম্ভ করিয়াছি।

একরাশি কালো চুল পিঠে ছড়াইয়া ফরসা একখানি কাপড় পরিয়া চঞ্চলপদে সারাদিন চোখের উপরে ঘুরিয়া বেড়ায়, সন্ধ্যার পর আলোর সামনে পড়িতে বসিয়া ছটফট করে, আমি চাহিয়া দেখি আব তারিফ করি। মেয়েটা যে এত সুন্দর, এ যেন আমার অবিশ্বাস্য সুখ। কত কী মনে হয়। পিছু হাঁটতে হাঁটিতে আমি যেন একেবারে কৈশোরের প্রান্তে গিয়া দাঁড়াই, ওর ওই টানা চোখ আর রাঙা ঠোঁট আর অপূর্ব-গঠন তনু আমাকে সেইখানে আটকাইয়া রাখে।

রাতদুপুরে তার ঘরের দরজায় টোকা দিয়া অদ্ভুত গলায় ডাকি, শিলা !

সে অবশ্য ঘুমাইয়া থাকে, সাড়া দেয় না, আমার মুখের ডাকে আমারই ভবিষ্যৎ ভূতটা যেন সামনে আসিয়া দাঁড়ায়, অকস্মাৎ এমন আতঙ্ক হয়, যে বলিবার নয়। নিজের ঘরে ছুটিয়া গিয়া কাঁপিতে কাঁপিতে বিছানায় শুইয়া পড়ি। অন্ধকারে হাতড়াইয়া চুরট, দেশলাই খুঁজিয়া নিয়া তাড়াতাড়ি চুরট ধরাইয়া টানিতে গিয়া কাশিতে আরম্ভ করিয়া দিই। কাশিতে কাশিতে হাসি পায়, আমার হাসির শব্দে অন্ধকার যেন নড়িয়া ওঠে, বাড়িটা যেন বিরক্তিতে একবার একটু কাঁপে, আমার গা যেন ছমছম করে। গলা চাপিয়া হাসি থামাইতে গিয়া গোঁগোঁ শব্দ হয়, তাড়াতাড়ি হাত সরাইয়া নিয়া আমি উঠিয়া বসি।

খোলা জানালায় শব্দ হয়, দাদু !

কীরে শিলা ?

আমার ভয় করছে দাদু। কে যেন হা হা করে হাসছিল।

শুনিয়া শিহরিয়া উঠি। চৌকির প্রান্তটা শক্ত করিয়া চাপিয়া ধরিয়া বলি, ভয় আবার কীসের ? ঘুমোণে যা।

আমি তোমার ঘরে শোব দাদু, দরজা খোলো।

মেয়েটা বলে কী ! এই নিশ্চল রাত্রি, অনুভূতিতে ঘা-মারা এই গাঢ় অন্ধকার, অর্ধোন্মাদ এই নিদ্রাহীন ভূষিত প্রৌঢ়, এ ঘরে শুইতে চায় ও কোন হিসাবে ? রাতদুপুরে জ্বালাতন করিতে নিষেধ করিয়া এমন জোরে ধমক দিয়া উঠি যে, নিজেরই চমক লাগে।

মিনিটখানেক ঘড়িটার টিকটিক শব্দ ছাড়া সব স্তব্ধ হইয়া থাকে, তারপর শুনিতে পাই অবাধ্য মেয়েটা জানালা ছাড়িয়া এক পাও নড়ে নাই, অধিকন্তু ফুঁপাইয়া কাঁদিতেছে।

উঠিয়া দরজা খুলি, ভূত আর আমার ভয়ে শিলা ভালো করিয়া কাঁদিতেও পারিতেছে না, দুই হাতে চোখ ঢাকিয়া জানালার নীচে বসিয়া পড়িয়াছে। দেখিয়া আমার হৃদয় হিম হইয়া যায় এবং আমি স্পষ্ট অনুভব করি সেখানে অতনুর মূর্ছা হইয়াছে।

ও ঘর হইতে বিছানা টানিয়া আনিয়া নিজেই শয্যা রচনা করিয়া দিই। চোখ মুছাইয়া হাত ধরিয়া তুলিয়া দিতেই শিলা নীরবে গিয়া শুইয়া পড়ে।

আমি ক্ষণকাল বারান্দায় দাঁড়াইয়া থাকি। খানিক দূরে তেতলা বাড়িটার মাথা ডিঙাইয়া গিয়া বড়ো বড়ো কয়েকটা তারার সংবাদ নিয়া ফিরিয়া আসার পূর্বেই জলীয় কুয়াশায় আমার দু চোখ আত্মহারা হইয়া যায়। ভিজা সঁাতসঁাতে তাহার আর্তি।

পাড়া-প্রতিবেশীরা বলিতে আরম্ভ করিয়াছে, এবার নাতনির বিয়ে দাও। অমন টুকটুকে নাতনি তোমার !

নাতনি টুকটুকে বলিয়া নয়, আমার টুকটুকে নাতনি বলিয়া ইহাদের বিশ্বাস যেন বেশি ! শুনিলে রাগে গা জুলিয়া যায়, আমার তিলোত্তমা বউ থাকা যেন অসম্ভব ! আমার সুন্দরী মেয়ে যেন ছিল না। টুকটুকে নাতনি যেন আমার থাকিতে নাই !

বলি, আমার নাতনির বিয়ের ভাবনা আমিই ভেবে উঠতে পারব মিস্তির মশায়।

সান্যাল বলে, তা অত ভাবাভাবির দরকার কী ? তুমি নিজেই বিয়ে করে ফেল না হে ! পঁয়তাল্লিশ বছর বয়সে এমন শক্ত সমর্থ দাদু—নাতনি তোমার বর্তে যাবে।

খুশি হইয়া সান্যালের পিঠ চাপড়াইয়া বলি, তা মন্দ বলনি সান্যাল ! আমিও মাঝে মাঝে ওই কথাই ভাবি। একটা বেরসিক ছোঁড়ার হাতে ওকে দিতে আমার একটুও ইচ্ছে নেই।

ইহাদের ভিতর চাটুজো লোকটা অতি বদ। বলে, না না ; এ ঠাট্টার কথা নয়। মেয়েটি ডাগর হয়েছে, এবার বিয়ে দেওয়া কর্তব্য। আমাদের এই ভূপেনের সঙ্গে সম্বন্ধ কর না ?

ভূপেন ছোঁড়া পাড়ার হৃদয় ডাক্তারের পুত্র এবং পাড়ার মধ্যে বোধ করি সবচেয়ে সুপাত্র। অন্দরে ঢুকিতে দিই না, তবু নিত্য আমাদের এই আড্ডায় হাজির হয়। বোধ হয় পান জল দিবার জন্য শিলা যে বাহিরে আসে সেই সময় তাহাকে দেখিবার লোভে। চাটুজোব কথায় ছোঁড়ার মুখ লাল হইয়া উঠিয়াছে দেখিয়া মনে মনে স্থির করিয়া ফেলি এবার হইতে পান জল দিবার বরাতটা চাকরের উপরেই থাকিবে।

মুখুখে চাটুজো অপেক্ষাও পাজি। স্মিতমুখে ভূপেনের দিকে চাহিয়া বলে, বড়ো ভালো ছেলে, বড়ো ভালো ছেলে। পাড়ার সবগুলি ছেলে এ রকম হলে—

ঠিক এমনই সময়ে পান নিয়া ঘরে ঢুকিয়া শিলা প্রশংসাগুলি সব শোনে। ইচ্ছা হয় মেয়েটাকে অন্দরে ছুঁড়িয়া দিয়া লাঠি নিয়া সকলকে মোড় পর্যন্ত তাড়াইয়া নিয়া যাই, আর ভূপেনের মাথায় বসাইয়া দিই সেই লাঠি। পুলিশের হাত এড়াইতে শিলাকে নিয়া তার সেই আঁতুড়ের গুহাতে চিবকাল লুকাইয়া থাকি। সেই অপরিসর গুহায় ঘেঁষাঘেঁষি হইয়া রাত কাটানোর সমর্থন পাইলে আমি কী না করিতে পারি ?

সকলকে বিদায় দিয়া ভিতরে গিয়াই শিলাকে বলি, বিয়ে করবি শিলা ?

সে মাথা নাড়িয়া বলে, না দাদু, বিয়ে আমি করব না।

তবে কী করবি ?

তোমার কাছে থাকব।

তা থাকিস। কিন্তু চিরকাল নাতনি হয়েই থাকবি ? বউ হয়ে থাক না !

দূর ছোটোলোক। বলিয়া সে হাসে।

তাহার মুখ হইতে যে দৃষ্টি সরাইতে পারি না, তাহা এমনই মুখর যে চক্ষু মার্জনার ছলে ঢাকিয়া দিতে হয়। আপশোষ করিয়া মরি যে কোন মহৎ উদ্দেশ্য নিয়া ওর দাদু হইয়া স্নেহ শিখাইয়াছি, স্বামী হইয়া প্রেম শিখাই নাই। আজ তাহা হইলে—

চিন্তাটা বড়ো জটিল! আমার স্নেহের পুঙ্জলী আমাকে এমনভাবে ঠকাইবে, কে তাহা ভাবিতে পারিয়াছিল ?

ইচ্ছা হয় জন্মের কাহিনি শুনাইয়া মেয়েটাকে ভাঙিয়া দিই। উহার মুখের নিষ্পাপ সরলতা ঘুচিয়া গিয়া আমার পথ পরিষ্কার হোক।

মাব কথা শুনবি শিলা ?

বলো দাদু !

আমি বলিতে আরম্ভ করি। গৃহের আবছা আলোয় শিলার জন্মকথা। কিন্তু যতবারই বলি আসল বক্তব্যটা গোপন থাকিয়া যায়, শেষ করি একটা মিথ্যা বলিয়া। অযত্নে অচিকিৎসায় ঠাণ্ডায় না-দেখা মার শোচনীয় মৃত্যুকাহিনি শুনিয়া শিলার চোখ দিয়া জল পড়ে !

নিশ্বাস ফেলিয়া ভাবি, বদমাইশ তো কোনোদিন ছিলাম না, পারিব কেন ! অন্যায় করিবার অক্ষমতায় আত্মপ্রসাদ জন্মে, যথালভ মনে করিয়া তাহাতেই খুশি থাকিতে চেষ্টা করি।

কিন্তু পারিলাম। শিলাকে চুম্বন করিবার মতো অবস্থাটা কিছুকালের মধ্যেই সৃষ্টি হইয়া গেল। কেমন করিয়া গেল তাহা এত বেশি সূক্ষ্ম যে ভাষায় মোটা ইঞ্জিতে সংক্ষেপে প্রকাশ করিবার দুঃখে কলম ছুঁড়িয়া ফেলিতে ইচ্ছা হইতেছে।

শিলার বয়স আব পনেরো নাই, ষোলো হইয়াছে।

কিছুকাল হইতেই দেখিতেছি সে গভীর হইয়া উঠিয়াছে, কিন্তু কী এক না-জানা ভয়ে চোখ দুটি চঞ্চল। মুখ যেন বর্ষগহীন শ্রাবণের আকাশ, ক্রমাগতই কালো কালো মেঘ ভাসিয়া যাইতেছে। সকালবেলা আমি টাকা পয়সার হিসাব নিয়া বাস্তব থাকি, মুখ তুলিতেই দেখি একটা অদ্ভুত বিষন্ন মুখভঙ্গি করিয়া সে আমার দিকে একদৃষ্টে চাহিয়া আছে।

আমাকে চাহিতে দেখিলে সরিয়া যায়।

আমার হিসাব যায় গুলাইয়া, ডাকি, শিলা শোন।

আমি ডাকিলেই শিলা দুড়দাড় ছুটিয়া আসিত, এখন এমন মস্তুরগতিতে আসে যেন পদে পদে পা বাধিয়া যাইতেছে। খানিক তফাতে থাকিয়াই বলে, কী দাদু ?

কাছে আয়।

শিলা কাছে আসে না, আসিতে থাকে ! নাগালের মধ্যে আসিলেই খপ কবিয়া তার হাত ধরিয়া পাশে বসাইয়া দিই। বলি, তুই বড়ো লক্ষ্মী মেয়ে শিলা।

শিলা জোর করিয়া একটু হাসে। বলি, আমাকে তুই ভালোবাসিস শিলা ?

পরম আশ্চর্য হইয়া সে তৎক্ষণাৎ বলে, বাসি দাদু। ঘামাটি মেরে দেব বুঝি ?

সুতরাং ওইখানেই থামিতে হয়, যদিও সেই থামার অর্থই নেপথ্যে অগ্রসব হওয়া। বলি, ঘামাটি কইরে ? আমার আর ঘামাটি হয় না। দু বেলা কত সাবান মাখি তা জানিস ?

খিলখিল করিয়া হাসিয়া শিলা বাঁচে এবং ইহার পর কয়েকদিন ধরিয়া সে আগের মতো হাসিখুশি হইয়া কাটায়। এই পরিবর্তন কিন্তু সাময়িক পরিবর্তনটাকে তাহার নিকটেও স্পষ্টতর করিয়া তোলে। তাহার শঙ্কা-সংকোচহীন জীবন-প্রবাহ আবার অবধে বহিতেছে দেখিয়া আমিও এ দিকে কিমাইয়া পড়ি। হাই তুলিয়া মোড়ামুড়ি দিয়া ও-মেয়েটার নীরীত্ব যে আবার ঘুমাইয়া পড়ে ইহা আমার ভালো লাগে না।

আবার আমার অজস্র সূক্ষ্ম ইঞ্জিতের পীড়ন চলে। হাসিখুশি মিলাইয়া গিয়া তাহার কপোল হয় পাণ্ডুর, চোখ কবে ছলছল।

এমনভাবে দিন যায়, অবশেষে একদিন বর্ষা-ব্যাকুল দ্বিপ্রহরে আমার এই পুরু তামাকের ধোঁয়ায় বিবর্ণ ঠোট দিয়া শিলার হাসিখুশি চিরকালের জন্য মুছিয়া নিলাম। মনে করিয়াছিলাম ঘুমাইয়া আছে, কিন্তু দেখিলাম ধরা পড়িয়া গিয়াছি।

কী দাদু ? বলিয়া ধড়মড় করিয়া উঠিয়া বসিল ।

কত কথাই বলিতে পারিতাম। দাদামশাই নাতনির ঠোটে চুম্বন করিয়াছে, ইহার কত সংগত ব্যাখ্যাই ছিল। চুম্বন যে লভ রাইট-এর সভাসংস্করণ এ কথা আজও যে জানে না দুই-চারিটা সন্নেহ বাণী বলিয়া কত সহজেই তাহাকে ভোলানো যাইত। কিন্তু সে সব কিছু না করিয়া আমি দিলাম ছুট !

ছুটিয়া রাস্তায় পড়িয়া হনহন করিয়া পুরা দুই মাইল হাঁটিয়া থামিলাম। পথের ধারে একটা নির্জন গাছতলায় দাঁড়াইয়া ভাবিতে লাগিলাম আর কত ঘণ্টা পরে বাড়ি ফেরা চলিবে।

হঠাৎ খেয়াল হইল একটা শীর্ণকায় বৃদ্ধ ভদ্রলোক দুই হাতের ভিতরে আসিয়া তীক্ষ্ণদৃষ্টিতে আমার মুখে কী যেন খুঁজিতেছেন। ভালো করিয়া নজর করিতে চিনিলাম।

আপনি যে ! এখনও বেঁচে আছেন দেখছি। বলি, এ বারও বিপদ নাকি ? এ কিন্তু লোকালয় মশায় !

আজ্ঞে বিপদ নয়। সে বেঁচে আছে ? বলুন, সে বেঁচে আছে ?

মাথা নাড়িয়া শূন্যে তুড়ি দিয়া বলিলাম, বাঁচে কী ? আপনিই বলুন ! মৃত্যুই যে পৃথিবীতে একমাত্র সত্য ! আপনি, আমি বেঁচে আছি এটাই আশ্চর্য। আহা, ওখানে বসবেন না মশাই !

লোকটা মাথায় হাত দিয়া পথেই বসিতে যাইতেছিল, আমার অনুরোধে বসিল না। বলিল, মেয়েটা পনেরো বছর ধরে পাগল হয়ে আছে, আপনাকে সেই থেকে খুঁজছি। দুর্গা দুর্গা, সব পরিশ্রম ব্যর্থ হল !

বলিলাম, তাই হয়। ও জন্য দুঃখ করবেন না। ষোলো বছর পরিশ্রম করে প্রিয়র মন খুঁজে পেলাম না, আপনার তো মানুষ খোঁজার তুচ্ছ পরিশ্রম।

লোকটাকে ফাঁকি দিবার জন্য নানা রাস্তা ঘুরিয়া বাড়ি ফিরিলাম। দেখি, শিলা আমার জন্য ময়দা মাখিতেছে ! মুখখানি তার যেমন বিষণ্ণ, তেমনই শান্ত।

একগাল হাসিয়া বলিলাম, আমি ভাবলাম, তুই রাগ করেছিস শিলা।

সে মুখ কালো করিয়া বলিল, খেতে দিচ্ছ, পরতে দিচ্ছ, রাগ আর কী করে করি দাদু !

আপনারা শুনিলেন ? খাইতে-পরিতে দিই বলিয়া আমি যেন কত জোর খাটাই ! জোর খাটাইতে পারিলে আমার ভাবনা কী ছিল বলুন তো ?

উপরে গিয়া শুইয়া পড়িলাম। আধঘণ্টা পরে ক্ষুধার তাগাদায় শিলাকে তাগাদা দিতে নীচে নামিয়া দেখি, সে তখনও লুচি ভাজিতেছে আর সলজ্জে অদূরে দাঁড়ানো ভূপেনের প্রশ্নের জবাব দিতেছে। আমি বাড়ি না থাকিলে আমাকে ডাকিতে আসিয়া ছোঁড়া সদর হইতে শিলার সঙ্গে দুই-চার মিনিট কথা কহিয়া যায় সম্প্রতি ইহা জানিতে পারিয়াছিলাম, কিন্তু এ যে একেবারে অন্দরে চড়াও হওয়া !

আমাকে দেখিয়া দুজনেই খাসা লজ্জা পাইল। আমতা করিয়া ভূপেন বলিল, আপনার সঙ্গে একটা কথা ছিল দাদু।

তা আমাকে ডাকলেই হত ! বলিয়া সটান বৈঠকখানায় চলিয়া গেলাম। এমন স্পষ্ট ইঙ্গিতও কি ছোঁড়া বুঝিতে চায় ! হাঁক দিয়া বাহিরে ডাকিয়া আনিলাম, তবে শিলার সঙ্গে তার গল্প ফুরাইল। বেহায়া !

কী কথা বলতে চাও শুনি ? চটপট বলো।

মুখ লাল করিয়া কোনোমতে কথাটা বলিতেই চটিয়া উঠিলাম—বটে ! তা বিয়ে করে ওকে খাওয়াবে কী শুনি ? এম এ ডিগ্রির ডিপ্লোমাখানা ?

ছোঁড়া যে ইতিমধ্যে সাড়ে তিনশো টাকার চাকরি বাগাইয়া আটবাট বাঁধিয়া আসিয়াছে, আমি কি সে সংবাদ রাখি ? প্রথমটা বেশ ভড়কাইয়া গেলাম, কিন্তু মুহূর্তে সামলাইয়া নিয়া বলিলাম, তা হোক, তোমার সঙ্গে আমি ওর বিয়ে দেব না।

কেন দাদু ?

সে কৈফিয়ত তোমাকে দেব কেন হে বাপু ? বাধা আছে এইটুকু শূনে রাখ, বলিয়া আমি ফের রাগিয়া আগুন হইয়া উঠিলাম।

দিন চারেকের মধ্যে সমস্ত ব্যবস্থা করিয়া শিলাকে বলিলাম, তল্লি বাঁধ শিলা, এখানকার বাস তুলতে হল।

শিলা সজলচোখে বলিল, কেন দাদু ? বেশ তো আছি এখানে ?

বেশ থাক আর যাই থাক, পরের দিন জিনিসপত্র সব গাড়ির ছাদে চাপাইয়া শিলাকে ভিতরে বসাইলাম। কিছু ফেলিয়া গেলাম কী না দেখিতে পাঁচ মিনিটের জন্য বাড়ির ভিতরে গিয়াছি, ইহার মধ্যে ভূপেন আসিয়া গাড়ির সামনে দাঁড়াইয়াছে।

শুদ্ধ হাসিয়া বলিলাম, ভূপেন যে ! আমরা তো চললাম।

একটা কথা শুনুন দাদু, বলিয়া সে আমাকে একান্তে নিয়া গেল।

কোথায় যাচ্ছেন ? শিলাও জানে না বললে।

হাসিয়া বলিলাম, কোথায় যে যাচ্ছি আমিও জানি না হে ! কোনো গুহা-টুহায় আশ্রয় নেব ভাবছি।

এক মুহূর্ত স্তব্ধ থাকিয়া ভূপেন বলিল, আপনার মত কি কোনোদিন বদলাবে না দাদু ? এ বিয়ে না হলে আপনার নাতনি অসুখী হবে।

গম্ভীর হইয়া বলিলাম, দ্যাখো বাপু কবি, তোমায় একটা সং উপদেশ দিই। শুধু কাবাচর্চা করে জীবনটা মাটি কোরো না। জীবনে আরও ঢের বড়ো বড়ো সাধনার সুযোগ আছে। বলিয়া গাড়িতে উঠিয়া পড়িলাম। আমার সামনেই শিলা যতক্ষণ দেখা গেল ভূপেনের দিকে একদৃষ্টে চাহিয়া রহিল।

হে পাঠক হে পাঠিকা, কৈফিয়ত আমি দিব না। শুধু কয়েকটা কথা বলি। শিলাকে নিয়া আমি যে আদিকাব্য রচনা করিতে চাই, ত্যাগের কাব্য তার চেয়ে বড়ো, এ কথা মানা আমার পক্ষে আত্মপ্রবঞ্চনা। ভূপেনের হাতে শিলাকে সঁপিয়া দিয়া আমি শূন্য ঘবে বুক চাপড়াইলে আপনারা খুবই খুশি হন, কিন্তু তাহাতে আমার কী লাভ ? কেনই বা শিলাকে আমি ছাড়িব ! বিলাইয়া দিবার জন্য এত কষ্টে এত যত্নে আমি ওকে মানুষ করি নাই। গুহায় ফেলিয়া আসিলে ও বাঁচিত না। আমি ওর প্রাণ রক্ষা করিয়াছি। আমার চেয়ে ভূপেনের অধিকার বেশি কেমন করিয়া ? আপনারা ন্যায়বিচার করিবেন।

আপনারা বিশ্বাস না করিতে পার্বন, শিলাকে আমি ভালোবাসি। আমার যেমন প্রকৃতি, আমার ভালোবাসাও তেমনই। দেড়শো কোটি মানুষের মধ্যে আমি যেমন মিথ্যা নই, আমার এই ভালোবাসাও তেমনই মিথ্যা নয়।

আমার এ প্রেম যেন গোড়া ঘেঁষিয়া কাটা তরুর মতো—শাখা নাই, কিশলয় নাই, পাতা নাই, ফুল নাই, শুধু আছে মাটির উপরে শক্ত গুঁড়ি আর মাটির নীচে সরস সতেজ মূল, যাহার রস সঞ্চয় কেবল নিজেই পুষ্ট করিবার জন্যই। বাস্তবিক, ভাবিয়া দেখিলে বোঝা যায় আমি যে আমার বিশাল

লোমশ বৃকে দুই হাতের হাতুড়ি দিয়া কচি মেয়েটাকে ছেঁচিতে চাই, ইহার মধ্যে আমিও নাই, শিলাও নাই, আছে শুধু অনাদি অনন্ত শাস্ত্রত প্রেম, পশু-পাখি মানুষকে আশ্রয় করিয়াও যে প্রেম চিরকাল নিজের সমগ্রতা বজায় রাখিয়াছে। আমি আর শিলা তো শুধু ক্রীড়নক। দু দিন পরে আমরা যখন শূন্যে মিলাইব এ প্রেম তখনও পৃথিবীতে বাঁচিয়া থাকিবে।

তা ছাড়া শিলার পবিত্রতায় আমার শ্রদ্ধা নাই। ওর বিধবা মাকে আমি কিছুতেই মন হইতে তাড়াইতে পারি না। তার সেই শূত্রবাসা শীর্ণা-ক্রন্দসী মাতা আমার মনে একটা স্পষ্ট প্রেরণার মতো জাগিয়া আছে। দুই হাতে অন্ধকার ঠেলার মতো, সেই কলঙ্কিনী মাতার কন্যা আমার প্রেমেরই যোগ্য এই অন্ধ যুক্তি আমি ঠেলিয়া দিতে পারি না।

পশ্চিমে একটা শহরের প্রান্তে নিরলা বাগানবাড়িতে শিলাকে নিয়া নীড় বাঁধিয়াছি। রোমাঙ্গ একেবারে রোমাঙ্গকর হইয়া উঠিয়াছে।

আষাঢ়ের মেঘের মতো গভীর হইয়া শিলা আমার তেমনই সেবা করিতেছে। পরিহাস করিলে হাসে না, মিষ্টি কথা বলিলে শাস্ত্র চোখ তুলিয়া তাকায়, হাত ধরিয়া সোহাগ করিতে গেলে কাগজের মতো সাদা আর পাথরের মতো শক্ত হইয়া ওঠে !

ইঙ্গিতে বলি, বেঁচে থাকতে হলে সবই চাই শিলা।

সে বলে, মরাটাও তো কঠিন নয় দাদু !

তা বটে। বলি, তবু যার আর অন্যথা নেই তাকে মানতে হয়।

সে বলে, জানি। কিন্তু মানার পথটা আমি তোমার কাছে শিখব না দাদু। দরজায় দাঁড়িয়ে থাকলে আমি কী করে বাইরে যাই বলো তো ?

দিনের ব্যাপারটা এখন এই রকম দাঁড়াইয়াছে। রাত্রির ব্যাপার অন্যবৃপ।

বাহিরে কোনোদিন জ্যোৎস্না থাকে, কোনোদিন থাকে না, কোনোদিন বৃষ্টি পড়ে, কোনোদিন পড়ে না। দুই হাতে বৃক চাপিয়া বিছানায় উপুড় হইয়া পড়িয়া থাকি। ঘুম আসে না, আসিবে না জানি, সে জন্য ভাবিও না। কিন্তু ঘরের বাতাস যেন নিশ্বাসের পক্ষে অপ্রচুর হইয়া পড়ে। উপরে কাঁটা, নীচে কাঁটা দিয়া কে যেন আমাকে জীবন্ত কবর দিয়াছে মনে হয়।

তারপর এক সময় পা টিপিয়া টিপিয়া গিয়া শিলার দরজা ঠেলিয়া বলি, তোর আজকাল ভয় করে না কেন শিলা ?

চব্বিশ ঘণ্টাই তো ভয় করে দাদু।

তবে দরজা খোল। ভয় মিটিয়ে নে।

শিলা কঠিনস্বরে বলে, ঘুমোও গে যাও দাদু। এমন যদি কর, যে দিকে দু চোখ যায় চলে যাব।

নিজের ঘরে ফিরিয়া গিয়া দুই হাতে বৃক চাপিয়া শূইয়া পড়ি। শৈলে যার জন্ম, শিলা যাব নাম, সে শিলার মতো শক্ত হইবে জানি, কিন্তু চিরকাল ডুবাইয়া রাখিলেও শিলা কেন গলিবে না ভাবিয়া মাথা গরম হইয়া ওঠে।

খুকি

যার ভালো নাম কাদম্বিনী তার ডাকনাম সাধারণত হয় কাদু অথবা কাদি। দশ বছর বয়স পর্যন্ত কাদম্বিনী তার ভালো নামের এই দু রকম ভাঙা সংস্করণেই সাড়া দিত। তারপর হঠাৎ একদিন সে সাড়া দেওয়া বন্ধ করিয়া দিল। প্রতিবাদ নয়, রাগ করাও নয়, ডাকনাম দুটি যে সে পছন্দ করে না সে কথা ঘোষণা করা নয়, একেবারে সাড়া না দেওয়ার অসহযোগ ! কাদু ! ও কাদু ! ডেকে ডেকে গলা চিরে গেল, শুনতে পাস না ? এই কাদি !

কে সাড়া দিবে ? এ বাড়িতে কাদুও কেউ নাই, কাদিও কেউ নাই।

সেই হইতে তাকে খুকি বলিয়া ডাকা হয়। প্রথম প্রথম লোকের মনে খাকিত না, পুরানো নামে তাকে ডাকিয়া বসিত। কাদম্বিনী তুলিয়াও সাড়া দিত না। নাম যেন তার ছেলেমানুষির চেয়ে বড়ো ছিল—নিত্য ব্যবহার্য তুচ্ছ ডাকনাম ! এখন, ষোলো বছর বয়সে (সতেরো হওয়া আশ্চর্য নয়, আঠারোও হইতে পারে) খুকি নামটাও সে অপছন্দ করিতে আরম্ভ করিয়াছে। কিন্তু একজন মানুষ আর কতবার সামান্য ডাকনামের জন্য চূপচাপ গোলমাল বাধাইতে পারে ? বড়ো বয়সে সেটা ভালোও দেখায় না। তা ছাড়া, এ বাড়ির বাস সাজ্য হইতেই বা তার কত দেরি। ছ মাস, এক বছরের জন্য স্তব্ধ হাঙ্গামা করা হাঙ্গামার অপচয়।

রং একটু ময়লা কাদম্বিনীর, মুখখানাও দেখিতে তেমন সুশ্রী নয়, তবে দেহের গঠনটি তার সুঠাম। এক কথায় বোঝানো যায় না এ বকম। মধ্যবিন্ত বাঙালির ঘরে সচরাচর চোখে পড়ে না এ রকমও বটে। এটা বৃপের পর্যায়ভুক্ত নয়। মেয়েদের যে বৃপ ভদ্রলোকদের চোখে পড়ে, সেটা থাকে তাদের মুখে আর চামড়ায়—চামড়াতেই বেশি। জন্মানোর আগে ভৌতিক আত্মারা সত্যম্ শিবম্ সুন্দরমের জ্যোতিতে অন্ধ হইয়া থাকে—নয়তো কালা আদমি আর মেয়েদের 'ফরসা করা ফরসা করে' আবেদনের কেলাহলে জন্মদাতার কান কালা হইয়া যাইত। মেয়েদের স্বাস্থ্যও অনুমোদনযোগ্য, ভদ্ররকমের রোগবিহীন হৃষ্টপুষ্টতা। গঠন আর স্বাস্থ্য আলাদা। শরীর ভালো থাকা স্বাস্থ্য ; গঠন—? সম্ভবত সেটা শরীরের বজ্জাতি, কারণ বজ্জাত লোক ছাড়া ওটা আর কারও দৃষ্টব্য নয়।

কাদম্বিনীর বাবা ডাক্তার অসমঞ্জ রক্ষিত কিছুদিন হইতে মেয়েকে ভালো ভালো ছেলের বাপ-দাদা-বুড়ো-জ্যাঠা-বন্ধুবান্ধব প্রভৃতির সামনে হাজির করিতে আরম্ভ করিয়াছেন। প্রথমে লক্ষ্য ছিল উঁচু, আশা মানুষের চোখে ধাঁধা লাগায় কিনা। কিন্তু সমাজের উঁচু স্তরের লোকেরা এত ঠান্ডা আর ভদ্র আর মার্জিতদৃষ্টিসম্পন্ন যে কাদম্বিনী ঘরে ঢোকামাত্র বিতৃষ্ণায় তাদের যেন মাথা গরম হইয়া ওঠে, একটা প্রাগৈতিহাসিক অভদ্রতায় অপমান বোধ হয়, ফাটা চশমার কাচের ভিতর দিয়া তাকানোর মতো দু চোখে ধারালো রেখার সূক্ষ্ম পীড়ন শুরু হয়। দোষটা বাড়ির লোকের। তাবা কাদম্বিনীকে না-সাজানোর আধুনিক ফ্যাশানে সাজায়। শাড়ির পাঁচো, এলোচুলের ঔদ্ধত্য এবং আরও কতকগুলি খুঁটিনাটিতে কাদম্বিনীর চেহারায় বৈশিষ্ট্য হয়। চৌকাঠ পার হইয়া কয়েক পা হাঁটিয়া কাদম্বিনীকে বসিতে হয়। তার সেই চলন ও বসিবার ভঙ্গি দেখিয়া মনে হয় পুকুরে যেন একটি সমুদ্রের ঢেউ আসিয়াছে।

কাদম্বিনীর মুখের একটি সম্পদ এই উপযুক্ততার পরীক্ষা দেওয়ার সময় পরিণত হয় তার একটি অতিরিক্ত বিপদে। মুখের শিশুসুলভ সরলতার ছাপ। অজানা দর্শকদের সন্দিক্ত মনে এটা তার মৌখিক অভিনয়ের মতো খাপছাড়া ঠেকে, কাদম্বিনীকে ফেলিয়া দেয় বর্ণচোরা আমের পর্যায়ে। মুখের কচিৎ পাকামির আবরণ, চোখের নিষ্পাপ দৃষ্টি প্রবঞ্চনার কৌশল।

বাস্তবতার ভায়ে সকলের আশাও সুতরাং নুইতে নুইতে এখন মাটি ছুঁয়াছে। কেরানি, স্কুলমাস্টার, দ্বিতীয়পক্ষ প্রভৃতির স্তর। জীবনের অসংখ্য সংস্করণের সবগুলি ভূমিকায় মমতার ভাবপ্রবণতা সার্থক করিতে চাহিলে চলিবে কেন ? তাই, এবার কাদম্বিনীকে একজনের পছন্দ হওয়ার পর বাড়ির লোক হাসিলও না, কাঁদিলও না।

কাদম্বিনী ভাবিয়া চিন্তিয়া দেখিল যে মধ্যস্থ ব্যবহার করিলে গোলমালও বেশি হয়, সময়ও নষ্ট হয়। তার চেয়ে সব কলকাঠি যার হাতে সোজাসুজি তার কাছে যাওয়াই ভালো। যতই হোক, সে তার বাপেরই আদুরে মেয়ে। লোকে আহুদি পর্যন্তও তো বলিতে ছাড়ে না।

অসমঞ্জ রোগী দেখিতে বাহির হইতেছিলেন। কাদম্বিনী গিয়া বলিল, একটু পরে রোগী দেখতে যেও বাবা। আমার একটা দরকারি কথা শুনে যাও।

মেয়ের দরকারি কথা শুনিয়া অসমঞ্জ থতোমতো খাইয়া গেলেন।

মাথামুছু কী যে বলিস ঠিক নেই। চিঠির জবাব দেব না ? পছন্দ করে চিঠি লিখেছে, জবাব দেব না কেন ?

লোক ভালো নয় বাবা।

লোক ভালো নয় ! তুই কী করে জানলি লোক ভালো নয় ?

বাপের মুখের উপর এ কথার জবাব দেওয়ার মতো বেহায়া বা আহুদি বা সরল বা খুকি মেয়ে কাদম্বিনী নয়। মধ্যস্থ শেষ পর্যন্ত তাকে মানিতেই হইল। কৈফিয়ত সে দিল পিসতুতো দিদি শান্তিলতার কাছে।

লোকটা ভারী বদ শাস্তিদি। বিচ্ছিরি করে তাকাচ্ছিল।

বিচ্ছিরি করে তাকাচ্ছিল মানে কী ভাই খুকি ? তুই কি ওর তাকানি তাকিয়ে তাকিয়ে দেখছিলি ? তাকানি দেখে কী করেই বা বুঝলি সে বদ লোক ?

শান্তিলতা সাত বছরের পুরানো বউ, কিন্তু সুখ অথবা দুঃখের বিষয়, তার স্বশুরবাড়ি নাই। স্বামী তার এত কম রোজগার করে যে, এ বাড়ির সকলকেই তার খাত্তির করিয়া চলিতে হয়। এমন শিখিল, তামাশা-বর্জিতা, কথা-শোনা, মন-রাখা মেয়ে সে, যে, বউদির চেয়ে তার কাছেই মনের কথা বলা সহজ।

বিচ্ছিরি চেহারা, বিচ্ছিরি তাকানি, গরিবের একশেষ ; ওকে আমি—

শান্তিলতা মীমাংসিত সমস্যায় স্বস্তি বোধ করিল।

তাই বল তোর পছন্দ হয়নি। গরিব তো নয় ভাই খুকি ? একশো বারো টাকা না কত মাইনে পায় যে !

পাক। ওর সঙ্গে যদি আমার ইয়ে হয়, আমি তা হলে গলায় দড়ি দেব, নয় বিষ খাব, নয় কাপড়ে আগুন ধরিয়ে—

শান্তিলতার কাছে মাসে মাসে একশো বারো টাকা অনেক, অনেক। কাদম্বিনীর অপছন্দ, সজল চোখ আর সাংঘাতিক নভেলি কথার অর্থ সে বুঝিতে পারিল না। এমন বোকা ছেলেমানুষ সরল মেয়ে না হইলে কারও মুখ এমন কচি খুকির মতো হয় ?

ছি ভাই খুকি, এ সব কথা কি বলতে আছে ?

কী বলিতে আছে, আর কী বলিতে নাই, সেটা নির্ভর করে যে বলে তার বুদ্ধি-বিবেচনার উপরে। কাদম্বিনী চোখ পাকাইয়া বলিল, ছি ! ছি, শাস্তিদি ! তোমরা আমায় ধরে বেঁধে—

কথা শেষ না করিয়া কাদম্বিনীর টোক গেলার রকমে শান্তিলতার বুকের মধ্যে টিপটিপ করিতে লাগিল। ভয়ে ভয়ে বলিল, ধরে বেঁধে নয় খুকি। কদিন থেকে সম্বন্ধ হচ্ছে, এক জায়গায় বিয়ে তো হওয়া চাই ? এ সম্বন্ধ মন্দ কী, একশো বারো টাকা—

রাখো তোমার একশো বারো টাকা।

উনি বলছিলেন, কাল মাথা ধরে আমার ঘুম আসেনি কিনা তাই অনেক রাত পর্যন্ত দুজনে কথাবার্তা বলছিলাম—উনি বলছিলেন, এখানে বিয়ে হলে খুকি খুব সুখী হবে। বি এ পাস, একশো বারো টাকা মাইনে—

কাদম্বিনী হাই তুলিয়া বলিল, আমি কিছু শুনতে চাই না শান্তিদি। আমি কি ফেলনা বে, একটা বি এ পাস হাড়াগলে—একশো বারো টাকায় কী হয় মানুষের !

সৌম্য নামে যার জন্য এই বিদ্রোহ সে-ও কম হাড়াগলে নয় এবং ছ মাস ওকালতি করিয়া বারোটা টাকাও সে রোজগার করিয়াছে কিনা সন্দেহ। কিন্তু তার বাবার এত টাকা আছে যে, তিনি ভবানক কৃপণ হওয়া সত্ত্বেও সৌম্য সিন্ধের পাঞ্জাবি গায় দেয় আর একটা সিগারেট ফুকিয়াই প্রায় তিনটা পয়সা ধোঁয়া কবিয়া উড়াইয়া দেয়। মাঝে মাঝে অসমাজের মধ্যবিত্ত সংসাবের বিশৃঙ্খল আবর্তের মাঝখানে আসিয়া হাজির হয় এবং অকৃত্রিম প্রসন্নতার সঙ্গে আগাগোড়া ঘরের ছেলের মতো ব্যবহার করিয়া যায়। বড়োলোকের ছেলের এই অনুগ্রহ এখনও এ বাড়ির লোক সময়-সময় বিশেষভাবে উপভোগ করে। কারণ, অনেকদিন হইতে ঘরের ছেলের মতো ব্যবহার করিয়া গেলেও বড়োলোকের ছেলে চিরকাল বড়োলোকেরই ছেলে।

কাদম্বিনীর সতেরো-আঠারো বছর ধরিয়া বড়ো হওয়ার ফলাফল প্রথম যেদিন একসঙ্গে সৌম্যের চোখে পড়িল, সেদিন সকালে তার বড়ো মাথা ধরিয়াছিল এবং অ্যাসপিরিন গিয়াছিল ফুরাইয়া। দু কাপ চা খাইয়াও মাথা ধরা না কমায় বেলা প্রায় সাড়ে নটার সময় সে গেল অসমঞ্জবাবুর বাড়ি। কাদম্বিনীকে দেখিয়া মাথাধরা কমানোর জন্য নয়, অ্যাসপিরিনের জন্য। চাকরকে পাঠাইয়া দিলেও পাঁচ মিনিটের মধ্যে ঔষধটা আসিত, তবু সে যে নিজেই কেন গেল তাব কোনো কারণ নাই। এ রকম কারণবিহীন তুচ্ছ ঘটনার সূত্র ধরিয়া বড়ো বড়ো ওলোটপালট ঘটে বলিয়া অনেকে একে বলে ভবিতব্যতা। সেটা সংগত নয়। কারণ, আজ সৌম্যের মাথা না ধরিলে, বাড়িতে অ্যাসপিরিন থাকিলে অথবা চাকরকে অ্যাসপিরিন আনিতে পাঠাইলেও দুদিন পরে যে কাদম্বিনীকে দিকে তার চোখ পড়িত না, তার কোনো প্রমাণ নাই। সে তো অন্ধ নয়। বড়ো বড়ো চোখ আছে তাব।

অসমঞ্জবাবু রোগী দেখিতে গিয়াছিলেন। বাহিরের ডিসপেনসারি হইতে ঔষধ সংগ্রহ করিয়া সৌম্য ভিতরে গেল, কাদম্বিনীকে ডাকিয়া হুকুম দিল, খুকি, জল দে তো আমাকে এক গ্লাস, ঔষধ খাব।

কাদম্বিনীর দুই দাদা অফিসে, এক ভাগনে কলেজ, ও আরও দুই ভাই স্কুলে যাওয়ার জন্য প্রায় একসঙ্গেই প্রস্তুত হইতে আরম্ভ করিয়াছে বলিয়া সংসারের আবর্ত এখন চবমে উঠিয়াছে সত্য, তবু সৌম্যের হুকুম অনেকগুলি প্রতিধ্বনি তুলিল। রান্নাঘর হইতে মা জিজ্ঞাসা করিলেন—কেন সে ঔষধ খাইবে; কলতলায় মানরতা বড়দাদা জিজ্ঞাসা করিলেন—সে কী ঔষধ খাইবে; স্বামীর কাপড়-গামছা-হাতে সামনে দিয়া যাইতে যাইতে একটু দাঁড়াইয়া বড়োবউ বলিল—সর্দির জন্য মাথা ধরিয়া থাকিলে সে ইউক্যালিপটাস শুকুক না; আর ঘরের ভিতরে দেয়ালে-টাঙানো-আয়নার সম্মুখে দাঁড়াইয়া দাড়ি কামাইতে কামাইতে মেজোদাদা মন্তব্য করিল যে, মাথাটা কাটিয়া ফেলিলেই যখন সব হাঙ্গামা চুকিয়া যায়, এত ঔষধপত্র খাওয়া কী জন্য।

কাচের গ্লাসে জল আনিয়া দিয়া একটু হাসিয়া কাদম্বিনী বলিল, আবার মাথা ধরেছে? কী বিচ্ছিন্নি মাথাটা তোমার।

এই হাসি আর মন্তব্যের সুর তার পরিচিত খেয়াল করিয়া, কিমানো-ভাব কাটিয়া গিয়া সৌম্য যেন হঠাৎ সজাগ হইয়া উঠিল। একটা বিশেষ বয়সেই শিশু মেয়েরা ঠোঁটের নূতন-পাওয়া খেলনাব মতো এই হাসিকে লইয়া খেলা করে, নূতন-শেখা গানের সুরের মতো মুখে সব সময় শোনা যায়

এই কথা, এই সুর। কাদম্বিনী যে নিঃসন্দেহে বুঝিতে পারিয়াছে, সে একেবারে পরিপূর্ণভাবে বুড়া ধাড়ি পাকা ঝানু মেয়ে হইয়া উঠিয়াছে, এ জগতে তার যে আর কিছুই জানিতে-বুঝিতে, অনুভব ও কল্পনা করিতে বাকি নাই, এতদিনে যে তার জীবনের আসল সমারোহ শুরু হইয়াছে—এটা তার ঘোষণামাত্র ! কাঁচা আমে প্রথম বৎ ধরার মতো—বর্ণচোরা আম ছাড়া, এ সংকেত কাদম্বিনীর ব্যক্তিগত মৌলিক সম্পত্তি নয়, একটা স্বাভাবিক ঘটনা। কাদম্বিনীর সর্বাঙ্গে ইহা অপেক্ষা ঢের বেশি স্থূল ও সূক্ষ্ম ঘোষণা অনেক আসিয়াছে। তবু, অ্যাসপিরিনের বড়ি দুটা গিলিয়া সৌম্য খানিকক্ষণ এমনভাবে শুধু কাদম্বিনীর মুখখানাই দেখিল যে, তার হাসিটা গেল মিলাইয়া। তখন সৌম্য বিশেষ মনোযোগ সহকারে দেখিতে লাগিল সম্পূর্ণ কাদম্বিনীকে।

কাদম্বিনী একটু ভয়ে ভয়ে বলিল, রাগ হল নাকি ? সত্যি খুব মাথা ধরেছে ?

সৌম্য বলিল, টনটন করছে মাথাটা।

কাদম্বিনী বিজ্ঞেব মতো নির্ভয়ে হুকুম দিল, আজ আর কোর্টে গিয়ে কাজ নেই তবে।

একটিমাত্র নিশ্বাস ফেলিবার অবসরটুকুর আগে ভয়ে এবং পরে নির্ভয়ে কাদম্বিনীকে কথা বলিতে শুনিয়া সৌম্যের আর কিছুই বুঝিতে বাকি রহিল না। একটু ভাবিয়া সে বলিল, না, কোর্টে যাব না।

কাদম্বিনী খুশি হইয়া বিজ্ঞতা বিসর্জন দিয়া আবার একটু হাসিল।

মক্কেল আসে না একটা, কেন যে রোজ কোর্টে যাও ! চূপচাপ শূয়ে থাকো খানিকক্ষণ, মাথা ধরা সেবে যাবে !

সৌম্য হাসিয়া বলিল, সকালবেলা শোব কীরে খুকি, এই তো উঠলাম সারারাত শূয়ে থেকে।

সকালবেলা মাথা ধবাতে পার, শূতে পারবে না ? ডাক্তারের মেয়ে আমি, আমার পরামর্শ শোনো, সমুদা, ওপরে গিয়ে শূয়ে থাকো। ওপরে কেউ নেই, চূপচাপ শূয়ে থাকতে পারবে। চলো তোমাকে বিছানা পেতে দিচ্ছি।

চূপচাপ শূইয়া থাকার সুযোগ পাওয়ার লোভে সৌম্য জীবনে কখনও এ বাড়িতে আসে নাই, নিজের বাড়িতে এ সুযোগ তার দুর্লভ নয়। এ বাড়ির চেয়ে তার নিজের বাড়িতেই বরং লোকের ভিড় কম। লোভ ও লাঁভের হিসাব বাদ দিলেও এ সময় কাদম্বিনীর সঙ্গে দোতলায় গেলে অনেকেই তা লক্ষ করিবে এবং কারণ জানিতে চাহিবে। ওষুধ খাওয়ার জন্য কাদম্বিনীর কাছে জল চাওয়ায় সকলের মধ্যে যে কৌতূহল জাগিয়াছিল মাথা ধরার কৈফিয়তে তা পরিতৃপ্ত হইয়াছে। একশো গজ দূরে নিজের বাড়িতে গিয়া শোয়ার বদলে কাদম্বিনীর সঙ্গে দোতলায় শূইতে যাওয়ার কৈফিয়ত হিসাবেও ওটা সকলে গ্রহণ করিবে বটে, কিন্তু কে জানে কারও মনে মদু একটু খুঁতখুঁতানি জাগিবে কিনা, কেউ ভাবিবে কিনা, এটা তার কাদম্বিনীকে দোতলায় লইয়া যাওয়ার ছলনামাত্র।

এক মুহূর্ত ভাবিয়া সৌম্য গলা নামাইয়া বলিল, তুই একবার ও ঘরে যা তো খুকি, ভাঁড়ারঘরে।

কাদম্বিনী আশ্চর্য হইয়া বলিল, কেন ?

যা বলছি, শোন। যা।

একটু ইতস্তত করিয়া কাদম্বিনী ভাঁড়ারঘরে চলিয়া গেল। সব বুঝিবার বয়স তার হইয়াছে বটে, সৌম্যের আজকের হেঁয়ালি বুঝিবার ক্ষমতা তার নাই। পেটমোটা কাচের জারের ঢাকনি খুলিয়া এক খাবলা কুলের আচার লইয়া সে খাইতে আরম্ভ করিল। বাবুমশায় তো হুকুম দিলেন এ ঘরে আসিবার, এখন সে করিবে কী ? হাসিবে ? না, কাঁদিবে ?

কাজের ফাঁকে বড়োবউ ইতিমধ্যে সৌম্যের কাছে আসিয়া দাঁড়াইয়াছে।

কাল বিকেলে আমারও যা মাথা ধরেছিল ভাই সমু ঠাকুরপো কী আব বলব। উনি তো ভেবেই অস্থির, ওডিকলোন-টলোন কত কী যে দিলেন ঠিক নেই। কবার হাঁচলাম রাতে, তাতে উনি আরও ভয় পেয়ে গেলেন। সবালে উঠেই দেখি ভীষণ সর্দি হয়েছে। ইউক্যালিপটাস শূক্রে শূক্রে একটু আরাম পাচ্ছি। শূকবে ?

ধরা মাথাটা নাড়িয়া সৌম্য বলিল, না আমার সর্দি হয়নি।

দাড়ি-কামানো সাঙ্গ করিয়া কাদম্বিনীর মেজোভাই ভূপেন কাছে আসিল। বলিল, তোর এত মাথা ধরে কেন বে ?

সৌম্য বলিল, কী জানি। কাল সারাবাত ঘুমোইনি। এমন বিশ্রী লাগছে শরীরটা ! ভাবছি কোর্টে না গিয়ে চুপচাপ শুয়ে থাকি।

তাই থাক ; খানিকক্ষণ ঘুমোলেই হয়তো কমে যাবে।

সৌম্য চিন্তিতমুখে বলিল, নিজের বুদ্ধিতে অ্যাসপিরিন খেলাম, কী বকম যেন কবছে শবীরটা। জ্বর আসছে কিনা বুঝতে পারছি না।

ভূপেনও চিন্তিত হইয়া বলিল, তবে এক কাজ কব, এখানেই শুয়ে থাক, বাবা ফিরলে বাবাকে দেখাস—তাড়াতাড়ি কামাতে গিয়ে গালটা কতখানি কেটেছি দেখেছিস ?

সৌম্য বলিল, টিনচাব আইডিন দে। ওপবে গিয়ে শুয়ে পড়ি, কী বলিস ? একটা বিছানা—

ভূপেন হাঁকিয়া বলিল, খুকি, ও খুকি, সমুকে একটা বিছানা ঠিক করে দিয়ে আয় তো ওপবে। কোথায় গেলি তুই, খুকি ?

ভাঁড়ারঘরে অভাবনীয় ভাবনায় বিব্রতা কাদম্বিনী হাতেব সবখানি আচাব মুখে গুঁজিয়া মুখের ভাবনার কুঞ্জনগুলি ঘুচাইয়া বাহিরে আসিল। কলতলায় হাত ধুইয়া সে দোতলায় গেল সৌম্যের সঙ্গে। ভূপেনের ছোটো ঘরে ভূপেনের বিছানা পাতিয়া দিতে দিতে জিজ্ঞাসা করিল, আমাকে ভাঁড়ারঘরে পাঠিয়েছিলে কেন বলো তো ?

সৌম্য বলিল, মুখে কী ভরেছিস ফেলে দে খুকি।

কাদম্বিনী বাহিরে গিয়া মুখ খালি করিয়া আসিল। সৌম্য শূইয়া পড়িয়াছে দেখিয়া অনুরোধ দিয়া বলিল, একটু সবুর সইল না, বিছানাটা ঝেড়ে দিতাম ?

সৌম্য বিছানার প্রান্তটা নির্দেশ করিয়া বলিল, বোস, খুকি, এইখানে বোস।

কাদম্বিনী বসিয়া বলিতে আরম্ভ করিল, বসবার কি সময় আছে নাকি আমাব ? সবাই ও দিকে খেতে বসেছে, কাজ নেই ? একশোবাব একটা কথা জিজ্ঞেস করছি তোমাকে, জবাব দিচ্ছ না কেন ? বলা নেই, কওয়া হঠাৎ আমাকে ভাঁড়ারঘবে পাঠিয়ে দিলে কেন ? মেজদাব কী গলা বাবা ! তোমাব জন্যে একটা বিছানা পেতে দিতে বলবে, তাও পাড়াশুদ্ধ লোককে শুনিয়ে বলা চাই ! আমি যেন কালা।

কাদম্বিনী ঠোট বাঁকাইয়া হাসিল। সৌম্য সন্দ্বিগ্ধভাবে বলিল, তোকে ভাঁড়ারঘরে কেন যেতে বলেছিলাম বুঝতে পারিসনি খুকি ? সত্যি কথা বলিস। যদি বুঝতে পেরে থাকিস, এখনই বাড়ি চলে যাব।

কাদম্বিনী দু চোখ বড়ো বড়ো করিয়া বলিল, কী বুঝতে পারিনি ? কী বলছ তুমি ? তোমাব আজ হয়েছে কী বলো তো ?

মাথা ধরেছে।

মৃদু একটি নিশ্বাস ফেলিয়া কাদম্বিনীর ডান হাতখানা নিজের কপালে রাখিয়া সৌম্য চোখ বুজিল। কাদম্বিনীর হাতের তালুতে এখনও আচারের গন্ধ লাগিয়া আছে। হাতে ছাড়া ছাড়া মৃদু

কম্পনের আবির্ভাব ঘটামাত্র সৌম্য তা টের পাইল। এবার হাতে টান পড়িবে অনুমান করিয়া আরও জোরে সে হাতের তালু চাপিয়া ধরিল কপালে। কিন্তু দেখা গেল, টানাটানি কাদম্বিনী পছন্দ করে না।

মাথা টিপে দেব ?

না।

আমি তবে নীচে যাই, মা ডাকছে।

সৌম্য তা জানে, চিরকাল মা-ই সকলকে ডাকিয়া থাকে। কাদম্বিনী উঠিয়া দাঁড়ানোয় তার আচারের গন্ধ-মাথা হাতটি সৌম্যের ছাড়িয়া দিতে হইল। চোখ মেলিয়া সে দেখিতে পাইল কাঁচা আমে প্রথম রং ধরার মতো মৃদু একটু রঙের আভাস কাদম্বিনীর মুখে দেখা দিয়াছে এবং জগতের সেরা অভিনেত্রীর মতো সে নিজেই যেন পরিণত হইয়া গিয়াছে নির্বাক বিস্ময় ও প্রশ্নে। তবে অভিনয় নয় বলিয়া এ রকম সে হইয়াছে এমনভাবে, যে দেখিলে মায়া হয়।

সৌম্য মৃদুস্বরে বলিল, মা কেন ডাকছেন শুনে আমাকে একটু আচার এনে দিবি খুকি !

কাদম্বিনী বলিল, জ্বর আসছে, আচার খেতে হবে না। সারারাত ঘুম হয়নি, ঘুমোও না একটু ! বলিয়া সে চলিয়া গেল নীচে। খানিক পরে একটা চায়ের কাপে খানিকটা আচার ও ছোটো একটা চামচ আনিয়া দিয়া হাসিয়া ফেলিল।

আচার খাবে শুনে মা যা বকছে সমুদা ! মেজদা বললে, একটু কুইনিমিশিয়ে দিতে, একটুখানি দিয়েছি। চার গ্রেনের বেশি নয়, সত্যি বলছি। টেরও পাবে না।

সৌম্য উঠিয়া বসিল। দু আঙুলে একটু আচার তুলিয়া মাখাইয়া দিল কাদম্বিনীর ঠোঁটে। তারপর কাপে অত আচার থাকিতে চাখিতে গেল তার ঠোঁটের হাসি-মাখানো আচারটুকু। হাসি অবশ্য কাদম্বিনীর মিলাইয়া গেল তৎক্ষণাৎ এবং একটি ভয়ানক কপোতীর সঙ্গে তার কোনো পার্থক্য রহিল না। কিন্তু কী করিবে সে ? সে তো ছেলেমানুষ আর সৌম্য তার কাছে চিরদিন দেবতার সমান। তা ছাড়া, তার জন্য বর খোঁজা হইতেছে, সৌম্য যদি তাকে বিবাহ করা ঠিক করিয়া থাকে, সে তো ভালোই। সুখের কথা। সৌম্যের সঙ্গে একা একা সিনেমায় যাইতে তখন আর কোনো বাধাই থাকিবে না। দিনরাত যত খুশি গল্প করিতে পারিবে সৌম্যের সঙ্গে। কাদম্বিনীর চোখে জল আসিয়া পড়িল।

সৌম্য বলিল, কাঁদছিস কেন ?

কাদম্বিনী চোখ মুছিয়া অশ্রুটস্বরে বলিল, কাঁদছি না তো।

সৌম্য খুশি হইয়া ভাবিল যে, এ যদি আর কেউ হইত, তবে নিশ্চয় এ রকম সরল জবাব দিত না, বলিত, চোখে আচার লাগিয়াছে। সত্যসত্যই চোখে আচার অথবা খেঁচা না লাগিলে সেই একুশ বছর বয়সের মেয়েটার চোখে জলই যে আসিত না, এ কথাটা সৌম্যের আর মনে পড়িল না।

তারপর যে দিনগুলি কাটিয়া যাইতে লাগিল, সৌম্যের কাছে না হোক, কাদম্বিনীর কাছে সেগুলি হইয়া রহিল অতুলনীয়। বিরহের দিনগুলি পর্যন্ত। অন্তত দেখা হইলেই সৌম্যের কাছে কাদম্বিনী দু-একবার তাই ঘোষণা করে এবং সৌম্য অবিশ্বাস করে না। এতকালের জানাশোনা মেয়েটার সম্বন্ধে সে একটা নতুন কথা জানিয়াছে। তার অভিজ্ঞতায় সরলতার হিসাবে কাদম্বিনীই আদর্শ বালিকা। কারণ, সরলতার সঙ্গে চিরদিন যে বোকামি সে মিশিয়া থাকিতে দেখিয়াছে, কাদম্বিনীর মধ্যে সে তা খুঁজিয়া পায় না। ধারালো বুদ্ধি তার নাই, চালাক মেয়ে সে নয়। সৌম্য তা জানে। কিন্তু অভিজ্ঞতার অভাব ছাড়া আর কোনো বোকামির পরিচয়ই সে দেয় না। তার যে কথা ও কাজে সৌম্যের হাসি পায়, সেগুলি সে বলে ও করে না-বলা ও না-করার প্রয়োজন সে জানে না বলিয়া, মস্তিষ্কের ওজন তার কম বলিয়া নয়। যা কিছু তাকে একবার বুঝাইয়া বলা যায় চোখের পলকে সে তা বুঝিতে পারে। এমন কী, পুরুষ ও নারীর প্রেম-সংক্রান্ত জটিল দার্শনিক তত্ত্বগুলি পর্যন্ত সে এত সহজে আয়ত্ত

করিয়া ফেলে এবং ও বিষয়ে এমন চমকপ্রদ মন্তব্য করে যে, সময় সময় সৌম্যের মনে হয় সে বুঝি খনাকে বরাহের গণনা শিখাইতে যাওয়ার মতো স্পর্ধা প্রকাশ করিতেছে।

মনে মনে হাসছিস, না খুকি ?

হাসছি ? কী বলছ তুমি পাগলের মতো ? তুমি যখন এ সব কথা বুঝিয়ে বলো, আমার তখন—তখন—, যাও বলব না তোমাকে।

সৌম্য ভাবে, বিশ্লেষণ করে। কাদম্বিনীর এই কথাগুলির মধ্যই সে তার বোকামির অভাব ও সরলতার প্রমাণ খুঁজিয়া পায়। মনে মনে হাসছিস, না খুকি ? এই আকস্মিক প্রশ্নের মানে বুঝিতে বোকা মেয়ের সময় লাগিত, কেন মনে মনে হাসিবে কয়েকবার এ কথা জিজ্ঞাসা করিত এবং শেষ পর্যন্ত হয়তো সৌম্যকেই বুঝাইয়া বলিতে হইত যে, কবিত্বপূর্ণ দার্শনিক তত্ত্বকথা শুনিতে শুনিতে এক ধরনের নীরস অমার্জিত হৃদয়হীন মানুষ মনে মনে হাসিয়া থাকে, পার্থিব লাভলোকসানের হিসাব ছাড়া জীবনে যারা আর কোনো হিসাব জানে না। প্রশ্ন শোনা মাত্র মনে বুঝিয়া কাদম্বিনী রাগিয়া তাকে বলিয়াছে পাগল, কিন্তু তার মুখে ভালোবাসার কথা শুনিতে শুনিতে মনে মনে হাসার বদলে তার মানসিক অবস্থাটা কী করম হয় বুঝাইয়া বলার মতো শব্দ খুঁজিয়া না পাইয়া, হয়তো যে দু-একটি শব্দ মনে আসিয়াছিল লজ্জায় সেগুলি উচ্চারণ করিতে না পারিয়া, মেয়েদের চিরন্তন অধিকার খাটাইয়া এ অক্ষমতা গোপন করিয়াছে। যাও বলব না তোমাকে ! কী মিষ্টি অভিমান, কী মধুর ছলনা ! সেই একশ বছর বয়সের মেয়েটা হইলে পুরা তিন মিনিট বক্তৃতা দিত, যার মানে বুঝিতে মন নয়, অভিধান খুঁজতে হইত সৌম্যকে। ভাবিতে ভাবিতে সৌম্যের হৃদয়ে আনন্দ ধরিতে চায় না। দু-একমাস নয়, কাদম্বিনীকে তার অনেকদিন ভালো লাগিবে, হয়তো একেবারে কাদম্বিনীর বিবাহ স্থির হইয়া যাওয়া পর্যন্ত। গায়ে হলুদের আগের দিন কাদম্বিনীর কাছে সে গ্রহণ করিবে শেষ বিদায়। পরদিন ট্রেনেব কামরায় বসিয়া সে যখন বাংলার বাহিরে মাঠ-বন-গাছপালার বিস্ময়কর বিপরীত গতি দেখিতে থাকিবে, কঁাদিতে কঁাদিতে কাদম্বিনী তখন গায়ে মাখিবে হলুদ। নিজে মাখিবে না, সকলে মাখাইয়া দিবে।

আমি এখন হঠাৎ মরে গেলে তুই খুব কঁাদবি, না খুকি ?

আমি এখন হঠাৎ মরে গেলে তুমি খুব কঁাদবে, না খোকা ?

এ ধরনের তামাশা সৌম্যের বিশেষ ভালো লাগে না। এই যা একটু দোষ আছে কাদম্বিনীর, স্নায়ুগুলি তার বড়ো সতেজ, মরার কথাতেও সে কাবু হয় না, মুখে হাত চাপা দিয়া সভয়ে বলে না, ও কথা বলতে নেই। একটা দুর্বোধ ক্ষীণ প্রতিবাদ জাগে সৌম্যের মধ্যে, কাদম্বিনী যেন বড়ো বেশি হাসিখুশি, বড়ো বেশি আনন্দময়ী। তার ছেলেমানুষি ও সরলতার তুলনায় ভাবপ্রবণতা যেন বড়ো কম। হাসিতামাশা, কথাকাটাকাটি, ভিত্তিহীন আনন্দের পিরামিড বানানো এ সব সে এত ভালোবাসে বলিবার নয়। কে জানে সময় আসিলে ও কীভাবে ভাঙিয়া পড়িবে, সামান্য কারণে যে এত আনন্দ পায়, অত বড়ো আঘাতে কী প্রচণ্ড হইবে তার বেদনা ? কালীঘাটের গলাকাটা ছাগশিশুর মতোই বোধ হয় ছটফট করিবে। চোখের সামনে বড়ো হওয়ার দাবিতে তার স্নেহ আর মমতা যার প্রাপ্য, তার মতো প্রেমপিপাসু পাষাণের হাত হইতে যাকে রক্ষা করা তার কর্তব্য, তার জীবনে এ বকম ভয়ংকর দুঃখের সম্ভাবনা বোধ হয় না আনাই তার উচিত ছিল। একটু অনুতাপ বোধ করে সৌম্য, কাছাকাছি কাদম্বিনীর বড়ো বড়ো উজ্জ্বল দুটি চোখের দিকে চাহিয়া সব মেয়ের মতো ওকেও সে নিবিড় জোরালো মমতার সঙ্গে ভালোবাসে। এইরকম স্বভাব সৌম্যের, এইরকম বাধ্য তার কোমলহৃদয়ের কোমলতার প্রেম। মনে আবেগ আসিবামাত্র হৃদয়ে প্রেমের বন্যা দেখা দেয়। আবেগটা বাদ দিয়া, প্রেমের বন্যায় ভাঁটা ফেলিয়া, ভালোবাসাটা চিরস্থায়ী করিবার সময় আসিলেই কাদম্বিনীকে আর যে তার ভালো লাগিবে না, এমন কী, কাঁচা আমের কচি শাঁসটুকুর মতো তিতোই হয়তো লাগিবে, সে কথা সৌম্যের আর মনে থাকে না। আদরে আদরে কাদম্বিনীর সে শ্বাসরুদ্ধ করিয়া দেয়।

তবু কাদম্বিনী মরে না, শ্বাসবুদ্ধ হওয়া সত্ত্বেও আনন্দে গদগদ হইয়া বাঁচিয়া থাকে, তার নিশ্চিত বিশ্বাসে সৌম্য পর্যন্ত অবাক হইয়া যায়। যত কাঁচা হোক, যত সরল হোক, যত বিশ্বাসী হোক, যত প্রবল প্রেম জাগিয়া থাক তার বৃকে, আত্মরক্ষার কয়েকটা মূলমন্ত্র বারো বছরের মেয়েও যে জানে। লোকনিন্দা আছে, আত্মীয়স্বজনের ভয় আছে, আগামীকালের হিসাব আছে, গোপনে গোপনে ভাঙাভাঙা ছেলেখেলাকে প্রকাশ্য ও একটানা লীলাখেলায় পরিণত করার স্বাভাবিক ইচ্ছা আছে, আরও আছে কত কিছু—কাদম্বিনী যেন এ সমস্তের ধার ধারে না। সৌম্য যা বলিবে যা করিবে, তাই সেই। ফলাফলের দায়িত্বটা যে অন্তত সৌম্যের থাকা উচিত, এ দাবিও যেন সে করিবে না। তিনতলার ছাদ হইতে নিজের ইচ্ছায় উঠানে ঝাঁপাইয়া পড়াব মতো তার আত্মসমর্পণে হিসাব নাই, বিবেচনা নাই, না মরিবার ইচ্ছা নাই—মরণের আতঙ্ক পর্যন্ত যেন নাই। তার ঝাঁপ দিবার কথা, সে ঝাঁপ দিয়াছে। সৌম্যকে সে ভালোবাসে, বাস, সেইখানে সব হিসাবনিকাশের ইতি, তারপর আর কিছু নাই।

আঠারো বছর সংসারে বাঁচিয়া থাকার পর এ জিনিসটা কোনো মেয়ের মধ্যে থাকা অবিশ্বাস্য, অবাস্তব, অসম্ভব। এদের যে নরকে নেওয়া চলে না তা নয়। কিন্তু প্রথমে যাত্রা করিতে হয় স্বর্গের দিকে, সত্যের আবরণে অনেক মিথ্যাকে সামনে ধরিতে হয়, অনেক ভুলাইয়া ভুল করাকে কবিতা তুলিতে হয় জীবনের সর্বশ্রেষ্ঠ কর্তব্যের মতো গ্রহণীয়, বাস্তবতার তুলি দিয়া সমস্ত ভবিষ্যৎকে কল্পনার রঙে রাঙাইয়া করিতে হয় তপস্যায় সিদ্ধিলাভের পরবর্তী জীবনের মতো লোভনীয়—আর প্রতিজ্ঞার পব প্রতিজ্ঞা করিয়া দিতে হয় আশ্বাস, জাগাইতে হয় বিশ্বাস। আটাশ বৎসর সংসারে বাঁচিয়া থাকার পর সৌম্য এ জ্ঞান সঞ্চয় করিয়াছে, এর মধ্যে ফাঁকি থাকা সম্ভব নয়। কিন্তু কাদম্বিনী যেন তার হাতে একখানা শিশুপাঠ্য বৃপকথার বই তুলিয়া দিয়াছে, খবরের কাগজ পড়া বিদ্যায় যা বোঝা যায় না, দিনের পর দিন কাদম্বিনী যেন তাকে বুঝাইয়া দিয়া চলিয়াছে যে, যে মন দিয়া সে সংগ্রহ করিয়াছে তার মনস্তত্ত্বের জ্ঞান, সে মনটাও সেই ঈশ্বরের সৃষ্টি, তার চেয়ে যিনি ঢের বেশি চালাক এবং বর্তমানের দেড়শো কোটিখানেক মন ছাড়াও অতীতের অগুপ্তি মন তিনিই সৃষ্টি করিয়াছিলেন, ভবিষ্যতের অগুপ্তি মনগুলিও তিনিই সৃষ্টি করিবেন ; মন দিয়া মন জানার কাজটা অত সহজ নয়।

সৌম্য বলে, আমি কী রকম খারাপ লোক, জানিস খুকি ?

কাদম্বিনী বলে, জানি।

কী করে জানলি ?

ও সব আমরা জানতে পারি। কচি খুকি তো আর নই আমি।

কাদম্বিনী হাসে। তার সহজ আত্মবিশ্বাস ও গর্ব দেখিয়া সত্যসত্যই মনে হয় কচি খুকি বোধ হয় সে নয়। জয় যেন সেই করিয়াছে সৌম্যকে এবং সৌম্য যে তার কাছে ধরা দিবে, এ বিষয়ে কোনোদিন তার এতটুকু সন্দেহও ছিল না। আশ্বস্ত হইয়া মনে মনে সৌম্য একটু হাসে। এই রকম মনে করে মেয়েরা, মনে করে কিছু না করিয়াও তারাই করিয়াছে সব, সৌম্যদের বৃকে ভালোবাসা জাগাইয়াছে তারা, সৌম্যদের আপন করিয়াছে তারা, সৌম্যদের মাথা খারাপ করিয়া দিয়াছে তারা। এই ভালোবাসার ব্যাপার যদি হয় কবিতা, তবে তারা এ কবিতার প্রেরণা। সৌম্যরা তো শুধু কাগজে-কলমে কবিতাটা লেখার কাজটুকু করে। সৌম্য ভাবে, বিশ্লেষণ করে। কাদম্বিনীর অবিশ্বাস্য নিশ্চিত্ত ভাব ও অন্ধ আত্মসমর্পণের একটা কারণ যেন সে আবিষ্কার করিতে পারে। তাকে জয় করিয়া নিজেকে কাদম্বিনী এত দামি মনে করিয়াছে, এমন আকাশস্পর্শী আত্মবিশ্বাস তার আসিয়াছে যে ভবিষ্যতের কথাটা মনে আনাও সে আর দরকারি মনে করে না। দু-চারদিন পরে যা ঘটিবেই, সে বিষয়ে জল্পনা-কল্পনা করিয়া কী হইবে ? তবে একটা খটকা লাগিয়া থাকে সৌম্যের মনে। এই জল্পনা-কল্পনা, দুজনের একত্র গ্রথিত জীবন সম্বন্ধে তার সঙ্গে গভীর বিস্তারিত আলোচনা

কাদম্বিনীকে সীমাহীন আনন্দ দেওয়ার কথা। এ আনন্দ সে কামনা করে না কেন ? কীসে তার এই অস্বাভাবিক বৈরাগ্য আসিয়াছে ?

কাদম্বিনী কাছে থাকিলে নয়, নিজের ঘরে একা থাকিবার সময় ভাবিতে ভাবিতে সৌম্যের বড়ো রাগ হয়। একটা তুচ্ছ সাধারণ মেয়ে, তার সম্বন্ধে এত ভাবনাবই বা কী দরকার ? ও তো আপ তার নিজের জীবনের সমস্যা নয় !

একদিন কাদম্বিনীর বড়দাদার বউ সৌম্যকে বলিল, আমার যেন কী হয়েছে ভাই সমু ঠাকুরপো, খালি অসুখে ভুগছি, আজ মাথা ধরছে, কাল জ্বরভাব হচ্ছে, একটা কিছু লেগেই আছে আমার। এমন ভয় পেয়ে গেছেন উনি !—ভেবে ভেবে শেষে ওঁর আবাব কিছু না হয়। শিগগির আমাকে নিয়ে হাওয়া বদলাতে যাবেন বলেছেন।

সৌম্য বলিল, ভালোই তো। কবে যাবেন ?

বড়োবউ বলিল, জামশেদপুর থেকে খুকিকে দেখতে আসবে, নয় তো কবে নিয়ে যেতেন।

খুকিকে দেখতে আসবে নাকি ?

ও মা, তুমি জান না ভাই সমু ঠাকুরপো ? কী আশ্চর্য্য ! ছেলে ওখানে কী যেন কাজ কবে, আড়াইশো টাকা মাইনে পায়, বাপ হচ্ছে সাবজজ, এখন পেনশন নিয়েছে। পক্ষাঘাত না কী হয়েছে বাপটার, উঠতে পাবে না বিছানা থেকে, ছেলে তাই নিজে বন্ধুর সঙ্গে খুকিকে দেখতে আসবে।

চিঠি এসেছে কবে ?

কাল।—ও মা তাইতো, তুমি তবে কী করে জানবে ? অসুখে ভুগে ভুগে আমার মাথাটা খারাপ হয়ে গেছে ভাই সমু ঠাকুরপো।

দিন তিনেক পরে ঘটাতিনেকের জন্য কাদম্বিনীকে কাছে পাওয়া গেল বটে, কাদম্বিনী কিন্তু আপনা হইতে সাবজজ-পুত্রের দেখিতে আসার কথাটা উল্লেখও কবিল না ! দু ঘণ্টা অপেক্ষা করিয়া সৌম্যই শেষে তাকে জিজ্ঞাসা করিল, জামশেদপুর থেকে তোকে দেখতে আসবে, না ?

কাদম্বিনী ফিক করিয়া হাসিয়া ফেলিল।

আসবে। বেশ মজা হবে, না ?

মজা হইবে ? কাদম্বিনীর নির্ভয় নিশ্চিন্ত কৌতুকোচ্ছ্বাস মুখখানা দেখিতে দেখিতে সৌম্যের মনে হইল সে যেন ম্যাজিক দেখিতেছে। কী হবে এবার ?—বলিয়া যাব কাঁদোকাঁদো হওয়া উচিত ছিল, এ ব্যাপারটা তার কাছে শুধু মজা !

যদি তোকে পছন্দ কবে ?

যদি কী ? আমাকে পছন্দ করবে না, ইস্ !

সৌম্য বিরক্ত হইয়া বলিল, তামাশা রাখ খুকি। তোকে দেখে যদি পছন্দ হয়, বিয়ের সব ঠিক হয়ে যায়, কী করবি তখন ?

কাদম্বিনী দু-হাতে খোঁপা ঠিক করিতে করিতে বলিল, আমি আবাব কী করব ?

সৌম্য তার গাষ্ঠীরকে আরও গাষ্ঠীর করিয়া বলিল, কিন্তু তুই তো জানিস খুকি বিয়ে-টিয়ে আমি করতে পারব না ? তোকে যেদিন দিয়ে করব, সেই দিন তোর জন্যে আমার সমস্ত ভালোবাসা যেমা হয়ে যাবে। তুই তো জানিস আমি তা সহিতে পারব না।

কাদম্বিনী সহজভাবেই বলিল, দুবার জানিস বললে। কী করে জানব আমি ? কোনোদিন বলেছ ?

বলিনি ?—সৌম্য যেন আশ্চর্য হইয়া গেল।

কবে বললে ? বিয়ে করলেই ভালোবাসা যেমা হয়ে যাবে কেন বলো তো শুনি।

সৌম্য বলিল। পাঁচ মিনিটে তার নিজের কাছেও প্রায় দুর্বোধ্য জটিল যুক্তিতর্ক বিশ্লেষণ দিয়া এমনভাবে কথাটা প্রমাণ করিয়া দিল যে, কাদম্বিনীর আর বলিবার কিছুই রহিল না। সে তাই শুধু একটু হাসিল, বলিল, নাও, তোমাকে আর চালাকি করতে হবে না। সবাইয়ের আসবার সময় হল, এবার আমি পালাই।

সৌম্য ব্যগ্রকণ্ঠে বলিল, চালাকি করিনি খুকি। সত্যি তোকে আমি বিয়ে করতে পারব না। আচ্ছা সে হবেখন।

বলিয়া কাদম্বিনী চলিয়া যায়, সৌম্য তাকে হাত ধরিয়া টানিয়া বসাইয়া দিল।

আমার কথা বুঝি তোর বিশ্বাস হচ্ছে না ?

কাদম্বিনী বলিল, হাত ধরে হাঁচকা টান দিলে মানুষের লাগে।—তোমার মতলব আমি বুঝেছি মশায়—একটু ঝগড়া করতে চাও তো ? আরেকদিন হবে, আজ সময় নেই।

সৌম্য বলিল, তুই বড়ো ছেলেমানুষ খুকি, বড়ো বোকা তুই। কিন্তু তোকে আমি বলে রাখছি পরে যে আমায় দোষ দিবি তা হবে না, বিয়ে আমি কাউকে করব না।

কাদম্বিনী সরলভাবে বলিল, এ কথা প্রথমে বলনি কেন ?

সৌম্য বলিল, বিয়ে করব তাও তো বলিনি। প্রথমে বলিনি বলেই তুই আমাকে জোর করে বিয়ে করাবি নাকি তোকে ?

রাগে সৌম্যের গা জুলিয়া যাইতেছিল। এখনও ভাবনা নাই কাদম্বিনীর, এখনও তার মুখ ভয়ে পাংশু হইয়া যাইতেছে না ! অন্য মেয়ে হইলে আতঙ্কে এতক্ষণ যে আধমরা হইয়া যাইত। কিন্তু তার শেষ কথাটা কাদম্বিনী যেভাবে গ্রহণ করিল, রাগের বদলে সৌম্য তাতে একেবারে বনিয়া গেল থ। কাদম্বিনীও যে রাগিতে জানে, আজ সে তা টের পাইল প্রথম।

মুখ লাল করিয়া কাদম্বিনী বলিল, দ্যাখো, শোনো বলি তোমাকে, মাঝে মাঝে তুমি এমন কথা বলো যা শুনলে মানুষের গা জ্বলে যায়। তোমাকে বিয়ে করবার জন্যে পায়ে ধরে সেধেছি তোমার ? ও, ভারী তো মানুষ তুমি ! তুমি বিয়ে না করলে আমার যেন বর জুটবে না !

কাদম্বিনী তো চলিয়া গেল গটগট করিয়া, বিছানায় চিত হইয়া শুইয়া সৌম্য অনেকক্ষণ বনিয়া রহিল থ। কাদম্বিনীর রাগটা আশ্চর্য নয়, কিন্তু এমন রাগ !—আজ পর্যন্ত যে একদিনও রাগ করে নাই ? তা ছাড়া, কান্নাবিহীন, অভিমানবিহীন এ কোন দেশি বাগ ছেলেমানুষ মেয়েটার ? কথাগুলি শেষ করিয়াও তো অস্তুত একটু তার কাঁদা উচিত ছিল। এ যেন সেই একুশ বছর বয়সের মেয়েটার রাগ। শুধু রাগ—নিছক অবিমিশ্র রাগ। একফোঁটা অনুরাগও যেন কারও জন্য তার নাই।

সাত দিন পরে জামশেদপুরের পাত্রটি সবন্ধু মেয়ে দেখিতে আসিল। পাত্রের মেয়ে পছন্দ হইলে তার মামা আসিয়া আর একবার দেখিয়া যাইবে। তারপর হইবে পাকা কথা। এই সাত দিনের মধ্যে সৌম্য শুধু একদিন কিছুক্ষণের জন্য অসমঞ্জসবাবুর বাড়ি গিয়াছিল। এক ফাঁকে কাদম্বিনীকে জিজ্ঞাসা করিয়াছিল, সেদিন হঠাৎ অত রেগে গেলি কেন রে খুকি ?

কাদম্বিনী হাসিয়া বলিয়াছিল, রাগ হয়েছিল তাই।

পরশু তোকে দেখতে আসবে, না ?

হ্যাঁ। খুব হিংসে হচ্ছে নাকি তোমার ? বাবাকে বলো না গিয়ে, এখুনি বাবা ওদের টেলিগ্রাম করে আসতে বারণ করে দেবে।

সৌম্য স্নানমুখে বলিয়াছিল, সত্যি হিংসে হচ্ছে। কিন্তু জানিস তো, বিয়ে আমি কোনোদিন করব না।

কাদম্বিনী বলিল, তা না করলে, আমাকে দোষ দিয়ে না কিন্তু শেষে। ওদের দেখতে আসা বন্ধ করার উপায় বলে দিলাম।

পাকা মেয়ের মতো কথা। সৌম্য সন্দ্বন্ধদৃষ্টিতে কাদম্বিনীর মুখ আর চোখ পরীক্ষা করিয়া দেখিয়াছিল। কিন্তু কাদম্বিনীর মতো সরল কাঁচা ঘরোয়া মেয়ের মুখে-চোখে সে কী পাকামি খুঁজিয়া পাইবে ?

তারপর সৌম্য বড়োবউকে একটা কথা জিজ্ঞাসা করিয়াছিল।

কদিন থেকে খুকির কী হয়েছে বলুন তো বউদি ? সব সময় মুখ ম্লান করে থাকে কেন ?

বড়োবউ বলিয়াছিল, কই আমি তো ওকে মুখ ম্লান করে থাকতে দেখিনি সমু ঠাকুরপো ? দেখব কী, নিজের অসুখ নিয়েই সব সময় যা বিব্রত হয়ে থাকি। বেশ হাসিখুশিই তো দেখি ভাই সমু ঠাকুরপো ?

তিনটি বন্ধুর সঙ্গে ছেলে মেয়ে দেখিতে আসিল বিকালের দিকে। গায়ে একটা হালকা সিল্কের পাঞ্জাবি চাপাইয়া প্রসাধনের সময় মুখে ক্রিম মাখার মতো একটা হালকা অবহেলার মতো ভাব মুখে ফুটাইয়া রাখিয়া সৌম্য তার আগেই এ বাড়িতে হাজির হইয়াছিল। একবার অন্দরে পাক দিয়া আসিয়া সে দক্ষিণের বড়ো ঘরখানায় আগন্তুকদের মধ্যে গিয়া বসিল। ছেলে আর তার বন্ধুদের সঙ্গে মন খুলিয়া আলাপও করিল। ছেলের নাম দিবোন্দু, দেখিতে ভালোই। তবে একটু রোগা আর লাজুক। পড়িতে পড়িতে মেরুদণ্ডটা একটু বাঁকাইয়া যে সব ছেলে পরীক্ষায় ফাস্ট হয় তাদের মতো !

কাদম্বিনী আসিয়া খোলা জানালার সামনে বসিল, আলোতে তাকে যাতে ভালো করিয়া দেখা যায়। তিন জোড়া অপরিচিত চোখ তাকে খুব ভালো করিয়াই দেখিল, কেবল যার দেখাটা ছিল সব চেয়ে দরকারি, সে এক সেকেন্ডের জন্য দেখিয়াই পুরা এক মিনিটকাল নামাইয়া রাখিতে লাগিল চোখ। অনেক প্রশ্ন জিজ্ঞাসা করা হইল কাদম্বিনীকে, ইংরাজ বাংলা লেখানো হইল তাকে দিয়া, তাব সূচিকর্ম দেখানো হইল, হারমনিয়াম বাজাইয়া সিকিখানা গান আর এসরাজে খানিকটা গজল সুর সে সকলকে শুনাইয়া দিল। লজ্জা, ভয় ও নশ্বতার যে মধুর মুখোশ পরিয়া কাদম্বিনী ধীরপদে ঘরে ঢুকিয়াছিল এত কাণ্ডের পরে আবার তেমনই ধীরপদে অন্দরে ফিরিয়া যাওয়ার সময়ও তার বিন্দুমাত্র পরিবর্তন ঘটে নাই দেখিয়া সৌম্যের মনে হইতে লাগিল, পানের বদলে সে বৃষ্টি শুধু থয়ের চিবাইতেছে। আগাগোড়া কাদম্বিনীকে সে অবাধ হইয়া লক্ষ করিয়াছে। চার মাস ধরিয়া সে যাকে ভালোবাসিয়াছে, তার সামনে কাদম্বিনীর মতো মেয়ে যে চার জন অপরিচিত যুবকের কাছে এমন নিখুঁতভাবে নিজেকে দেখাইতে পারে, এ অভিজ্ঞতা সৌম্যের ছিল না। এ কী অভিনয় ? হে ভগবান, এ কী অভিনয় তার কাদম্বিনীর ? কিংবা তার চার মাসের প্রেমটাই তাব কাছে কিছুই নয়, প্রতিদিনকার ডালভাত খাওয়া, সাজগোজ করার মতো তুচ্ছ ? তাই সে চাব মাস তার সঙ্গে ভালোবাসার খেলা না খেলিলেও যেমনভাবে নিজেকে দেখাইতে পারিত, আজও অবিকল তেমনইভাবে দেখাইয়া যাইতে পারিল ? এমন একটা রেখা সে কাদম্বিনীর মুখে দেখিতে পাইল না, এমন একটি ভঙ্গি তার চোখে পড়িল না, যার মধ্যে গত চাব মাসের একটি মিনিটকে সে খুঁজিয়া পায় !

কিছু বৃষ্টিতে পারে না সৌম্য। বাড়ি ফিরিয়া সে ছটফট করিতে থাকে। ওমিলনাইন-কেশতৈলের অতি ক্ষীণ একটি গন্ধ যেন সে অনুভব করিতে পারে। মাথা ঘুরিতে থাকে সৌম্যের, গা বমিবমি করে। এ কি সম্ভব ? কাদম্বিনীর প্রযুক্তির সঙ্গে এ কি খাপ খায় ? সেই একশ বছর বয়সের মেয়েটাও তো ছ মাস পরে হঠাৎ তাকে দেখিয়া একটু পাংশু হইয়া গিয়াছিল !

পরদিন সকালে সৌম্য কাদম্বিনীকে বলিয়া আসিল, আজ দুপুরে সেখানে একবার যেতে পারবি খুকি ?

খুব পারব ? কটার সময় ?

একটার সময় যাস।

প্রতিবেশীর বাড়ি যাওয়ার নাম করিয়া কাদম্বিনী বেলা একটার সময় আসিয়া দাঁড়াইল তাদের বাড়ির সামনের পথটার মোড়ে ট্যান্ডি স্ট্যান্ডটার কাছে। সৌম্য অপেক্ষা করিতেছিল। একটা ট্যান্ডি ভাড়া করিয়া দুজনে তাদের হোটেলের ঘরখানায় হাজির হইল অল্পক্ষণের মধ্যেই। সমস্ত পথ সৌম্য একটি কথাও বলে নাই। কিছুক্ষণ বকবক করিয়া কাদম্বিনীও শেষে চুপ করিয়া গিয়াছে।

ঘরে ঢুকিয়াই সৌম্য সটান বিছানায় শইয়া পড়িল। তার শারীরিক অবস্থার সম্বন্ধে কাদম্বিনীর প্রশ্নের জবাবে বলিল, তুই আমাকে ভালোবাসিস না খুকি।

কাদম্বিনী বলিল, তা তো তুমি বলবেই। আগের বার বাড়িতে বলে এসেছিলাম উষাদের বাড়ি যাচ্ছি, একটু পরেই মা ঝিকে পাঠিয়ে দিয়েছিল আমায় ডাকতে। সারা দুপুর বাইরে কাটিয়ে বাড়িতে কৈফিয়ত দেওয়ার মজা মেয়ে হলে বুঝতে।

তুই বুঝি ভাবিস বাড়ির লোকের রাগ, লোকলজ্জা এ সব গ্রাহ্য না করলেই ভালোবাসা প্রমাণ হয়ে যায় ?

আমি ভালোবাসার কিছু জানি না, হল ?

সৌম্য হতাশভাবে বলিল, আমার সঙ্গে ছাড়াছাড়ি হবে বলে তোর একটুও কষ্ট হচ্ছে না ? কাদম্বিনী সহজভাবে বলিল, আমি বলেছি ছাড়াছাড়ি হতে ?

কিন্তু তোর বিয়ে হয়ে গেলে—

আমি বলেছি বিয়ে হোক ?

তারপর দুজনেই চুপ করিয়া গেল। অল্পক্ষণের জন্য। হঠাৎ কাদম্বিনী কাঁদোকান্দো হইয়া বলিল, তুমি কিছু বোঝো না। আমি কী করব, আমার কী করাব আছে ? তোমার কথা শুনতে হয়, তুমি যা বল করি, বাড়ির লোকের কথা শুনতে হয়, তারা যা বলে কবি।

কান্না ! চাপিয়া-রাখা কান্না এতদিনে বাহির হইয়া আসিতেছে। কাদম্বিনীর আকস্মিক উত্তেজনায় সৌম্য উঠিয়া বসিল, কাদম্বিনীর হাত চাপিয়া ধরিয়া বলিল, কিন্তু লোকের কথা শুনে তো তোর সুখ-দুঃখ জাগে না খুকি ? তোর মনে কষ্ট হলে তো বাড়ির লোকের-স্বকুমে সেটা উপে যায় না !

কাঁদোকান্দো ভাবটা কাদম্বিনীর উপিয়া গেল। চোখ মিটমিট করিতে করিতে সে বলিল, কী বলছ কিছুই বুঝতে পারছি না। আমার কষ্ট হলে বাড়ির লোকে কী করবে ? তারপর হঠাৎ কাঁদোকান্দো হওয়ার মতো হঠাৎ হাসিয়া কাদম্বিনী বলিল, তোমার কী হয়েছে জানো ? মাথা ধরে ধরে মাথাটা খারাপ হয়ে গেছে।

এবার সৌম্য অনেকক্ষণ চুপচাপ চিত হইয়া শইয়া রহিল। কপালে কাদম্বিনীর হাতের স্পর্শ অনুভব করার পর ক্লাস্তস্বরে বলিল, তোর সঙ্গে আমার এই শেষ দেখা খুকি।

কেন ?

তোর বিয়ের সব ঠিকঠাক হচ্ছে, আর আমার সঙ্গে মেলামেশা করা উচিত হবে না। আজকেই আমাদের মধ্যে সব শেষ হয়ে যাক। কেমন ?

সৌম্য এতক্ষণ চোখ বুজিয়া ছিল। কথাটা বলিয়া কাদম্বিনীর মুখের ভাব দেখিবার জন্য সে চোখ মেলিল। অল্পক্ষণের জন্য তার মনে হইল কাদম্বিনীর মুখের চামড়াটা যেন টান হইয়া চকচক করিতেছে। কিন্তু একটু ভাবিয়া কাদম্বিনী যখন কথা বলিল তখন সে বুঝিতে পারিল এটা তার কল্পনা অথবা আলোর কারসাজি।

আমি কী বলব বলো ? আমি তো বলেছি তুমি যা বলবে তাই হবে। কিন্তু শেষ দিনটা তা হলে মুখ ভার করে থেক না, হেসে কথা বলো একটু।

সৌম্য উঠিয়া বসিল। জুতায় পা ঢুকাইয়া ফিতা লাগাইতে লাগাইতে বলিল, চল বাড়ি যাই।

উদ্ভাস্ত চিত্তের এলোমেলো চিন্তার মধ্য হইতে সৌম্য ক্রমে ক্রমে একটা প্রকাণ্ড তন্দুকথা আবিষ্কার করে। এ জগতে নিয়ম নাই, শৃঙ্খলা নাই, সমস্ত এখানে আবোল-তাবোল। সেই জন্যই একটু যাদের বুদ্ধি আছে তারা বলিয়া থাকে, ব্যতিক্রম নিয়মকে প্রমাণ করে। আসলে এ কথাটাও একপেশে সত্য। নিয়মটা নিয়ম, না ব্যতিক্রমটা নিয়ম, কে তা বলিতে পারে? দশবার নিয়ম আর একবার ব্যতিক্রমের দেখা পাইলে নিয়মটাকে মানুষ নিয়ম বলে, কিন্তু দশবার ব্যতিক্রম আর একবার নিয়মের দেখা পাইলে মানুষ তো ব্যতিক্রমটাকেই নিয়ম বলিত? এই ভীষণ জটিল তত্ত্বটা আবিষ্কার করার পর সৌম্য কিছুক্ষণ গভীর তৃপ্তি বোধ করে। প্রহারের পর চকচকে খেলনা পাইলে ছোটো ছেলে যেমন সজল চোখে আহ্লাদে গদগদ হয়, এই দৃশ্যচিন্তাটি আয়ত্ত করার পর সৌম্যের আহত মনে তেমনই সঞ্চারণ হয় আনন্দের। সেই একুশ বছরের মেয়েটা যদি চুলোয় গিয়া থাকে, কাদম্বিনীও চুলোয় থাক। কোর্টে গিয়া একটা পেটি কেসে মক্কেলের পক্ষ সমর্থন কবিয়া সে এমন বক্তৃতা জুড়িয়া দেয় যে, তিনবার সংক্ষেপে তাব বক্তৃতা শেষ কবিতে বলিয়া হাকিম তাব মক্কেলের সাত টাকা জরিমানা করিয়া দেন।

এদিকে একদিন জামশেদপুরবাসী দিব্যেন্দুর মামা আসিয়া কাদম্বিনীকে দেখিয়া পছন্দ করিয়া যান এবং দেখিতে দেখিতে কথাবার্তা পাকা হইয়া বিবাহের দিন স্থির হইয়া যায়। তখন একদিন সৌম্য কাদম্বিনীকে দেখিতে যায়। অপরাহ্ন বলিয়া বড়োবউ তাকে দেয় খাবার আব কাদম্বিনী কবিয়া দেয় চা।

বড়োবউ জিজ্ঞাসা করে, এতদিন আসোনি যে ভাই সমু ঠাকুবপো?

কাদম্বিনী মুচকি হাসিয়া তামাশা কবিয়া বলে, মাথা ধরার জন্যে বোধ হয়।

বড়োবউ বলে, একটু রোগাই যেন তোমাকে দেখাচ্ছে সত্যি। অসুখ-বিসুখের কথা তো শুনিনি? আমি তো এদিকে অসুখে ভুগে ভুগে মরতে বসেছি ভাই সমু ঠাকুবপো। উনি তো ভেবে ভেবে আধখানা হয়ে গেছেন। বলছেন, খুকির বিয়েটা হয়ে গেলেই হাওয়া বদলাতে নিয়ে যাবেন আমাকে।

কাদম্বিনী বলে, বোসো, পালিয়ে যেয়ো না। একটা নতুন আচার করেছি, তোমাকে চাখতে হবে। ওপরে বাবাকে খাবার দিয়ে এখনুনি আসছি।

এক হাতে খাবারের প্লেট অন্য হাতে জলের গ্লাস লইয়া লঘুপদে কাদম্বিনীকে সিঁড়ি বাঁহিয়া উপরে উঠিতে দেখিয়া সৌম্যের সাধ হয় তার খাবারের প্লেট, জলের গ্লাস, চায়ের কাপ আব দেফাল ভাঙিয়া খানকয়েক ইট মেয়েটাকে ছুঁড়িয়া মারে।

তবু সে বড়োবউকে জিজ্ঞাসা করে, আচ্ছা বউদি, খুকির নাকি বর পছন্দ হয়নি, লুকিয়ে লুকিয়ে খুব কাঁদে?

বড়োবউ বলে, কই না, কাঁদে না তো? আমি কখনও দেখিনি ভাই সমু ঠাকুবপো ওকে কাঁদতে। দেখব কী, যা ভোগাটাই ভুগছি অসুখে! কিন্তু বর খুকির পছন্দ হয়েছে, ও বাড়ির উবার কাছে নাকি বলেছে।

কাদম্বিনী নীচে নামিয়া সৌম্যকে খানিকটা আচার আনিয়া দেয়, নিজেও পবম তৃপ্তির সঙ্গে এক খাবলা আচার চাখিতে আরম্ভ করে। সোম্য হঠাৎ উঠিয়া দাঁড়ায়, বলে, তোব বাবার সঙ্গে একটা দরকারি কথা আছে খুকি। আগে বলে আসি, তারপর তোর আচার চাখব।

বাসরঘরে, মেয়েরা চলিয়া যাওয়ার পর ঘরে যখন সকলের হাসি-তামাশা গানের সুরের রেশটুকুও বোধ হয় মিলাইয়া যাওয়ার সময় পায় নাই, সৌম্যের বুকে মুখ গুঁজিয়া কাদস্বিনী তখন শুরু করে কান্না। শুকনো গ্রীষ্মের পর বর্ষার মতো প্রবল, অশান্ত, অফুরন্ত কান্না।

কাঁদিতে কাঁদিতে কোনো রকমে বলে, তুমি আমায় বিয়ে না করলে আমি বিষ খেয়ে মরে যেতাম।

কাঁদে সে ঘণ্টাখানেকের কম নয়। মুখে হাসি ফুটিতে লাগে আরও প্রায় আধঘণ্টা।

আমাকে তুমি এবার ঘেন্না করবে?

তাই ইচ্ছা ছিল, কিন্তু তোকে ঘেন্না করতে পারব মনে হয় না খুকি।

কাদস্বিনী বলে, এখনও আমাকে খুকি বলবে নাকি? আর দ্যাখো, তুই বোলো না আমাকে। বিচ্ছিরি শোনায়।

স্ত্রী হওয়ার পর স্ত্রীত্বের দাবি আরম্ভ করা সৌম্যও আর অন্যায় মনে করে না।

অবগুণ্ঠিত

বাড়ি থেকে বার হয়েই সামনে পড়ে এক সার গোরুর গাড়ি। গোরুর গাড়িকে পথ দেবার জন্য নবীনকে পথপ্রান্তে শ্যাওলা-ধরা ভাঙা বাড়ির দেয়াল ঘেঁষে দাঁড়াতে হয়। একটা মোটরকে পথ দেবার জন্য গোরুর গাড়িগুলিও যতদূর সম্ভব পথের ধারে সরে এসেছে।

বিরক্তি নবীনের জাগে না। অশুভপূর্বের শান্ত-মধুর মোহ মনকে তার আচ্ছন্ন করে রেখেছে, মন-ভরা তার ক্ষমা ও বিনয়, আত্মত্যাগের উদারতা। বেরিয়ে আসবার আগে বউ একবার ঘরে এসেছিল, যেমন রোজ আসে, জলের গ্লাস আর পান হাতে নিয়ে, জামার বোতাম লাগিয়ে দিতে আর কেবল দিনের আলো ও জাগ্রত পরিবারের চেতনা তার মধ্যে যে রূপান্তর এনে দেয়, তাই দিয়ে এই সংক্ষিপ্ত মিলনে নূতন একটা স্বাদ সঞ্চারণ করতে।

বউ নিজে যেচে আসে না, মা পাঠিয়ে দেন। অন্ধকার রাত্রের দীর্ঘ মিলনের পর দিনের বেলা টাকা রোজগার করতে বেরিয়ে যাবার আগে এই কয়েক মিনিটের মিলনটুকু ছেলের যে ভূরিভোজনের পর চাটনির মতো মধুর লাগবে, মার কি আর তা অজানা আছে ?

একটি পূর্বষকে দিয়ে রোজগার করিয়ে তিনিও তো এতবড়ো সংসার ফেঁদেছেন !

বউ ঘোমটায় প্রায় মুখ ঢেকেই ঘরে ঢোকে, চোখ হয়তো পেতে রাখে পদক্ষেপের দিকে, তবু যে কী করে চারদিকে তার নজর থাকে ! নবীনকে জল দেয়, পান দেয়, নিজেকে দেয়। মনে হয়, বুকটা যেন তার ধুকধুক করছে।

সকলের চোখের সামনে দিয়ে ঘরে আসতে এমন লজ্জা করে !

আস কেন ?

মা যে পান জল দিয়ে যেতে বলেন।

মা না বললে আসতে না ?

মাথা একটু নামিয়ে চোখের পাতার চকিত গতিতে স্বামীর চোখে চোখে তাকানোকে পলকের মধ্যে সীমাবদ্ধ করে বউ মৃদু একটু হাসে, পায়ের নখ দিয়ে খুঁড়তে আরম্ভ করে মেঝে। নবীনের বুঝতে কষ্ট হয় না, বউ সব সময়েই তার কাছে আসবার জন্য উন্মুখ, লজ্জা ভয় শুধু তার বাধা। হঠাৎ উঠে গিয়ে দক্ষিণের জানালাটা বউ বন্ধ করে দেয়। রোমাঙ্কিত কলেবরে প্রায় বুদ্ধশ্বাসে বলে, মা গো, ও বাড়ির ছাতে কে যেন দাঁড়িয়ে !

তাকিয়ে দেখছিল নাকি ?

সংকোচের পেষণে বউ যেন আকারেই ছোটো হয়ে গেছে, নিজেই যেন সে নিজের মধ্যে মিশে যেতে চায়। ও বাড়ির ছাতটিতে কোনোদিন কেউ ওঠে না, ছাতে আলসেও নেই, ছাতে উঠবার সিঁড়িও নেই। জানালা একটু ফাঁক করে নবীন দেখতে পায়, মিস্ত্রি ছাতের ফুটো মেরামত করছে।

ঘর থেকে বেরিয়ে দাদার ঘরের সামনে দিয়ে নবীনকে আসতে হয়। দাদার বয়েস অনেক, ছেলেমেয়ে অনেক, তামাক টানার ক্ষমতা অসীম, কম কেবল উপার্জন। তবু নবীনের বউদিও জল পান দিতে এ সময় একবার ঘরে আসেন। তবে জামার বোতাম লাগিয়ে দেন না।

নবীনের বউ সর্বদা শেমিজ পরে থাকে, কিন্তু বউদির সে প্রয়োজন অনেকদিন মিটে গেছে, তবু নবীন ঘরের দরজায় দাঁড়ালে তিনি কাপড়ের এখান ও ওখানটা টেনে দেহের অনাবৃত অংশের খানিক-খানিক আবৃত করে ফেলেন, আঁচল তুলে দেন মাথায়। তবে কোলের মেয়েটি যদি কোল অধিকার করে গুন্যপান করে, বক্ষের আবরণ তাঁর দরকার হয় না। সাতটি সন্তানের জননী তিনি,

দেহ তাঁর একস্থূপ পিণ্ডাকার মাংস, বসন টেনে দেহের খানিক খানিক আবৃত করা আর মাথায় আঁচল তোলার অভিব্যক্তি তাঁর যতটুকু মনোরম, স্তন্যদায়িনী জননীরূপে তিনি যে তার চেয়ে শতগুণ মাধুর্য বিকাশ করেন, সকলের মতো এইটুকু জানতে কী আর তার বাকি আছে ?

সংসারের তুচ্ছ প্রয়োজনের কথা বলতে দাদার ঘরের চৌকাঠে দাঁড়িয়ে বউদির অভিনব লজ্জাহীন লজ্জার মৃদুতা আর বাৎস্যলের কোমলতা নবীন অভ্যস্ত দৃষ্টিতে শূষে নেয়,—দুই-ই তার মনে জোগায় শাস্তি।

মহুরগতিতে সে অন্তঃপুরের বাকি অংশ অতিক্রম করে। রান্নাঘরে ভাগনি আর ছোটোবোন আপিসের ভাত জোগানোর ব্যস্ততায় কোমরে আঁচল বেঁধেছিল, এখনকার আলস্যেও সে বাঁধন আলগা হয়নি। রান্নাঘরেই উনুনের সামনে পিঁড়িতে বসে বোন যেন কী বই পড়তে আরম্ভ করে দিয়েছে, উনুনে চাপানো মোটা চাল সিদ্ধ হয়ে এলে মুখ তুলে তাকাবে। মুখে তার গভীর বিষাদের ছাপ। বয়েস হয়েছে অনেক কিন্তু বিয়ে হয়নি, কোনো বিষয়ে মনোযোগ দিলেই মনের দুঃখটা তার মুখে স্পষ্ট ফুটে ওঠে। কী কমনীয়ই মনে হয় এই বিষাদে তার মুখ,—মুখের কাস্তি যেন হৃদয়ের গভীরতায় রসালো হয়েছে। একদিন সে ছিল অবাধা দুরন্ত বালিকা, প্রথম কৈশোরে যাব নির্লজ্জ বেহায়াপনা সকলকে চমকে দিত, আজ সে যেন মাখনের মতো কোমলা, লতাব মতো আশ্রয়ভিখারিনি, পানীয়ের মতো স্নেহবিহ্বলা।

বাথাবোধ আর অভিমান ছাড়া আর কোনো অনুভূতি কী বোনের তার আছে ? কে জানে যাব হাতে বোনকে সে সঁপে দেবে, বাথাবোধকে আনন্দের বৃণ দেওয়া আর অভিমানকে আবেগোচ্ছ্বাসে পরিণত করার ক্ষমতা তার থাকবে কী না ? সকলে কী লজ্জাবতী লতাকে স্পর্শ করার কৌশল আব কূটনীতি জানে ?

ভাগনি একমনে বৃনে যায় তার কার্পেটের আসন। মুখে অবশ্য সে বলে বোনের জনাই কার্পেট বোনা, কিন্তু বিদেশ থেকে স্বামী ফিরে এলে এই আসনে তাকে বসতে দেবাব কল্পনায় বারবার ঘরগোনা তার ভুল হয়ে যায়।

নবীনের মুখে মৃদু একটু হাসি দেখা দেয়। বিদেশের সেই মানুষটি তার ভাগনির সঞ্চিত ঔৎসুক্যের দাম দিতে পারবে ! বিদেশে বসে নিজেই মধ্য সেও এই মূল্যই সঞ্চিত কবছে—ভাগনি তার ঠকবে না, প্রাপ্য তার কড়ায়-গন্ডায় শোধ হয়ে যাবে।

তার ভাগনিকে সুখী করে নিজে সুখী হবার লোভে, প্রিয়ার প্রীতির পুষ্পাঞ্জলিতে নিজেকে পূজা করার লোভে, বিদেশবাসী সেই মানুষটি নিজেকে কী ভাবেই না পরিবর্তিত করেছে ! গুঁটার, জ্ঞানী, শূদ্ধ সেই মানুষটি আজ হাসতে জানে, অজ্ঞান হতে জানে, রসের স্বাদ জানে।

শেষ গোরুর গাড়িটি এগিয়ে গেলে নবীন পথের ডাইনে আসবার সুযোগ পায়। মোটরগাড়িটি ধুলো উড়িয়ে উধাও হয়ে গেছে। ধীরে ধীরে নবীন এগিয়ে চলে। মাঝে মাঝে পা তার পড়ে টায়ারের দাগে। কিন্তু পথের ধুলোয় কোনো গাড়ির চাকাই এমন গভীর দাগ এঁকে যায় না, কেবল পদক্ষেপে যা অনুভব করা চলে।

পিছন থেকে খড়খড়ি-বন্ধ ছ্যাকরা ঘোড়ার গাড়িটি যখন নবীনের নাগাল পায়, মহুরপদে চললেও নবীন তখন গোরুর গাড়িগুলিকে অতিক্রম করে গেছে। ঘোড়ার গাড়িকে পথ দিতে তাকে পথের একেবারে ধারে সরে যেতে হয় না। খড়খড়ির অন্তরালে কয়েক জোড়া উৎসুক চোখের দিকে তাকাতে গিয়ে সে কেবল খায় এক হেঁচট। বোরখা-পরা রমণীটি নিজেই অস্ত্রে ধারে সরে গিয়ে তার সংঘম বাঁচায়। সংঘর্ষ বাঁচে, কিন্তু মনে মনে নবীন এমন লজ্জা বোধ করে, যেন বোরখা এবং বোরখার ভিতরের নারীর মর্খাদা সে পথের ধুলোতে লুটিয়ে দিয়েছে।

দূরে এক গির্জার চূড়ায় ঘড়িতে সময় আঁকা আছে। সেদিকে তাকিয়ে নবীন গতিবেগ একটু বাড়িয়ে দেয়। কিছুদূর চলে আপনা থেকে তার গতি আবার হয়ে আসে মহুর। ধুলো উড়িয়ে

আরেকটি মোটর পাশ দিয়ে চলে যায়, মোটরটি চালাচ্ছে এক বিদেশি নারী, তার পাশে এক বিদেশি পুরুষ, মুখে তার মোটা সিগার। পিছনের সিটটা খালি পড়ে আছে। একবার নবীনের মনে হয়, সে যদি ওই সিটে বসে একটু তাড়াতাড়ি তার পথটুকু অতিক্রম করত, জগতে কার তাতে কী ক্ষতি ছিল। তারপর নবীনের হাসি আসে। খালি আছে বলেই কি যে সিটে খানসামা বসে, সেই সিটে সে বসতে পাবে ! সে ভদ্রলোক নয় ?

একটু জোরে জোরে চলতে আরম্ভ করে নবীন অজ্ঞাতসারে আবার নিজের গতিবেগ কমিয়ে আনে। পিছন থেকে এসে তাকে অতিক্রম করে চলে যায় বাঁক-কাঁধে এক জেলে আর বুড়ি মাথায় এক জেলেনি। বুই-কাতলার বংশধর আর হাঁড়িভরা জলের ভারে বাঁক আর দেহ দুই বাঁকা হয়ে গেছে, তবু খালি বুড়ি মাথায় জেলেনির চলনের সঙ্গে তার চলনের এক অদ্ভুত সাদৃশ্য। নবীনের মনে হয়, জেলেনির প্রকট যৌবন প্রত্যেক পদক্ষেপে যেভাবে লীলায়িত হয়ে উঠেছে, তারই ছন্দে জেলে নৃত্য করছে, জেলেনির হাতের বুপোর চূড়ির ক্ষীণ ধ্বনির সঙ্গে সংগত করে চলেছে জেলের দুটি হাঁড়ির জলে ঢেউয়ের ছলাৎ ছলাৎ শব্দ।

পাশের এক চোরা-গলি থেকে বেরিয়ে আসেন মাঝবয়সি শীর্ণকায় এক ভদ্রলোক, মুখে রাত্রিজাগরণের ছাপ, জামাকাপড়ে সস্তা বিলাসিতা আর সস্তা এসেঙ্গ।

নবীনকে দেখে একটু লজ্জা পেয়ে বলেন, আপিস যাচ্ছ ? ঝি আসেনি, ঝিকে ডাকতে গিয়েছিলাম ভাই। নচ্ছার মাগি—

হয়তো ঝি-ই ভদ্রলোকের প্রিয়া। দেহে-মনে বসনে-ভূষণে দাসীকে তৃপ্তি দিয়ে জীবনের চরম তৃপ্তি লাভের উপযোগী করেই নিজেকে গড়ে তুলেছেন।

লোকটির অস্বস্তিকর পীড়াদায়ক সঙ্গ পরিহার করবার কোনো উপায় নবীন খুঁজে পায় না, বরং সঙ্গে সঙ্গে চলবার জন্য তাকে আস্তে আস্তে হাঁটতে হয়, লোকটির আবোল-তাবোল বকুনির অর্ধেক কানে না তুললেও মাঝে মাঝে সায় দিতে হয়। এর সঙ্গে গল্প করতে করতে পথ চলতে দেখলে তার সম্বন্ধেও লোক কিছু যদি ভেবে বসে ? ভয়ে ভয়ে নবীন চারদিকে তাকায। সমস্ত রাত্রি এক গৃহত্যাগিনীর সঙ্গে যাপন করে, স্ত্রীপুত্রের অসুখ-বিসুখ আর সাংসারিক অশান্তির যে গল্প লোকটি ফেঁদে বসেছেন দুই-একটি টাকা ধার চাওয়াই তার একমাত্র পরিণতি সন্দেহ নেই। মনে বাথা না দিয়ে প্রত্যাখ্যান করার একটা লাগসই কৈফিয়ত খুঁজে না পেয়ে নবীন উৎকণ্ঠিত হয়ে ওঠে।

একটা পয়সা হাতে নেই, থাকলে নিশ্চয় দিতাম।—বিড়বিড় করে সবিনয় ক্ষমা প্রার্থনাব ভঙ্গিতে নবীনও নিজের সাংসারিক দুঃখকষ্টের খাপছাড়া তালিকা দাখিল করে। মনটা বড়ো খাবাপ হয়ে যায়।

যেমন খারাপ হয়ে যায় বউয়ের কোনো আবদার রক্ষা করতে না পারলে।

নিজেকে লোপ করে বিশ্বের ভালোমন্দ সকল মানুষের মনে আঘাত লাগা নিবারণ করার দায়িত্ব যেন সে গ্রহণ করেছে।

লোকটি একটু ক্ষুণ্ণ হয়ে বলে, তোমার না মাইনে বেড়েছে এ মাস থেকে ?

নবীন মাথা নেড়ে বলে, কই আর বাড়ল ? বাড়াবে বাড়াবে করে বাড়ছে না।

মনটা নবীনের আরও খারাপ হে: যায়। সে জানে জোর করে চেপে ধরলে কবে তার মাইনে বেড়ে যেত, কিন্তু জোর করে চেপে ধরতে কেমন সংকোচ বোধ হয়। একটু ভয়ও করে।

মাইনে বাড়লে বউকে সেই শাড়িখানা কিনে দিতে পারত। বউ জোর করে চেপে ধরলে অবশ্য এখনও দিতে পারে, কিন্তু বউ তো আর সেভাবে কিছু চাইবে না। এই জনাই তো বউকে সে এত ভালোবাসে।

সিঁড়ি

একতলার উত্তরপ্রান্ত থেকে দোতলা আর তিনতলার মধ্যস্থতা অতিক্রম করে সিঁড়িটা তেতলার খোলা ছাদে গিয়ে পৌঁছেছে। এই সিঁড়ি বেয়ে খোলা ছাদে পৌঁছানোর জন্যে সাধারণ নিয়মে চৌষট্টিবার একটি পায়ের জোরে মাধ্যাকর্ষণের বিরোধিতা করতে হয়। তবে সাধারণ নিয়ম সকলের জন্যে নয়। এমন মানুষও জগতে আছে যারা সিঁড়ি দিয়ে ওপরে ওঠবার সময় দুটো তিনটে ধাপ একেবারে ডিঙিয়ে যায়। এরা মানুষ হয়েও ঠিক মানুষ নয়,—মহামানব। মহামানব এই জন্যে যে এ জগতে মহামানবী নেই, কারণ মেয়ে-ও কোনোদিন দুটো তিনটে ধাপ ডিঙিয়ে ওপরে ওঠে না। ক্ষমতাও নেই, বাধাও আছে।

চৌষট্টি ধাপের সিঁড়িটাকে ঢাকা দেবার ছাদটুকুর উপরে পাতলা দেয়াল আর টিনের চালের একটি চিলেকুঠি আছে এ বাড়িতে। পথ থেকে বাড়ির ভিটেয় ওঠবার জন্য আর একতলার বারান্দা থেকে উঠানে নামবার জন্য এ বাড়িতে ধাপের ব্যবস্থা মোটে একটি করে, কিন্তু চিলেকুঠিতে ওঠানামার জন্য ধাপ আছে দুটি, তাই এও একটা সিঁড়ি। দুটি একের সমষ্টি যখন দুই এবং ধাপের সমষ্টি মাত্রই সিঁড়ি, চিলেকুঠিটিকে সিঁড়ি থাকার গৌরব না দিয়ে উপায় নেই।

চৌষট্টি ধাপের সিঁড়িটাকে বাড়ির ছায়াই শীতল কবে রাখে, চিলেকুঠির সিঁড়ি কিন্তু চিলেকুঠির ছায়া পায় শেষবেলায়, গ্রীষ্মকালেও সূর্য যখন নিস্তেজ। মেঘলা দিন বাদ দিয়ে শীতের দুমাস পরেও দুপুরবেলা চিলেকুঠিটি হয়ে থাকে শীতাত্ত মানুষের স্বর্গ আর সিঁড়িটা হয়ে থাকে আগুন। শীত-গ্রীষ্ম নির্বিশেষে যে শীতাত্ত, তারও পায়ের পাতা পুড়িয়ে দেয়।

ডান পায়ের চেয়ে ইতির বাঁ পা-টি লম্বায় প্রায় এক ইঞ্চি ছোটো। হুয় পা-খানি প্রথম ধাপে নামিয়েই সে তুলে নেয়। ব্যাপারটা মানবকে ভালো করে বুঝিয়ে দেওয়ার জন্য দাঁতের ফাঁকে সাজোরে শব্দ করে, ইস !

মানব বলে, গরম বুঝি ?

ইতি বলে, আগুন হয়ে আছে।

ঘরে কুঁজোয় জল ছিল, একতলা থেকে মানবের নিজের বয়ে আনা জল। কুঁজো কাত কবে মানব সিঁড়িতে জল ঢেলে দেয়। যতক্ষণ সে জল ঢালতে থাকে ইতি কথা বলে না, সবটুকু জল মানব ঢেলে দেয় কিনা দেখবার জন্যে চূপ করে থাকে। কুঁজো খালি হয়ে গেলে মানবের হাত চেপে ধরে বলে, সব জল ঢেলে দিলে ? একটু খেতাম আমি, তেপ্টা পেয়েছে।

এতক্ষণ খাওনি কেন ?

এতক্ষণ কি মনে ছিল ? জল দেখে খেয়াল হল।

মানব একটু হাসে। চম্পিশ বছরের পুরানো মুখখানায় সাতদিনের দাড়ি-গোঁফ জমেছে, বাঁদিকের গালটি কবে যেন চিরে সেলাই করে দেওয়া হয়েছিল। ঘাম মুছে মাজা বাসনের মতো কপাল চিকচিক করছে। তামাকের ধোঁয়ায় ঠোট দুটি কালো। দাঁতে আর মুখে বেহিসেবি পান খাওয়ার ইতিচিহ্ন। শান্ত নির্মল হাসিটুকু তাই আরও অপূর্ব মনে হয়,—ইতির মুখও সলজ্জ হাসিতে ভরে যায়, ব্রণের ছোটো ছোটো গর্ভভরা দুটি গালেই টোল পড়ে সৃষ্টি হয় দুটি বড়ো গহুরের।

মানব বলে, চলো নীচে যাই। তুমি জল খাবে আমি কুঁজোটা ভরে নিয়ে আসব।

ইতি বলে, তোমার তেষ্ঠা পায়নি ?

মানব বলে, পাবে পাবে, ভাবছ কেন ?

ধাপ দুটি ভাসিয়ে কুঁজোর জল ছাদে তিনটি ধারায় ভাগ হয়ে গিয়েছিল, নালির কাছাকাছি একসঙ্গে মিলে এতক্ষণে নালি দিয়ে নীচে বারে পড়তে আরম্ভ করেছে। সমস্ত ছাদে শুকনো শ্যাওলা, আর কয়েকটি দুপুবের রোদ পেলেই আলগা হয়ে উঠে আসবে আর সন্ধ্যার পর মানবের পায়চারিতে গুঁড়ো হয়ে যাবে। কুঁজো হাতে এক ধাপ নেমেই বোধ হয় আগামী সন্ধ্যায় নিজেব পায়চারি করার দৃশ্যটা কল্পনায় ভেসে ওঠে মানবের, মুখ ফিরিয়ে সে জিজ্ঞাসা করে, সন্ধ্যার সময় আসবে একবার ?

না এলে রাগ করবে ?

রাগ ? আর কী তোমার ওপর রাগ করতে পারি ? এবার থেকে অভিমান কবব।

তা হলে আসব না।

মানব খুশি হয়ে বলে, সেই ভালো। আজ একা একা তারা গুনে অভিমান করব, কাল তুমি এসে আমার অভিমান ভাঙাবে। আমাব এমন ছেলেমানুষি করতে ইচ্ছে করছে ইতি ! কী রকম যে লাগছে আমার কী বলব !

আমারও।

দৃষ্টির একটু গভীরতা এসেছে বইকী মানবের, মনটা তো অন্তত শান্ত হয়েছে। দুজনেই যখন ছাদে নেমেছে, সে হঠাৎ ব্যাকুলভাবে জিজ্ঞাসা করল, তোমার কষ্ট হচ্ছে না তো ইতি ?

না গো, না। কীসের কষ্ট ?

সন্ধ্যার পর না এসে ইতি তাকে অভিমান করবার সুযোগ দেবে, পরামর্শ হয়েছে এই। এখনই যেন মানবের অভিমান হয়, মুখখানা গভীর করে সে বলে, তোমার চেয়ে আমি অনেক বড়ো কিনা, তাই বলছি।

আমিই বা কী এমন আকাশের পরি !

অভিমান গাঢ় হয়, মানবের চোখ পর্যন্ত যেন ছলছল করে।

আকাশের পরি হলে তুমি আমার দিকে তাকিয়েও দেখতে না তো ?

কী ছেলেমানুষ তুমি !

আকাশে রোদ, ছাদ গরম। আবার মানবের মুখ হাসিতে ভরে যায়, ইতির কাঁধে মুখ রেখে কথা বলতে গিয়ে কিছু না বলাই সে ভালো মনে করে। কথা বলার চেয়ে কঠিন হাসি হেসে ইতিকে তাই হাসির জবাব দিতে হয়। এ কী আশ্চর্য যে নীচে নামবার কথা ভুলে যাওয়ার মতো ভঙ্গিতে দুজনে কয়েক মুহূর্তের জন্যও দাঁড়িয়ে থাকতে পারে ? পায়ের তলার ছাদটুকু ছাড়া আর সব যেন অনাবশ্যক হয়ে গেছে। অনেক উঁচুতে এই ছাদ,—দামি একটা হাউই পৃথিবী ছেড়ে যত উঁচুতে উঠতে পারে হয়তো তত উঁচুতে নয়, কিন্তু কে আর সে আপেক্ষিক তত্ত্ব প্রমাণ করতে বসবে দামি হাউই ছেড়ে ? আশেপাশের বাড়িগুলি তো এত উঁচু নয়, এ বাড়ির মতো ইট-বের-করা নয় বলে কেবল দেখতে সুন্দর। কিন্তু সেটুকুও এ বাড়ির ছাদে যারা দাঁড়িয়ে থাকে তাদেরই ভালো লাগে। চোখ মেললেই সমগ্রভাবে চোখে পড়ে। তা ছাড়া পাওয়া যায় আচ্ছন্ন, অভিভূত হওয়ার একটা অতিরিক্ত ক্ষমতা।

ইস !

এবার মানবের চমক লাগে।

গরম বুঝি ?

আগুন হয়ে আছে।

মানব আপশোশ করে বলে, তোমাকে আজ খালি কষ্ট দিচ্ছি।
দিচ্ছই তো। খালি খালি কষ্ট দেওয়ার কথা বলছ।

চৌষট্টি ধাপের সিঁড়ির ছায়াতে নেমে যাওয়া মাত্র দুজনে যেন আশ্চর্য হয়ে পরস্পরের মুখের দিকে তাকায়। মানব বলে, সিঁড়িটা তো বেশ ঠান্ডা।

ইতি সান্ত্বনা দিয়ে বলে, গরম থেকে এলে কিনা। এতক্ষণ কিছু বুঝতেই পারিনি তোমার ঘরটা কী গরম।

ধীরে ধীরে ইতি নামতে থাকে, প্রতি মুহূর্তে এলিয়ে পড়তে চাওয়ার মতো অলস অনিচ্ছুক পদে। সিঁড়ির মুখের কাছে তাপ ও আলো মেশার ফলে ছায়া একটু কম শীতল, কম ম্লান। প্রত্যেক ধাপ নামার সঙ্গে যেন বুঝতে পারা যায় ছায়া গাঢ় হচ্ছে, শীতলতা বাড়ছে। কিন্তু এই গরমে কোনো ছায়াই এমন শীতল হতে পারে না যে একটু আরাম দেওয়ার বেশি কিছু দিতে পারবে, ইতি কিন্তু একবার শিউরে ওঠে। জ্বরের রোগীর গায়ে কেউ যেন হঠাৎ বরফের ছেঁকা দিয়েছে।

তেতলার বারান্দায় বছরখানেকের ছেলে কোলে একটি মেয়ে দাঁড়িয়ে ছিল, ছেলেটি চুষছিল চুম্বিকাঠি আর মেয়েটি চুষছিল ছেলেটিব গোটাটিনেক আঙুল। সিঁড়ির মাঝামাঝি বাঁকেব ধাপটি একটু প্রশস্ত, সেখানে দাঁড়িয়ে ইতি শিহরনটুকু সামলায়, তারপর ফিরে যাওয়ার উপক্রম করে, কিন্তু উপক্রম করেই ক্ষান্ত হয়। ছুটে পালানোর এই আকস্মিক প্রেরণার জন্যই বোধ হয় মুখখানা একটু অপ্রসন্ন ও ক্লিষ্ট হয়ে ওঠে, ততক্ষণে মানবও এদিকে ভদ্রতা করে ফেলেছে।

মায়ে-পোয়ে কী হচ্ছে ?

মেয়েটি মাথার কাপড় তুলে দেয়, মুখ থেকে ছেলের আঙুল খসে পড়ে। অনাবশ্যক নীরবতাব সঙ্গে খানিকক্ষণ ইতির দিকে চেয়ে থেকে বলে, এমনি দাঁড়িয়ে আছি।

নেবেন আজ কখন আপিস চলে গেল, জানতেও পারিনি।

উনি ভোরবেলা বেরিয়ে গেছেন, আমার বোনের বাড়ি হয়ে আপিস যাবেন। আজ ধীরে সুস্থে রান্নাবান্না করেছি, একেবারে-রাঁধবই না ভেবেছিলাম, হঠাৎ আমার দেওব এসে পড়ল কিনা, তাই রঁধেছি। রঁধে বেড়ে না খাওয়ালে নিন্দে করত তো ? গিয়ে বলত, ভাইকে তো পর কবেইছি, বাড়িতে এলে একবেলা খেতেও বলি না,—এইমাত্র চলে গেল। কেন এসেছিল জানেন ? টাকা চাইতে ! এদিকে আমার নিন্দে ছাড়া মুখে কথা নেই, দাদাকে বাড়ি না পেয়ে আমার কাছে দিবি দশটা টাকা চেয়ে বসল। আমি বললাম, আমি টাকা কোথায় পাব, দাদার কাছ থেকে নেবেন।—তুই ছাতে কী করছিলি ইতি ?

ইতি বলে, বাড়িভাড়া দিতে গিয়েছিলাম। মা বললে, ভাড়ার টাকাটা দিয়ে আয় তো ইতি, সেই জন্য।

ছেলের ভার ডান হাত হতে বাঁ হাতে গ্রহণ করে আবার মেয়েটি অনাবশ্যক নীরবতার সঙ্গে ইতির দিকে খানিকক্ষণ চেয়ে থাকে, তারপর হঠাৎ একটা ভুলে-যাওয়া কথা মনে পড়বার ভঙ্গিতে বলে, ও, হ্যাঁ—আমাদের ভাড়ার টাকাটাও তো দেওয়া হয়নি। কী করেই বা দেব, কাল তো মোটে মাইনে পেলেন। আজ দিতে বলে গেছেন। একটু দাঁড়ান, টাকাটা এনে দিই, কেমন ? খোকাকে একটু ধরবি ভাই ইতি ?

ইতির কোলে ছেলে দিয়ে আঁচলে বাঁধা চাবির গোছায় বারকয়েক ঝনাৎ করে শব্দ তুলে ঘরের ভিতরে মেয়েটি বাক্সো খোলে। গোটা দুই বাক্সো মোটে তার সম্পত্তি, কিন্তু চাবির গোছায় চাবি যেন আঁটে না, আঁচল ছিঁড়ে পড়তে চায়। বাক্সো খোলা আর বন্ধ করতেও কত যে অনাবশ্যক শব্দের সে সৃষ্টি করে বলবার নয়।

মানব নিচু গলায় ইতিকে জিজ্ঞাসা করে, তোমাদের ভাড়া দিতে এসেছিলে নাকি ?

ইতি বলে, না। ওর কাছে একটা কৈফিয়ত দিতে হবে তো ?

ইতিকে খোকা অনেকদিন থেকে চেনে, প্রায় আজন্ম। কিন্তু ইতি কোনোদিন তার হাতের আঙুল মুখে পুরে চোখে না বলেই বোধ হয় ইতির কোলে থাকতে তার ভালো লাগে না। চুম্বিকাটিটা প্রথমে নীচে পড়ে যায়, এদিক ওদিক চেয়ে খোকা মুখ বাঁকায়, তারপর মানব তার গালে একটা টোকা দেওয়া মাত্র সে কাঁদতে আবম্ব করে।

বাক্সে চাবি দিতে দিতে মেয়েটি আনন্দে গদগদ হয়ে বলে, আসছি রে আসছি, দুটু কোথাকাপ। এক মিনিট আমায় ছেড়ে থাকতে পারবি না, আচ্ছা ছেলে হয়েছিস তো তুই ?

ভাড়ার টাকা, স্বামীর লিখে-রাখা রসিদ আর এক কলম কালি নিয়ে খোকার মা বাবান্দায় আসে, মানবকে টাকা গুনে দিয়ে রসিদে তার সই নেয়, তারপর ছেলেকে কোলে করে বলে, এত টাকা ভাড়া তো পান, কী করেন টাকা দিয়ে ? সমস্ত বাড়িটা ভাড়া দিয়ে এই গরমে একা একা চিলেঘরে কী কবে থাকেন আপনি ! আমি হলে তো পারতাম না।

মানব ভাড়ার টাকা কোমবে গুঁজে বলে, না পেরে উপায় কী, খোকার বাবার মতো আমি তো চাকরি করি না।

খোকাব মা চোক বড়ো বড়ো করে বলে, আপনার আবার চাকরি ! একমাসে আপনি যা সুদ পান, ওর মাইনের তা ক-গুণ কে জানে ! একটু শূইগে খোকাকে নিয়ে, ঘুমিয়ে পড়ে তো তোকো ডাক-ইতি। পাখিটার ঠোট আর পা দুটো ভালো হচ্ছে না, একটু দেখিয়ে দিস। কটা করে ঘর বুনতে বলেছিলি ভুলে গেছি ভাই, যা দুষ্টমি করে খোকা !

মানব বলে, আবেকজন দুষ্টমি করে না ?

করে না ?—ফিক কবে হেসে ফেলে পাক দিয়ে ঘরেই খোকার মা ঘরের ভিতরে চলে যায়। কুঁজোটা তুলে নিয়ে মানব সিঁড়ির এক ধাপ নেমে গিয়ে দাঁড়ায়। মুখ ফিরিয়ে বলে, এসো, দাঁড়িয়ে রইলে কেন ?

ইতি নীরবে আসে। সমতল বাবান্দায় ছোটো বড়ো পা নিয়ে চলাব ভঙ্গিটি তাব বেশ। অন্য সব মেয়ে যেন শূধু চলে। ইতি একটা অজানা ছন্দে দুলে দুলে চলে। কোলে ছেলে নেই ইতির, আঁচলে নেই চাবির ভাব, তবু বৃকে পিঠে কাঁখে ছেলে যেন আছে তাব অনেকগুলি, আঁচলে বাঁধা আছে সে যত ভাব বহিতে পাবে না তাব চেয়ে বেশি ভাবী চাবির গোছ।

সিঁড়ি বেয়ে নামতে নামতে মানব বলে, তোমাদের পাঁচ মাসের ভাড়া বাকি আছে।

হ্যাঁ।

মানব বসিকতা করে বলে, অন্য কোনো ভাড়াটে হলে কবে তুলে দিতাম।

হ্যাঁ।

রাগ হল নাকি, ভাড়াব কথা বললাম বলে ?

না না, রাগ কীসের ?

সিঁড়ি বেয়ে তেতলায় নামার শিথিল এলায়িত ভাঁপা এখন দোতলায় নামার সময় স্থলিত পদে নামার ভঙ্গিতে দাঁড়িয়ে গেছে। নামাও যেন কম পরিশ্রমেব কাজ নয়।

মানব মুখ ভার করে বলে, অত হিসেব করে কথা বলা আমার আসে না। যা মনে আসে বলে ফেলি। কী এমন বললাম যে তোমাব মুখ ভার হয়ে গেল ?

ইতি একটু হাসে। হাসলে মুখের ভার হালকা হয়।

মুখ আবার ভার হল কোথায় ? কী ছেলেমানুষ তুমি ! তোমার কথায় কি আর মুখ ভার করেছে, মুখ ভার করেছে তেতলার ওই লক্ষ্মীছাড়ির কথায়। খোকার বাবা তো এদিকে মাইনে পায় তেষটি টাকা, অহংকারে যেন ফেটে পড়ছে !

সুতরাং মানবও হাশে। ইতির কথায় স্ত্রী-চরিত্রের একটা স্থূল দিক ফুটে উঠেছে আর নিজের সূক্ষ্ম বুদ্ধি দিয়ে সেটা ধরতে পেরেছে বলে গর্ব আর আমোদ অনুভব করে। ইতিকে নাড়া দিয়ে স্ত্রী-চরিত্রের আরও দুটো দিক আবিষ্কারের আশায় বলে, কেন, নরেনের বউ বেশ লোক।

বেশ না ছাই। সুখে আছে তাই, আমার মতো পোড়াকপাল তো নয়।

তোমার পোড়াকপাল নাকি ?

দুজনেই থমকে দাঁড়ায়। ইতি পিছনে হেলে যায় সাপের ফণা ধরার মতো, বলে, কী বললে ? মানব গস্তীর হয়ে বলে, তোমার পোড়াকপাল বলছ, আমার জন্য তো ?

সাপের ফোঁস করার মতোই ইতি সজোরে নিশ্বাস ছাড়ে, কিন্তু ছোবল মারার বদলে বয়স্কা নারীর চিরস্তন ক্ষমা করা আর প্রশয় দেওয়ার ভঙ্গিতে বলে, তোমার সঙ্গে আর পারলাম না। মা বাবা ভাইবোনেদের কথা ভেবে ও কথা বলেছি, কী কষ্টে আছে সবাই বলো তো ? নইলে, আমি তো আজ রাজরানি। অবিশি, দেখতে শুনতে রাজরানি নই, তোমার জন্যে রাজরানি।

তেতলায় মানুষ আছে, দোতলায় মানুষ আছে, সিঁড়িতে আর কেউ নেই—তবু ইতি জোর করে গলা একেবারে খাদে নামিয়ে দেয়। বলে, তুমি আমার রাজা।

দুজনে দোতলায় নামামাত্র উপরের যে ঘরটিতে খোকাকে নিয়ে খোকার মা শুতে গেছে ঠিক তার নীচের ঘর থেকে বার হয়ে আসে মাঝবয়সি একটি মহিলা। মহিলাটি এত মোটা যে পদক্ষেপে মেঝে না কাঁপলেও দুমদাম শব্দ হয়। তবে এখন পা ফেলার শব্দটা তার একটু জোরালো, হয়তো একটু বেশি জোরেই সে এখন পা ফেলেছে।

কোথায় ছিলি ইতি ?

তেতলায় ছিলাম, খোকার মার কাছে।

ছাই ছিলি, তিনবার ওপরে নীচে তোকে খুঁজে এসেছি।

তখন হয়তো চিলে ঘুরে গেছলাম। মা বললে, ভাড়ার টাকাটা দিয়ে আয় তো ইতি, সেই জন্য। এতক্ষণ তো খোকার মার সঙ্গে গল্প করছিলাম, জিগ্যেস করে আয় খোকার মাকে। খোকার মার সঙ্গে গল্প করছিলাম না মানববাবু ?

মানব বলে, করছিলে বইকী।

ইতি আবার জিজ্ঞাসা করে, আপনি বললেন না কুঁজোয় জল ফুরিয়ে গেছে ? আমি বললাম না, চলুন নীচে গিয়ে কুঁজোতে জল ভরে দিচ্ছি ?

মানব মাথা নেড়ে সায় দেয়।

মোটা মেয়েটির রং খুব ফরসা ! এতক্ষণ মুখখানা তার লাল হয়ে ছিল, এবার ধীরে ধীরে লালচে ভাবটা কমে যেতে আরম্ভ করে। খানিকক্ষণ চুপচাপ দাঁড়িয়ে থেকে আরও জোরে দুমদাম পা ফেলে সে ঘরে গিয়ে ঢোকে। দরজা বন্ধ করে দড়াম করে খিল তুলে দেয়।

পরক্ষণে খিল খুলে আবার বের হয়ে আসে।

তুই মর ইতি, মর তুই, গোলায় যা। পা না তোর খোঁড়া ? খোঁড়া পায়ে তুই না সিঁড়ি ভাঙতে পারিস না ? সিঁড়ি ভাঙতে পারিস না তো, যমের বাড়ি যাস না কেন তুই ?

মানব বলে, সুধা, আজ হাসপাতালে যাওনি ?

সুধা বলে, দেখতে পাচ্ছ না, যাইনি ?

মানব আবার বলে, আজ ডিউটি নেই বুঝি ?

সুধা হঠাৎ কাঁদোকাঁদো হয়ে বলে, ডিউটি থাক বা না থাক, তোমার কী ?

মানব শাস্ত্রভাবে বলে, না, এমনি বলছি। ভাড়ার টাকা দেবে নাকি আজ কিছু ?
সুধা স্তব্ধ হয়ে যায়। চোখের চারদিকের অতিরিক্ত মাংস ফেলে ছোটো ছোটো চোখ দুটিকে
বড়ো করবার চেষ্টা করে।

ভাড়া চাইছ ? ভাড়া !

মানব মৃদু একটু হেসে বলে, তুমিই তো বলেছিলে আজ কিছু দেবে।

এখনও মাইনে পাইনি।

বেশ মাইনে পেলে দিয়ো। নগেনাকে ফিরে আসবার জন্যে খুব বিজ্ঞাপন দিচ্ছ, না সুধা ?

সুধা মুখ সাদা করে বলে, কে বলে বিজ্ঞাপন দিচ্ছি ?

কাগজে দেখলাম। বেশ বিজ্ঞাপন দিয়েছ, ছেলোমেয়েদের নিয়ে একা আর কতকাল চালাব,
আমার জন্যে না হোক ওদের কথা ভেবে ফিবে এসো, ইতি তোমাব সুধা। তোমাব বিজ্ঞাপন যদি
চোখে পড়ে সুধা, যেখানে থাক নগেন ছুটে আসবে।

সুধা আর কথা বলে না, আবার ঘাবে ঢুকে দবজা বন্ধ করে দেয়। এবার তাব পদক্ষেপের
শব্দও হয় কোমল, দরজা বন্ধ করার শব্দও হয় মৃদু।

সিঁড়ি দিয়ে নামতে আরম্ভ করে ইতি বলে, সিঁড়ি যেন আব ফুবোতে চায় না।

কষ্ট হচ্ছে ?

থাক, আর দরদ দেখিয়ে কাজ নেই।—সুধাদির ক মাসের ভাড়া বাকি আছে ?

ক মাস আবাব, দু-একমাস। কী করবে বলো বেচারি, চাবটি ছেলোমেয়ে নিয়ে চান্দিক অন্ধকার
দেখছে। নার্সগিরিতে কী পয়সা আছে ?

তুমি দাও না কেন ?

আমি কেন দেব ? আমাব সঙ্গে কী সম্পর্ক ? আর দুমাস দেখব, ভাড়া যদি না মিটায়,
পষ্ট বলে দেব বিনা ভাড়ায় যে-বাড়িতে থাকতে পাবে সেখানে থাকো গে, আমাব এখানে ও সব
চলবে না।

সিঁড়ি বেয়ে দোতলায় নামার স্থলিত ভঙ্গি ইতির এবাব নিজেব হঠাৎ মুচড়িয়ে ভেঙে পড়বাব
ভঙ্গিতে পরিণত হয়ে গেছে। কিন্তু এদিকে সিঁড়িও ফুরিয়ে আসছে, প্রাণপণ চেষ্টায় মানবেব বাহুমূলে
আসতে একটা চড় মেরে মৃদু হেসে সে তাই বলে, কী দুষ্টুই তুমি ছিলে।

তেতলায় থোকাব মা থোকাকে যেমন করে দুষ্টু বলেছিল, ঠিক তেমনই করে বলে। তাবপন
আচমকা জিজ্ঞাসা করে, কই দিলে না ?

মানব বলে, কী ?

মা যে দশ টাকা ধার চেয়েছে ? ভাড়ার টাকা তো পেলে, তাই থেকে দাও না ?

মানব মৃদু হেসে কোমরের গৌঁজা টাকা বার করে ইতিকে দশটা টাকা দেয়। ইতি খাড় গুঁজে
নামতে থাকে।

একতলার বারান্দায় নেমে দেখা যায় : বারান্দায় মাদুরে বসে দেয়ালে ঠেস দিয়ে ইতিব মা ঘুমুচ্ছে,
পাশে পড়ে আছে বছর তিনেকের একটা উলঙ্গ ছেলে, সর্বাঙ্গে তার অনেকগুলি পাঁচড়া। বারান্দার
অপর প্রান্তে ঐটো বাসন পড়ে আছে। ছেলেটার পাঁচড়ার রস ভালো না লাগায় থেকে থেকে পাঁচড়া
ত্যাগ করে কয়েকটা মাছি উড়ে যাচ্ছে ঐটো বাসনে আর উচ্ছিন্ন ভালো না লাগায় থেকে থেকে
কয়েকটা মাছি ঐটো বাসন ত্যাগ করে উড়ে এসে বসছে ছেলেটার পাঁচড়ায়।

ইতির মার ঘুম ঠিক ঘুম নয়, চোখ বুজে থাকা। মটকা মেরে নয়, শ্রান্তিতে আর দুর্বলতায়।

চোখ মেলে ইতির মা বলে, ইতি এলি ?

বলে মানবের মুখের দিকে চেয়ে ইতির মা বলে, সকালবেলা এক কুঁজো জল নিয়ে গেলেন, ফুরিয়ে গেছে ? ইতি, যা তো মা, কুঁজোয় জল ভরে দিয়ে আয়। ও সব কী পুরুষ মানুষের কাজ ! মানব বলে, সিঁড়ি ভাঙতে ইতির কষ্ট হয়, আমিই নিয়ে যেতে পারব।

ইতির মা এ কথা শুনতে পায় না। মেয়ের পদমূলে চোখ রেখে বলে, তোর পায়ে রক্ত কীসেব লো ইতি ?

ইতি নিশ্চিতভাবে বলল, পাঁচড়া চুলকে ফেলেছি।

মানব বলে, তোমার পাঁচড়া হয়েছে ইতি ?

প্রশ্ন শোনামাত্র ইতি বিনা ভূমিকায় খেপে যায়। আর্তনাদ করার মতো বলতে আবস্তু করে, হ্যাঁ হয়েছে, একশোটা হয়েছে। কী করবে তুমি ? ঘেন্না করবে ? করোগে যাও, কে তোমার ঘেন্নাকে কেয়ার করে ? দেখছ না ভাইয়ের গায়ে পাঁচড়া, জান না ভাইকে আমি কোলে নিই ? পাঁচড়া হবে না তো কী হবে আমার ?

তাড়াতাড়ি কুঁজোটা নামিয়ে রাখতে সেটা গড়িয়ে উঠোনে পড়ে ভেঙে যায়। মানব সেদিকে চেয়েও দ্যাখে না।

ঘবে যাও ইতি, সুধাকে পাঠিয়ে দিচ্ছি।

বলে একেবারে তিন-চারটা ধাপ ডিঙিয়ে মহামানবের মতো মানব উপরে উঠতে আরম্ভ করে।